

যতীন্দ্রনাথ সেনগুপ্ত



# শিখাঙ্কিকা

৮১

সং. সো. ২। নি









निशांतिका



# ନିଶାନ୍ତକା

ସତୀନ୍ଦ୍ରନାଥ ସେନଗୁପ୍ତ

ବାବୁ

କଲିକତା

প্রথম প্রকাশ

অগ্রহায়ণ ১৩৬৪

# বাক্

প্রকাশক বাক্-এর পক্ষ থেকে

তারাবূষণ মুখোপাধ্যায়

৩৩ কলেজ রো কলিকাতা ৯

মুদ্রাকর : কার্তিকচন্দ্র পাণ্ডা

মুদ্রণী ৭১ কৈলাস বহু ষ্ট্রিট কলিকাতা ৬

প্রচ্ছদ : পূর্ণেন্দুশেখর পত্রী

মূল্য তিন টাকা



# निशात्रिका

भूमिका ॥ अतुलचन्द्र गुप्त

परिचारिका ॥ कानिदास राय



# ভূমিকা

১

এই কাব্যসংগ্রহের কবিতাগুলির রচনা কাল ১৩৫৪ সালের পৌষ থেকে ১৩৫৯ সালের ফাল্গুন মাস। মোটামুটি কবির মৃত্যুর সাত বৎসর পূর্ব থেকে দু বৎসর পূর্ব পর্যন্ত। ১৩৫৪ সালে কবির বয়স ষাট। কবিতাগুলি তাঁর ষাটোত্তর বয়সের রচনা। “সায়ম্” ও “ত্রিযামার” কবিতায় কবির মনের ভাব ও অনুভূতির পরিবর্তনে কাব্যে যে সুরের বদল দেখা দিয়েছিল এ কবিতাগুলি সেই বদল সুরের।

বাংলা সাহিত্যে যতীন্দ্রনাথের কবিপ্রতিষ্ঠার ভিত্তি তাঁর তিন খানি প্রথম কাব্যগ্রন্থ। “মরীচিকা”, “মরুশিখা” ও “মরুমায়্যা”। এর কবিতাগুলি লেখা হয় ১৩১৭ থেকে ১৩৩৭ সালের মধ্যে। কবির পরিণত যৌবন প্রৌঢ়ত্বের সীমারেখা ছোঁষা পর্যন্ত। এ কবিতাগুলির অনাস্বাদিতপূর্ব ভাব ও রস, ভাষার ও প্রকাশভঙ্গির অগতানুগতিক অমলিন তীক্ষ্ণতা, ঝাঁঝাল ব্যঙ্গ-বিদ্রূপের বিদ্যুৎ স্কুরণ, বাঙালী কাব্য-পাঠকের মনে বিস্ময়ের চমক জাগালো। নূতনকে আয়ত্তে আনার বহু আচরিত চেষ্টা তাকে নামের বন্ধনে বাঁধা। সকলে মিলে কবির গায়ে একটা লেবেল এঁটে দিলাম। যতীন্দ্রনাথ দুঃখবাদের কবি।

মানুষের ও প্রাণীমাত্রের জীবনে দুঃখ কঠোর সত্য। এ তথ্যকে ভুলে থাকার কি এড়িয়ে থাকার উপায় নেই। কিন্তু ওর “বাদটা” তথ্য নয় তত্ত্ব। অন্ত অনেক তত্ত্বের মতই কিছু তথ্য জড়ো ক’রে, বাকী সব তথ্যকে বাদ দিয়ে, মননের একটা কৌশল গড়া যাতে বহুকে এক ক’রে এক ধরনের বোঝার সুবিধা হয়। এ-দুঃখবাদ সভ্য মানুষের সমাজে নূতন কিছু নয়। বৌদ্ধদের চার আর্থ বা প্রধান সত্যের একটি হ’লো “সর্বং দুঃখং দুঃখং”। আমাদের দেশের আন্তিক দর্শনগুলির মত ভিন্ন নয়। জীবন দুঃখময়, দুঃখেই

গড়া। তার মধ্যে সুখ বা আনন্দ যেটুকু থাকে দুঃখের তুলনায় তা অকিংচিৎকর। তার ক্ষণিক ছলনা স্থায়ী দুঃখকেই বাড়ায়। দর্শনের তত্ত্বজ্ঞানের লক্ষ্য এই দুঃখের আত্যন্তিক বা চরম নিবৃত্তির পথ দেখান। যে পথের সন্ধানে গৃহী গোতম গৃহহীন বুদ্ধ হয়েছিলেন। বিদেশের দেশে দেশে তত্ত্বচিন্তায় ও সাহিত্যে এই দুঃখবাদের ছাপ। জীবনে দুঃখ এমন সর্বব্যাপী, তীক্ষ্ণ ও প্রকট যে তা না হলেই আশ্চর্যের কথা হতো। 'He alone is happy who never was born'। স্মৃতরাং কবি যখন বলেন

মিথ্যা প্রকৃতি, মিছে আনন্দ, মিথ্যা রঙিন সুখ ;  
সত্য সত্য সহস্রগুণ সত্য জীবনের দুখ।

( মরুশিখা )

তখন নূতন কোনও তত্ত্বের কথা বলেন না।

কিন্তু তত্ত্বের বিচারে কাব্যের বিচার নয়। সৃষ্টির মূল দুঃখে, না আনন্দাদ্যেব খলিম্যানি ভূতানি জায়ন্তে সে প্রশ্ন নিরর্থক। যে দেহী মনোময় জীবের দুঃখ সুখ আনন্দের কথা আমরা জানি ও কল্পনা করতে পারি, বিশ্বসৃষ্টির লক্ষকোটি সূর্য গ্রহ উপগ্রহে তারা সংখ্যায় কতনা যে সৃষ্টির মূলে দুঃখ না আনন্দ তার তর্ক তুলি? আমাদের কারবার এই অতি ছোট পৃথিবীকে নিয়ে। তার প্রকৃতির রমণীয়তা ও ভীষণতা, তার গুটিকয়েক সংবেদনশীল জীবের বেদনা ও আনন্দ আমাদের সফল কাব্যের উপাদান। “আর পাবো কোথা?” এই ছোট গভীর মধ্যে দুঃখ এক প্রকাণ্ড সত্য। একমাত্র সত্য নয়। যেটুকু আনন্দ আছে তা-ও সমান সত্য; পরিমাণে যতই কম হোক। এই দুঃখের সর্বব্যাপী বৈচিত্র্য যে কবির অনুভূতিকে আবিষ্ট ক’রে কাব্য সৃষ্টিতে উদ্বুদ্ধ করে, তাঁর অনুভূতি যদি সত্য ও গভীর হয়, তাঁর কবিকর্মের যদি ক্ষমতা থাকে সে দুঃখের রসমূর্ত্তি সৃষ্টি করার তবে সে কাব্য আমাদের মনের গভীরে প্রবেশ করে। দুঃখ ও বেদনা আমরা জানি, তার কাব্য-রসের স্বাভাৱ্যমানতার বীজ আমাদের মনেই আছে। যেমন আছে কবির ‘অকারণ পুলকে’

ক্ষণিক আনন্দ গানের আন্বাদনের বীজ। কাব্যের রস কেবল মধুর রস নয়, নবরস, অর্থাৎ অসংখ্য রস। সর্বব্যাপী দুঃখ ও বেদনার সার্থক রসমূর্ত্তি সৃষ্টি ক'রে কবি যতীন্দ্রনাথ সাহিত্যে অমর হয়েছেন। কবি যখন 'বহিস্কৃতি' দিয়ে কাব্যারম্ভ করেন,

শিখায় শিখায় হেরি তব রূপ, রূপে রূপে তব শিখা,

ভূষিত মরুর নীরস অধরে তুমি ধরো মরীচিকা।

( মরীচিকা )

তখন দুঃখের বিশ্বরূপ ও তার ছলনাময় মূর্ত্তি মনের চোখে ফুটিয়ে তোলেন। যাকে জানি সুন্দর কবি যখন তার মধ্যে দুঃখের জ্বালা দেখেন ও দেখান, “রূপে রূপে তব শিখা”, তখন তার যে কাব্যানন্দ সে সেই এক আনন্দ কবি যখন অসুন্দর ও সাধারণের মধ্যে সুন্দরকে দেখেন ও দেখান। এ দুয়ের কবিধর্ম ভিন্ন, কিন্তু কবিকর্ম অভেদ। একে একদেশদর্শী বলা অর্থহীন। সর্বদেশদর্শী দৃষ্টি যদি কিছু থাকে তা কাব্যের দৃষ্টি নয়। সংখ্যেরা বলেন ত্রিগুণের যখন সাম্যাবস্থা প্রকৃতি তখন বক্ষ্যা। গুণের তারতম্যেই সৃষ্টির আরম্ভ। কবি অবশ্য দুঃখের একতারা বাজিয়েছেন, খুব চড়া সুরে, বহু অনুভূতির সিম্ফনি নয়। যে কবির কাব্যে বহু-রসের সিম্ফনি তা ছড়িয়ে থাকে বহু কবিতায়, এক কবিতার অর্কেষ্ট্রায় নয়। ব্যথার বাঁশীতে যখন আনন্দের গান বেজে ওঠে, সে গান আনন্দের ব্যথার নয়। যদিও সেই বাঁশীতেই আবার ব্যথার গান বাজে।

২

শ্রীশশিভূষণ দাশ গুপ্ত তাঁর “কবি যতীন্দ্রনাথ ও আধুনিক বাঙলা কবিতার প্রথম পর্যায়” গ্রন্থে শ্রীঅজিত দাসের একটি প্রবন্ধ থেকে যতীন্দ্রনাথের নিজের মুখে তাঁর কাব্য-রচনার এক ইতিহাস উদ্ধৃত করেছেন। যতীন্দ্রনাথ বলেছেন তাঁর কবি হবার আদবেই কোনও অভিপ্রায় ছিল না। তিনি পাশকরা materialist ইঞ্জিনিয়ার।

ভূমিকা

৩

লোহা-লকড়, ব্রীজ-কালভাট এমন সব ভারী কাজের নিরেট জিনিষ নিয়েই তাঁর কারবার। স্মতরাং সমকালীন কবিদের ভাবানুভূতির আকাশকুসুমের একঘেয়ে ভাপসা মিষ্টিগন্ধে তাঁর মন বিষিয়ে উঠলো। এ-সব কবিদের বিরুদ্ধে তাঁর মনে জাগলো বিদ্রোহ। ব্যঙ্গ-বিদ্রূপে তাদের আক্রমণের উদ্দেশ্যেই তিনি কবিতা রচনায় হাত দিলেন। কিন্তু বাংলার কবিদল তাঁর বিদ্রূপকেই কাব্যজ্ঞানে “চেঁচিয়ে উঠলেন,—কবি—কবি—কবি”।

যতীন্দ্রনাথের এই কাব্যোৎপত্তির ইতিহাসে সত্য ততটা যেমন নিউটনের মাধ্যাকর্ষণের নিয়ম আবিষ্কারের ইতিহাসে গাছ থেকে আপেল ফল মাটিতে পড়ার কাহিনীতে। সর্বব্যাপী দুঃখ বেদনাকে কাব্যের মূর্তি দেবার তাগিদে নয়, বাঙালী কবিদের ভুয়া ভূমানন্দের প্রতিবাদের ব্যঙ্গ-বিদ্রূপে ‘মরীচিকা’ ‘মরুশিখার’ সৃষ্টি এমন কথা কবি নিজের মুখে বললেও সত্য হষে ওঠে না। আকস্মিক উপলক্ষটা কারণ নয়। শিব গড়তে বানর গড়া -হজেই ঘটে, বানর গড়তে শিব গড়ে ওঠে কেবল শিল্পীর হাতে। বাঙালী কবিদের কিছুমাত্র ভুল হয় নাই। যতীন্দ্রনাথের কাব্যে অনুসঙ্গিক ব্যঙ্গ-বিদ্রূপকে ছাপিয়ে উঠেছে দুঃখের তীব্র রূপ। যতীন্দ্রনাথ প্যারডি-কার নন, যতীন্দ্রনাথ কবি।

কিন্তু ব্যঙ্গ-বিদ্রূপে কাব্যের উৎপত্তির কাহিনীতে যে টুকু বাহ্যিক সত্য ছিল যতীন্দ্রনাথের কাব্যের উপর তা ছায়া ফেলেছে। যে কবির। অজানা ‘সুদূরের পিয়াসী’, সৃষ্টির আনন্দ ও মঙ্গলেই যারা বদ্ধদৃষ্টি, ‘উদাসীন আর সবা পরে,’ “আঁখি না মেলেই যে ভাগ্যবান পড়ে আলোকের প্রেমে”—তাদের প্রতিনিধি তিনি করেছেন রবীন্দ্রনাথকে। যে কবির কাব্যসৃষ্টির বিপুল বৈচিত্র্যে মানুষ ও প্রকৃতির সুখ-দুঃখ-আনন্দ-বেদনার, সুন্দর ও ভীষণতার সফল সুরই বেজেছে। যে কবির কাব্য থেকে অতীন্দ্রিয় রসের দীপ্ত প্রকাণ্ড অধ্যায়টা সম্পূর্ণ ছেঁটে দিলেও কবি মহাকবিই থেকে যান। যার বিশাল কাব্য সৃষ্টিকে প্রকৃতির সৃষ্টির মতই কোনও তত্ত্বের কোঁটায় পুরে রাখা যায় না। ফলে যখন যতীন্দ্রনাথ রবীন্দ্রনাথের কোনও কবিতার রসের

বিরুদ্ধ-রসের সৃষ্টির প্রয়াসী হয়েছেন তখন সে চেষ্টা প্যারডিরই গা  
ধেসে গেছে। যেমন শরৎ ও সোনার তরী কবিতায়। অথচ যখন  
দ্বিজেন্দ্রলালের মামুলি গঙ্গাভক্তির প্রতি-স্তোত্রে যতীন্দ্রনাথ লিখলেন,

হিমগিরি-নির্ঝরে তোমার জীবন গড়ে।  
মিথ্যা মা মিথ্যা এ কাহিনী,  
যুগে যুগে নরনারী-অফুরাণ-আধিবারি  
পুষ্ট করিছে তব বাহিনী।

তখন তা কাব্য হয়ে উঠেছে। কারণ তার মূলে প্রতিবাদ নয়,  
অনুভূতি। যদিও ‘হিমগিরি-নির্ঝরে’ গঙ্গার উৎপত্তি খাঁটি materialist  
সত্য। কিন্তু কাব্যের কল্পনা তত্ত্বের শাসন মানে না; না বস্তুতাত্ত্বিক  
না ভাবতাত্ত্বিক তত্ত্বের।

### ৩

‘সায়ম্’ থেকে কাব্যের সুর বদলের মানসিক পরিবর্তনের তত্ত্ব  
কবি এই সংগ্রহের প্রথম কবিতা “গন্ধারায়” ব্যক্ত করেছেন।

যে-সুখ বেলি ও চামেলি গন্ধে,  
অবশ করিছে এ নাসারন্ধ্রে,  
যে-সুখ কাঁপিছে এ মোর ছন্দে—  
তা যদি মিথ্যা হয়,  
যে দুঃখ তবে হৃদয়ে হৃদয়ে  
তুষানল সম ধোঁয়াইয়া দহে,  
যে-দুঃখ বীণার ছেঁড়া তার বহে,  
কেন তা মিথ্যা নয়?

কিন্তু এ হচ্ছে তত্ত্বাণ্বেষীর বুদ্ধির গবেষণা, কবির অনুভূতির  
প্রকাশ নয়। এ কবিতার অন্তর্ভুক্ত যে অনুভূতির যে প্রকাশ—

গোলাপে কমলে ডাঁটায় ডাঁটায়  
যে ব্যথা শিহরে কাঁটায় কাঁটায়

ভূমিকা

‘সেই ব্যথা ফুটে’ পাপড়ির পুটে,  
হ’য়ে ওঠে সৌরভ,—

‘আমার সকল কাঁটা ধনু ক’রে গোলাপ হয়ে উঠবে’-র বিলম্বিত  
ক্ষীণ প্রতিধ্বনি ।

“ও অশথ” কবিতায় কবি যখন অশ্বথকে জিজ্ঞাসা করেন --

ফাল্গুনের ভাঙা হাতে  
সেদিনও পাইনিরে তোরে  
অগোণা গাঁঠে গাঁঠে  
বয়সের গাছ কি পাথর ;  
বয়সের সেই গহনে  
চকিতে মন উদাসি’  
বাজাল কেমন ক্ষণে’  
কে কিশোর এমন বাঁশী ?  
তোর অন্তর জীর্ণজরা  
শ্রামে শ্রামে শ্রামময় ।  
তোর পথে বসি পাতাখসা  
জীবন হ’লো মধুময় !  
কেমন কোরে এমন হয় ?

ফিরে সেই বুরু বুরু  
চলে নাচ দিনে রেতে  
পুরানোর পাজর বাজে  
নতুনের পায়জোড়েতে ।

তখন রসের আনন্দে মন ভরে । কিন্তু এ সুর বাংলা কাব্যের  
অতি পরিচিত রবীন্দ্রনাথের সুর । যতীন্দ্রনাথকে সম্পূর্ণ পৃথক ক’রে  
এর মধ্যে পাওয়া যায় না ।



যে ঋষি-কবিরা পৃথিবীর ধূলিকে মধুময় দেখেছিলেন, সৃষ্টির মূল সত্তাকে তাঁরাই জেনেছিলেন 'ভীষণং ভীষণানাম্'। তাঁরা রুদ্রের দক্ষিণ মুখ দেখার আর্ত প্রার্থনা জানিয়েছেন, বাম মুখ যে ক্রকুটিকরাল তা জানতেন। যতীন্দ্রনাথের কবিদৃষ্টি যখন রুদ্রের বামশ্চের হিপ্নটিজম্ মুক্ত হয়ে প্রসন্ন দক্ষিণ মুখের উপরেও পড়ল তখন তাঁর কাব্যাতুরাগীদের এ আশা অস্বাভাবিক নয় যে তাঁর কাব্যে বেদনা-আনন্দের, আলো-অন্ধকারের যুগলমূর্তির কোনও অপূর্বরূপ ফুটে উঠবে। কিন্তু এই শেষের কবিতাগুলিতে সে আশা পূর্ণ হয় না। কবির সৃষ্টি পাঠকের আকাংখার ফরমানী পথে চলে না। কিন্তু এ এ কবিতাগুলির নানা রস ও বহু রং পাঠককে মুগ্ধ করবে। কবি যৌবনে কঠোর দুঃখের যে কঠিন মূর্তি সৃষ্টি করেছিলেন তা যদি দৃষ্টি হয়ে থাকে তার ভ্রমের আশ্রয় এর বহু জায়গায় ছড়িয়ে আছে।

এ সংগ্রহের একটি কবিতা কারও চোখ এড়াবে না। "খোলা কথা"—প্রেমিক স্বামীর প্রতি সতী-সাক্ষী স্ত্রীর উক্তি।

শুধালে তো কহি প্রিয়,  
 অপরাধ নাহি নিও,  
 যৌবন গেছে—গেছি বেঁচে।  
 তোমার প্রেমের ভার  
 দিবা রাতি বহিবার  
 গুরুদায় আজ ফুরিয়েছে।

সেই যৌবন মম  
 সেই প্রেম, প্রিয়তম,  
 চ'লে গেছে তুমি কাঁদো তাই।  
 আমি যে বেঁচেছি প্রিয়,  
 হু'পায়ের ধূলা দিও  
 তারে আর ফিরিয়া না চাই।

ছন্দে গাঁথা সত্যের ভীষণতার নিঃশ্বাস বন্ধ হয়ে আসে।  
কয়েকটি কবিতা টপিকাল্। আশ্চর্য টপিকাল্। “দরিদ্রনারায়ণের”  
কথাবস্তু পলিটিস্যান্‌রা যাকে বলেন ‘রেফুজী প্রব্লেম্’।

এবার সেবার স্তব্ধযোগ,  
ধ্বনিত দিক্ দিগন্ত,  
দ্রাবিড় বেলুড় মাড়োয়ার হ’তে  
ছুটিছে পুণ্যবস্তু।

যে যেমন পায় কুড়িয়ে নে যায়,  
পতিতোদ্ধার-পরায়ণ ;—  
বাংলায় আর নর মেলা ভার,  
যা আছে সেরেফ নারায়ণ।

ব্যঙ্গ ! জমাট বাঁধা তপ্ত চোখের জল।

স্বাধীনতোত্তর দেশে ‘তিন চোরের’ ছড়া,—

আগে চুরি করে জেল খাটে পরে  
নির্বোধ চোর যারা,  
আগে জেল খাটে পরে চুরি করে—  
সেখানে স্বদেশী তারা।

যে-চুরিতে ভাই জেলখাটা নেই  
না আগে না পশ্চাৎ ;  
নিরীহ আমরা বাণীর সেবক  
তাতেই পাকাই হাত।

বদল সুরের শ্রেষ্ঠ কবিতা দিয়ে শেষ করি ।

দেখা দাও দেখা দাও ।

আলো নিবিবার আগে একবার

সুন্দর, মোরে দেখা দাও ।

তুমি র'য়ে গেলে দেখার অতীত

সব কিছু তাই দেখি কুৎসিত,

দেখার এ দোষ যাবে না যদি না

দেখা দাও ।

অপরূপ রূপ আঁধির সমুখে

আপনি যদি না ফুটে

অপরের ডাকা নামে বারে বারে

ডাকিতে কি মন উঠে ?

\* \* \*

কণ্ঠে তোমার—যে মালা হুলাই

হয় তা শুষ্ক স্নান,

যে ধুপেই তোমা করি গো আরতি

ভস্মে সে অবসান ।

এ জ্বালা আমার যায় না কিছুতে

তাই ছুটি মরীচিকার পিছুতে

সারা জীবনের নয়নাশ্রুতে

চির সুন্দর, দেখা দাও । ( 'দেখা দাও' )

সন্দেহ নেই আলো নেবার আগে চিরসুন্দর কবিকে দেখা  
দিয়েছিলেন ।

কার্তিক, ১৩৬৪ ।

অতুলচন্দ্র গুপ্ত

॥ গ্রন্থাকারে প্রকাশিত কবির অন্যান্য রচনা ॥

মরীচিকা	::	১৩৩০
মরুশিখা	::	১৩৩৪
মরুমারা	::	১৩৩৭
কাব্য-পরিমিতি	::	১৩৩৮ ( প্রবন্ধ )
সাবম্	::	১৩৪৮
অনুপূর্বা	::	১৩৫৩ ( সংকলন )
ত্রিষামা	::	১৩৫৫

॥ অনুবাদ ॥

গান্ধী-বাণী কনিকা	::	১৩৫৫
কুমারসম্ভব	::	১৩৫৬
রথী ও সারথী	::	১৩৫৭

॥ গ্রন্থাকারে অপ্রকাশিত অনুবাদ ॥

ম্যাক্বেথ
হাম্লেট
ওথেলো
এন্টনি ও ক্লিওপেট্রা ( আংশিক )

## পরিচায়িকা

বাংলার অন্ততম সংস্কৃতিকেন্দ্র শান্তিপুরের নিকটবর্তী হরিপুর গ্রামে মধ্যবিত্ত বৈষ্ণবংশে ১৮৮৭ সালের ২৬শে জুন কবি যতীন্দ্রনাথ জন্মগ্রহণ করেন। ছাত্রজীবনে কবি খুব কষ্টসহিষ্ণু ছিলেন। নানা-রূপ অসুবিধার মধ্য দিয়ে তাঁকে শিক্ষালাভ করতে হয়। কবি ১৯০৩ সালে ওরিয়েন্টাল সেমিনারী থেকে এন্ট্রান্স, ১৯০৫ সালে জেনেরাল এসেম্বলি থেকে এফ-এ এবং ১৯১১ সালে শিবপুর ইঞ্জিনিয়ারিং কলেজ থেকে বি. ই পাশ করেন। ইঞ্জিনিয়ারিং কলেজ হতে পাশ ক'রে বেরোবার আগেই একুশ বছর বয়সে কবির বিবাহ হয় হাজারীবাগ-প্রবাসী একজন প্রসিদ্ধ উকিলের কন্যা জ্যোতির্লতা দেবীর সঙ্গে।

কবি প্রথমে ই.আই.রেলের সার্ভেয়ার হয়ে ১৯১১ সালে কর্ম-জীবনে প্রবেশ করেন। এক বছর পরে নদীয়া জেলাবোর্ডে প্রথমে কর্মে ব্রতী হ'ন—পরে ডিষ্ট্রিক্ট ইনজিনিয়ারের পদে উন্নীত হ'ন। ১৯২৩ সালে তিনি সে কাজ ছেড়ে দিয়ে কাশিমবাজার রাজ এষ্টেটে ইনজিনিয়ারের কাজ গ্রহণ করেন—এই কাজে ১৯৫০ সাল পর্যন্ত বাহাল ছিলেন। অবসর গ্রহণের পর মাত্র ৪ বৎসর জীবিত ছিলেন—১৯৫৪ সালে ১৭ই সেপ্টেম্বর হৃদরোগে প্রাণ ত্যাগ করেন।

এই হলো কবির সংক্ষিপ্ত জীবনী। কবির সাহিত্য-জীবনের সূত্রপাত হয় শিবপুর কলেজে পঠদশায়।

নদীয়া জেলা বোর্ডে চাকরি করবার সময় তিনি মাসিক পত্রে কবিতা প্রকাশ করতে থাকেন। ২১৩টি কবিতা প্রকাশিত হওয়ার সঙ্গে সঙ্গেই রচনাভঙ্গীর বৈশিষ্ট্যের জন্য তাঁর কবিতা রসজ্ঞ পাঠকদের দৃষ্টি আকর্ষণ করেছিল। দু'বছরের মধ্যেই তিনি অসামান্য কবিখ্যাতি লাভ করেন সাহিত্যিক সমাজে।

তারপর ক্রমে তাঁর নিম্নলিখিত পুস্তকগুলি প্রকাশিত হয়।

মরীচিকা ( ১৩৩০ ), মরুশিখা ( ১৩৩৪ ), মরুমায়ী ( ১৩৩৭ )।  
কাব্য-পরিমিতি—( কাব্যরসবিচারের পুস্তক ১৩৩৮ ), সায়ম্, (১৩৪৮),  
ত্রিয়ামা ( ১৩৫৫ ), অনুপূর্বা ( সংকলন, ১৩৫৩ ও ১৩৬১ )।

নিশান্তিকা কবির শেষ পুস্তক। কবি তাঁর দ্বিতীয়ার্ধ জীবনকে  
রাত্রিকাল কল্পনা ক'রে—এই জীবনে রচিত কবিতার বই তিন  
খানিকে সায়ম্, ত্রিয়ামা ও নিশান্তিকা নাম দিয়েছেন। নিশান্তিকা  
কবির নিজেরই দেওয়া নাম,—জীবৎকালে এই বই প্রকাশিত হয়নি।

ত্রিয়ামা কলিকাতা বিশ্ববিদ্যালয়ের বি-এ অনাসেস্ ও অনুপূর্বা  
এম-এ পরীক্ষার অবশ্য পাঠ্যরূপে নির্ধারিত হয়েছে।

কবির বহু প্রবন্ধ গ্রন্থাকারে প্রকাশিত হয়নি, কেবল কাব্যের  
রসবিচারের নিবন্ধগুলি কাব্যপরিমিতি নামে রসচক্র কর্তৃক গ্রন্থাকারে  
প্রকাশিত হয়েছিল।

কবি শেকস্পীয়ারের ম্যাকবেথ, হ্যামলেট, ওথেলো ও এণ্টনি  
ক্লিওপেট্রা ( আংশিক )—এই চারখানি নাটকের অনুবাদ করেছেন।  
এগুলি গ্রন্থাকারে এখনো প্রকাশিত হয়নি। কবির কুমারসম্ভব  
কাব্যের একখানি স্বচ্ছন্দ অনুবাদগ্রন্থের কয়েকটি সংস্করণ হয়েছে।  
এইগুলি ছাড়া—শ্রীমদ্ভগবদ্গীতা অবলম্বনে রচিত 'রথী ও সারথি'  
এবং মহাত্মা গান্ধীর বাণী অবলম্বনে রচিত 'গান্ধী বাণীকবিকা' নামে  
দুখানি ছোট কাব্যগ্রন্থের প্রকাশ কবি দেখে গেছেন।

কলিকাতা বিশ্ববিদ্যালয়ের রামতনু অধ্যাপক ডাঃ শশিভূষণ  
দাশগুপ্ত কবির কাব্যগুলির পাণ্ডিত্যপূর্ণ আলোচনা ক'রে একখানি  
সমালোচনা গ্রন্থ রচনা ও প্রকাশ করেছেন।

কবি যতীন্দ্রনাথ নিভূতে কাব্যলক্ষ্মীর সেবা করতেন,—তিনি  
বরাবর লোক-সংঘট্ট এড়িয়ে চলতেন। কোন সভাসমিতি, মজলিশ  
বা সাহিত্যগোষ্ঠীর সঙ্গে তাঁর যোগাযোগ ছিল না, এমন কি পরি-  
চিতের সংখ্যাও তিনি বাড়াতে চাইতেন না।

যশ মানের লোভ তাঁর ছিল না। তাঁর সম্বন্ধে বলা চলে—“গুণ  
লুপ্তাঃ স্বয়মেব সম্পদঃ” অর্থাৎ যশঃসম্পদ তাঁকে বরণ করেছিল।

তিনি যশঃসম্পদকে কোনদিন অশ্বেষণ করেন নি। কবি তাঁর রচনার প্রচারের জন্তও কোন চেষ্টাই করেন নি—এমন কি নামজাদা মাসিকপত্রেও কোন দিন কবিতা ছাপাননি। বৈষয়িক জীবনেও তাঁর কোন উচ্চাকাঙ্ক্ষা ছিল না। তাঁর পেশার সম্বন্ধে যে অপবাদ বা দুর্নামের কথা প্রচলিত আছে, তা তাঁকে একেবারেই স্পর্শ করেনি। নিষ্কলঙ্ক স্মৃতি ও প্রভুর সশ্রদ্ধ প্রীতি নিয়ে তিনি অবসর গ্রহণ করেছিলেন। কবি হিসাবে তিনি বড়,—মানুষ হিসাবে তিনি আরো বড় ছিলেন। তিনি ছিলেন কঠোর নিয়মনিষ্ঠ, সংযমী ও সত্যসন্ধ পুরুষ। প্রথর আত্মমর্যাদাবোধের জন্ত জীবনে অনেক ক্ষতিই স্বীকার করেছিলেন।

যতীন্দ্রনাথকে দুঃখবাদী কবি বলা হয়। তিনি এই ‘দুঃখালয় অশাশ্বত’ জগতের দুঃখকে হেসে উড়িয়ে দিতে পারেননি, দুঃখের কোন আধ্যাত্মিক ব্যাখ্যাও খোঁজেন নি—দুঃখকে সুখের প্রসবব্যথা ব’লেও নিজের মনকে ভোলাতে পারেন নি। দুঃখকে তাঁর কাব্যে এড়িয়ে না গিয়ে তিনি দুঃখদেবের সম্মুখে মুখোমুখি দাঁড়িয়ে তাঁর সম্মে একটা বোঝাপড়া করবার চেষ্টা করেছেন। তিনিই কবিগুরুর ভাষায় বলতে পারতেন—

“দুঃখের বেশে এসেছ ব’লে তোমারে নাহি ডরিব হে।”

তাঁর কবি-দৃষ্টি ছিল দুঃখাভিমুখী ও সত্যাত্মসন্ধানী। এই দৃষ্টি হয় তাঁর সহজাত, নয়ত কাব্যসাহিত্যে স্বাতন্ত্র্য ও বৈশিষ্ট্যসৃষ্টির জন্ত সচেতন ভাবে অনুশীলনের ফল। তাঁর জীবন থেকে স্বভাবতঃ এই মানসী দৃষ্টির উদ্ভব হয়েছে একথা বলা যায় না। কারণ, তাঁর জীবন সত্যসত্যই দুঃখময় ছিল না। পারিবারিক জীবনে তিনি পরিতুষ্ট ও সুখীই ছিলেন, সামাজিক আবেষ্টনে তাঁর প্রফুল্লতা ও সজীবতার অভাব ছিল না। গার্হস্থ্য জীবনের স্বাচ্ছন্দ্য তিনি আকর্ষণ উপভোগ করেছিলেন। কর্মজীবনের বিরুদ্ধেও কখনো তাঁকে অভিযোগ করতে শুনিনি। সাহিত্যিক জীবনে তিনি অসামান্ত সাফল্য লাভ করেছিলেন সাহিত্যসেবার গোড়া থেকেই। এদেশে তার বেশি সম্ভব নয়—তা তিনি বুঝতেন।

তাঁর স্বকীয় ব্যক্তিগত দুঃখ তাঁর দৃষ্টিকে বিষাক্ত ক'রে সৃষ্টির মাঝে  
 সঞ্চারিত হয় নি। সৃষ্টিরই নিজস্ব দুঃখ, অপূর্ণতা, অঙ্গহানি ও অসঙ্গতি  
 তাঁর সত্যজিজ্ঞাসু চিত্তকে অস্থিস্থিতে বিচলিত ও উদ্বেলিত ক'রে  
 তুলেছিল। এসব অন্ত কবিদের হয় ত চোখেই পড়ে না, পড়লেও  
 তাঁরা সমবেদনায় বিগলিত বা ভাববিহ্বল হয়ে পড়েন। মনে হয়,  
 রবীন্দ্রনাথ যাকে 'সাহিত্যের সত্য' বলেছেন—যতীন্দ্রনাথের অতিরিক্ত  
 সত্যনিষ্ঠ চরিত্র ও বৈজ্ঞানিক বুদ্ধির দ্বারা শাণিত চিত্ত—তাকে কবি-  
 কল্পিত বস্তু বলেই গণ্য করেছিল। কঠোর বাস্তব সত্যের প্রতি তাঁর  
 পক্ষে উদাসীন থাকা সম্ভব হয়নি। বাস্তব সত্যকেই তিনি সাহিত্যের  
 সত্য ক'রে তুলতে চেষ্টা করেছিলেন। বাস্তব সত্যের স্থান ছিল  
 কাব্যসাহিত্যে গৌণ। কবি তাকেই কাব্যে মুখ্য স্থান দিয়েছিলেন  
 এবং সাহিত্য ও সামাজিক জীবনের গতানুগতিক ভাববিলাসী ও  
 স্বপ্নমূলক সংস্কারগুলিকে উপহাসই করেছেন। এই মনোভাবের  
 অবশ্যস্বাভাবী ফল দুঃখবাদ। বাস্তবজগতে আনন্দ আছে বটে,  
 —কিন্তু কবির মতে তা দুঃখের ক্ষণিক বিরতি মাত্র, মেঘাস্তরিত  
 রৌদ্রবৎ। কঠোর অপ্রিয় বাস্তবসত্যকে কবিতায় রূপ দিয়ে  
 রসসৃষ্টি করা যে চলে, তা এ যুগে ঘারা দেখিয়েছেন, যতীন্দ্রনাথই  
 তাঁদের অগ্রগণ্য। যতীন্দ্রনাথ অসামান্য সরস রচনাভঙ্গীর গুণেই  
 কঠোর বাস্তব সত্যকে রসে উত্তীর্ণ করেছেন এবং সকল অসুন্দর,  
 অপূর্ণ, অভাব ও অ-সুখকে উপভোগ্য ক'রে তুলেছেন। গতানুগতিক  
 ভাববিহ্বলতার ধারা পরিহার করার জন্মই, বিশেষ ক'রে কল্পনার  
 লীলাবিলাসকে ব্যঙ্গবাণে ক্ষত-বিক্ষত করার জন্মই বোধহয় তিনি  
 নব্যতন্ত্রী কবিদের গুরুস্থানীয়। কিন্তু কেউ তাঁর Serio-comic ও  
 Ironical রচনাভঙ্গীর অনুকরণ করেন নি বা করতে পারেন নি।

সন্ধ্যার কুলায়,  
 কলিকাতা-৩৩

কালিদাস রায়



## ॥ सूचीपत्र ॥

गङ्गाधारा	११
पौष-शयन-सूत्रे	१२
हे राम	२२
ईलावास	२५
प्याथिविब्राट	२१
सुप्तिलोक	५२
गोटाकथेक टाक।	७४
खोला कथा	७७
सुखभोग	७९
भाङ्ग पथे	८२
हेन प्रीति	८७
चोथोचोथि	८८
हासि	८५
भिखारी	८८
बुन्दाबने	५१
उ अशथ	५४
एकला घुमो	५७
दरिद्रनारायण	५१
द्वैत बार्थता	५२
बुथाश्रम	७०
देखा दाउ	७१
समयविण	७७
डुग, डुगि	७५
बाघ-छागलेर कथा	७१
कवि नहि	१०
छड़ा	१२
क्याक्टाम्	१७
बोशेथी छड़ा	१५

বৃক্ষরোপণ	৭৮
অবসর	৭৯
ভয় কি	৮০
শীতের কমল	৮২
স্বাধীনতার স্মৃতি	৮৩
হাটের কবি	৮৫
হুবেলা হুমুঠো	৮৮
জন্মদিন	৮৯
টুকরো	৯০
এদিক ওদিক	৯৪
আগমনী	৯৭
ভোর হ'য়ে এল	৯৯
পরাভব	১০১
অস্ত	১০৩
পেট ও মাটি	১০৫
আসছে জন্মে	১০৮
মোহিতলাল	১১০
কবিবন্ধু কালিদাসের প্রতি	১১১
মিতা কবি যতীন্দ্রমোহন	১১৩
॥ অনুবাদ ॥	
কোজাগরী	১১৫
বাঁশ-বাগান	১১৬
স্বচ্ছ নদীর বালিকা	১১৭
একক শয়নে	১১৭
মুগ্ধ তৃণ	১১৮
উইলো পাতা	১১৮
কমলা পাতার ছায়া	১১৯
বিয়ের প্রস্তাব	১২০
বসন্তে বাদল	১২১

॥ নিশাস্তিকা ॥



বতীন্দ্রনাথ সেনগুপ্ত

জন্ম শে জন ৮৮৭

মৃত্যু : ৭৮ সেপ্টেম্বর ২৫৪



নিশাভিকা



## গন্ধধারা

ফুলের গন্ধ বাজে মোর বুকে,—

বন্ধ, তোমারে ক'য়েছি আগে ;

এখন গন্ধ মন্দ লাগে না,

ফুলের গন্ধ ভালোই লাগে ।

এখন বোশেখে প্রতি ডোরবেলা

যতনে চরিত মল্লিকা বেলা

চাঁপা চামেলীর নানান্ ঝামেলা

কবির টেবিলে নিত্য,

ফুলদানি ডিসে কত ফিস্ফাস,

চাঁপা অধরের কাঁপা উল্লাস,

গন্ধে ভরিয়া ঘরের বাতাস

ম' ম' করে মম চিত্ত ।

দুধের পেয়লা সত্ত্বফুট,

হৈয়ঙ্গবীনমাখা বিস্কুট,

মক্ষিকা আসি জুড়ে করপুট,

রসনারস স্রাণে ;

কুছরবে দিক্ করে চম্চম্

শব্দে গন্ধে প্রাণ ছম্ছম্

এত দিনে হয় হৃদয়ঙ্গম

দেহধারণের মানে ।

গোলাপে কমলে ডাঁটায় ডাঁটায়

যে ব্যথা শিহরে কাঁটায় কাঁটায়,

সেই ব্যথা ফুটে' পাপড়ির পুটে,

হ'য়ে ওঠে সৌরভ,

কোমল বুকের যা-কিছু বেদন,

গন্ধ যে তারি মুক নিবেদন,—

সারা যৌবন দিয়ে তা বন্ধ,

ক'য়েছিলু অশুভর ।

ফুলের গন্ধ শুলের মতন  
বিঁধিত যে মোর দিল—  
আজ বুঝিয়াছি সেটা শুধু, স্মৃথে  
ধাকিতে ভূতের কিল ।

যে-স্মৃথ বেলি ও চামেলি গন্ধে,  
অবশ করিছে এ নাসারন্ধ্রে,  
যে-স্মৃথ কাঁপিছে এ মোর ছন্দে—  
তা যদি মিথ্যা হয়,

যে হুঃখ তবে হৃদয়ে হৃদয়ে  
তুমানল সম ধোঁয়াইয়া দহে,  
যে-হুঃখ বীণার ছেঁড়া তার বহে,  
কেন তা মিথ্যা নয় ?

হুঁহু কোড়ে কেঁদে গেল যৌবন,  
কাঁদে আজ জরা-জড়ানো জীবন,  
কাঁদিয়া অন্ধ করিছে নয়ন,  
কি ফল লভিছে তাহে ?

যাবার বেলায় তাই ফুল আনি,  
বতনে সাজাই ভাঙা ফুলদানি,  
মহাত্মাতুর এ মহাপ্রাণী,  
রসের পেয়ালি চাহে ।

বৈশাখ : ১৩৫৫



## পৌষ-শয়ন-স্মৃতি

পৌষ-শয়ন-স্মৃতি—

পালঙ্কে কোতুকে

নিদ্ ঘাই,—নিশি নিস্তরু ;—

সহসা দূর-শ্রুত

দিগ্‌বলয়-চ্যুত

অশ্রুপ্লুত একি শব্দ !

পল অল্পপল গনি’

নিকট হ’তেছে ধ্বনি,

প্রহর কাঁপিছে থরথরিয়া,

সংশয় শঙ্কায়

সচকিত মন ধায়

ধ্বনির প্রতিধ্বনি ধরিয়া ।

লৌহ বসুঁচারী

আসিছে ছোটোর গাড়ী ।

বাস্পরুদ্ধ তারি আর্তি ;

বুকে বহি’ ঘরছাড়া

রাতের শয়ন-হারা

আঁধার পথের বাঁধা যাত্রী !

জ্বগে বসে গিরি বন

উচাটন উন্মন

ধ্বনিত তেপান্তরী ভিমিরে,

তপ্ত শয়ন ছাড়ি’

স্বপ্তি দিল যে পাড়ি

শিশির-সজল শীত সমীরে ।

কালের কল্পনাতলে  
কলস নামায়ে রাখি'  
নিশীথিনী কালো মেয়ে  
হ'ল সে আনমনা কি ?

উপচি' যায় যে তার কলসী ;-

উজ্জ্বল কল-কল—  
কলিত ধ্বনির ধারা  
কালো কলসের গায়ে  
গড়ায় বিরামহারা

ফেনার পুঞ্জতারা বলসি' ।

প্রসারিত ছায়াপথে

কে আসিছে মায়ারথে ?

সে আছে তাহারি পথ চাহিয়া,

জলভরণের ছলে

এসেছে নিঝর তলে

উপলকীর্ণ পথ বাহিয়া ।

সহসা গুনিল ধনী

অদূরে বাঁশীর ধ্বনি,

চমকি' কলসী তুলে কক্ষে,

নিকটে আসিল দূর

কাঁপে হিয়া ছুঁছুঁর,

কাঁচুলি কাঁপিয়া বসে বক্ষে ।

ছুর্গমে দিবে পাড়ি  
খামিল ছুটোর গাড়ি,  
    নামিল উঠিল কত যাত্রী ।  
কালো মেয়ে যারে চায়  
সে তো নামিল না হয়,  
    গগনে গড়ায়ে যায় রাত্রি ।

ফিরিবার পথে চালি'  
ভরা ঘট করে খালি,  
    তারি ধ্বনি শুনি সুখ-শয়নে ।  
এ শীতে শয্যাহারা  
পথের পথিক যারা  
    তাদের স্থপ্তি লাগে নয়নে ।

যে অভিমানিনী মেয়ে  
কিরে গেল চেয়ে চেয়ে—  
    ধ্বনির ঝন্নাপথ ধরিয়্যা,  
স্বরিয়্যা তাহারি মুখ'  
ভরিয়্যা উঠিছে বুক  
    পৌষ-শয়ন-সুখ হরিয়্যা ।

পৌষ : ১৩৫৪

## হে রাম

বনের বানর পাইয়া হে রাম  
দিলে প্রার্থিত বর,—  
প্রতিশোধ তরে পিতৃঘাতীরে  
বধিবে ব্যাধের শর ।

তুমি এলে যেই শ্যামসুন্দর,  
মানুষে করিলে ব্যাধ  
মৃত্যুশায়ক হানি' সে গোপনে  
পূরাল' পাশব সাধ ।

ছুটে এলে পাশে সে কী দেখিল সে !—  
ধূলায় লুটাও রাম,  
বাণ-বেঁধা বুক হাসিমাখা মুখ,  
বলে গেল—‘ক্ষমিলাম ।’

না চাহিতে রাম, দিষে গেল বর—  
ব্যাধের স্বর্গবাস  
মানুষ বুদ্ধিল স্বর্গ এ নষ—  
এ তার সর্বনাশ ।

কত কাল কেটে গেছে তারপর ;  
স্বর্গে মেলেনি সুখ  
ধ্যান করে নর বাণ-বেঁধা বুক  
সেই হাসিমাখা মুখ ।

কত মুনি ঋষি সন্ন্যাসী ক্রুশী,  
কত তপ কত তাপ,—  
মানুষের শরে নারায়ণ মরে ;  
ধণ্ডে না এই পাপ ।

কোথা আছে সেই মরা নারায়ণ,  
মানুষ খুঁজিয়া কিরে ;—  
সূর্যে না সোমে পাষাণে কি ব্যোমে  
গির্জায় মন্দিরে ।

এল কি রে দিন ধুয়ে মুছে দিতে  
সেদিনের অপরাধ,  
মানুষের মহাপরীক্ষা তরে  
ভগবান হ'ল ব্যাধ ?

বাণ-বেঁধা বৃকে হাসিমাধা মুখে  
সে শুধু 'হে রাম' বলি'  
সাপ্তাহিকের প্রণামে প্রণমি'  
ধূলায় পড়িল চলি' !

এ নহে পুরাণ, এ নহে কাহিনী,  
মিছে নয় এক তিলও,-  
একের আঘাতে বিশ্বের লোক  
'উছ' ব'লে চমকিল ।

কৈদ না কৈদ না যুগের মানুষ  
আজ বড় শুভদিন,  
তোমারি ভাগ্যে হ'ল পরিশোধ  
চির ভগবৎ-ঋণ ।

এবার ত আর নহে অবতার  
ঠাকুরের লীলা নয়,  
মাটির মানুষ মানুষেরি প্রেমে  
হ'ল মৃত্যুঞ্জয় ।

সর্বযুগের সব মানবের  
তপোঘন মূর্তি সে  
ডাক দিলে বলে দেবতার চেয়ে—  
তুমি আমি কম কিসে ?

যুগযুগান্ত মানব-সাধনা  
এ যুগে পূর্ণকাম,  
চর্মচক্ষে দেখিলাম মোরা  
ব্যাধও ব্যাধ নয় :—রাম ।

চৈত্র : ১৩৫৪

## ইলাবাস

এক বোঁটায় দুটি কুঁড়ি,—  
ইলা আর লীলা,  
মিতার দুটি মেয়ে ।  
চোখে মুখে তখনও প্রভাতী শিশির  
ঝিক্‌মিক্‌ করছে ;—  
ঝ'রে পড়ল ইলা ।  
মিতানি কাঁদে,  
মিতা কাঁদে আর কবিতা লেখে ;  
আমায় শুধায়—  
মিতে,  
কেমন করে ইলাকে ফেরাবো ?  
আমি বলি—  
যে গেছে তাকে আর ফেরাতে চেয়ে না ।  
মিতা বলে—না ;  
নূতন বাড়ীর পাকা গেটে  
পাথর কেটে বসাব—ইলাকে,  
আমার নূতন বাসবাড়ীর নাম হবে—  
ইলাবাস ।

আঙিনায়  
বেল জুঁই চামেলির ঝাড়ে ঝাড়ে—  
হাজার কুঁড়ি ধরবে,  
আর ফুল হ'য়ে ফুটবে—প্রতিদিন ।  
আমি বললাম—বেশ ।  
তাই হ'ল,  
ইলাবাসে কত কুঁড়ি, কত ফুল ।  
তারি মাঝে লীলা ফুটে উঠে'  
ঠিক হ'পুরে পড়ল ঝ'রে ।

আবার কাঁদে মিতানি,  
 কাঁদে মিতা  
 ইলাবাসে ব'সে লীলার জন্য ।  
 বেলা প'ড়ে এল ;  
 মিতানি হঠাৎ ব'লে উঠল—  
 যাই তাদের ফিরিয়ে আনি ।  
 সেই যে গেল, আর ফিরল না ।  
 ইলাবাসে ব'সে মিতা এবার কাঁদে  
 একা একা ।  
 কাঁদে আর কবিতা লেখে ।  
 দারুণ দুর্যোগ দিনান্তের —  
 আসন্ন সন্ধ্যাকার !  
 সহসা বেরিয়ে পড়ল মিতাও,  
 ইলার খোঁজে  
 লীলার খোঁজে  
 মিতানির খোঁজে ।  
 এবার যখন গেলাম ইলাবাসে,  
 মিতার সঙ্গে দেখা হ'ল না ;  
 দেখে এলাম—  
 বেলি চামেলীর ঝাড়ে ঝাড়ে কাঁদছে  
 আগামী বসন্তের নূতন কুঁড়ি,  
 আর, ইলাবাসের পাকা গেটে—  
 শিলাসনে কাঁদছে—ইলা !  
 দু'গেট বেয়ে ঝরছে—  
 কত কত বিগত বর্ষার  
 ঝরা জুঁই ।

চৈত্র : ১৩৫৪

.



## প্যাথিবিত্রাট

সনাতন সার্বভৌমের একমাত্র কণা ভারতী ;  
সারা পল্লীর দুলালী সে,  
তারই হ'ল সঙ্কটাপন্ন পীড়া ।  
পাড়াতেই থাকেন—হুঃখহরণ আয়ুর্বেদরত্ন মহাভিষকশাস্ত্রী,  
তিনিই নিলেন চিকিৎসার ভার ।  
তাইতো,—সুষ্মা পিঙ্গলা ঝেঁড়া  
ত্রিনাড়ী আশ্রয় কোরে ত্রিদোষজ পীড়া !  
চলতে লাগল দীর্ঘদিন যথাশাস্ত্র চিকিৎসা ।  
বটিকা চূর্ণ কষায় আসব  
ইত্যাদি সব বিবিধ মহৌষধি ।  
কিন্তু রোগের মেলে না অবধি,  
সে নিত্য চলে বেড়ে ।  
শাস্ত্রী বল্লেন,—আছে বটে—  
চরকে সূক্ষ্মে বাগ্ভটে  
অসাধ্য ব্যাধিরও শাস্ত্রীয় ঔষধ ।  
উপস্থিত অবস্থায় প্রয়োজন—ক'টি নপুংসক ছাগ  
আর যথাবিধানে করতে হবে তাদের বধ ।  
তারপর যা যা কর্তব্য  
সে সব আমিই করবো,  
তোমরা কেবল  
কৃষ্ণপক্ষে পূর্বফাল্গুনী নক্ষত্রে  
উত্তরাশ্র হ'য়ে, স্বামীশ্রী একত্রে,  
পদ্মপত্রে যে জল  
করছে সদাই টলমল,  
সেই জল করবে সংগ্রহ ;  
সঙ্গে সঙ্গে দেখতে হবে—কণ্ঠার জন্মগ্রহ,  
মিলিয়ে নিয়ে রাশি গণ  
যথাযথ শাস্তিস্বস্ত্যয়ন সাজ কোরে,

ত্রিকটু ত্রিফলা পঞ্চতিক্ত দশমূল  
শালপানি বেড়েলা ইত্যাদি  
সদ্যতোলা চৌষট্টি মশলাযোগে  
পরম শুদ্ধাচারে,  
যে মহাভেষজ হবে প্রস্তুত,  
তাতেই হবে সফল ;  
আর সে ফল হবে—অত্যাশ্চর্য অদ্ভুত !

এত দিন রোগী টিঁকবে কিনা  
সে সন্দেহ স্বতই উঠল সনাতনের মনে ।  
ডাকলেন তিনি বিলাতীডিগ্রিধারী  
পশ্চিমপাড়ার ডাক্তার মিষ্টার গনকে ।  
কব্‌রেজ মশাই স্মতরাং গেলেন চটে ;  
মনে মনে বল্লেন—বটে !  
তবে পাড়াপড়নী, আত্মীয়তার স্থান,  
আসেন, নাড়ী দেখে যান ।

চিকিৎসা করছেন ডাক্তার গন্ ।  
খাঁটি বৈজ্ঞানিক চিকিৎসা,—  
মলমূত্র রক্তপরীক্ষাস্তে  
রোগটা যখন পারা গেল জানতে,  
চলতে লাগল—  
নানা ঔষধ প্রলেপ পট্টি বিবিধ ইন্‌জেক্‌সন ।  
কিন্তু রোগ গেল এমনই বেড়ে  
যে রোগীর ধাতই এল ছেড়ে ।  
গন্ বল্লেন—হার্টের যা অবস্থা, তাতে  
যে ট্যাবলেটে হবে স্মনিশ্চিত ফল,  
এক ক্যালিফোর্নিয়া আর মস্কোতে  
তার আছে দুটি কন্ ।

এখানকার আমদানী বা প্রস্তুতি দাওয়াই  
বিশ্বাস হয় না ছাই ।  
ক্যালিফোর্নিয়া বা মস্কো থেকেই আনা চাই ।  
যদি হন রাজি—  
এরোপ্তেনের ব্যবস্থা ইত্যাদি  
সব করতে পারি আজই ।

অত টাকাই বা কোথায় ?  
আর এমন অবস্থায়  
অত দেরি সহিবে কিনা রোগীর  
স্বতই সন্দেহ হ'ল সনাতনের মনে ।  
নিরুপায় হ'য়ে ডাকলেন  
ভিন্নপাড়ার হোমিওপ্যাথ একজনে ।  
ডাক্তার গন্ গেলেন খুবই চটে ;  
মনে মনে বল্লেন—বটে !  
তবে ধবরাধবর নিয়ে থাকেন,  
মেয়েটার আর কত দেরি  
জনে জনে শুধিয়ে দ্যাখেন ।

বন্ধ হ'ল রঙিন দাওয়াই প্রলেপ ইন্জেকশন্ ;  
চ'লতে লাগলো সূক্ষ্মশক্তি উচ্চ ডাইলিউশন্  
তুচ্ছ খাঁটি জল ।  
তাতেই কিন্তু মনে হ'ল  
একটু আধটু ফল ।  
শুনে, কবিরাজ উঠেন হেসে, ডাক্তার করেন ব্যঙ্গ,-  
এই রোগেতে হোমিওপ্যাথি ।  
হায় রে কপাল,  
হাতে ঠেলবে হাতী ?  
যে কারণেই হোক—  
শেষে হাতী কিন্তু নড়ে !

হুগুাধানেক পরে রোগীর নাড়ী এল ফিরে,  
প্রলাপ থেমে জ্ঞানের কথাই কর ;—  
পাড়াসুন্ধ সবাই বলে—  
হোমিওপ্যাথির জয় !

এরই কদিন পরে আমি এলাম গ্রামে ফিরে ।  
সকল কথা শুনে দেখতে গেলাম ভারতীরে ।  
শীর্ণশ্রী শক্তিহারা দেহ  
সদ্য ফিরে পাওয়া প্রাণের টাটকা হাসিটুকু  
জাগায় বুকে সশঙ্কিত স্নেহ ।

মনে হ'ল,—  
কি বাঁচাটাই বেঁচে গেছে এবার—  
এখন শুধু প্রয়োজন এর,  
সুপথ্যের, আর অক্লান্ত সেবার ।

বাড়ি ফিরতে পথে হ'ল দেখা,  
গঙ্গান্নান সেরে  
মহাভিষকশাস্ত্রী ফিরে আসছেন একা ।  
কথা উঠল ভারতীর ;—  
বেঁচেছে না ছাই !

মকরধ্বজ দেওয়া ছিল,—তাই ।  
মাসখানেক বড় জোর,  
তারপরেই দেখতে পাবে  
কি যে ঘটে ওর ।

নাড়ীতে জ্বর লেগেই আছে ;  
ভায়া, নাড়ী বোঝা চাই ;  
ইনি উনি যিনিই হ'ন না  
নাড়ীজ্ঞান তো নাই ।

নমস্কার ক'রে যাচ্ছি চ'লে ;  
 দেখি—চলেছেন ডাক্তার গন্  
 জরুরী এক কলে ।  
 আমার দেখে বল্লেন—কবে এলেন ?  
 সনাতনের মেয়ের কথা বোধহয় শুনেছেন ।  
 আহা, কোয়াক্ ডেকে মেয়েটাকে মেরে ফেলো ওরা !  
 আমি ত সব দেখছি আগাগোড়া,—  
 ভিটামিনের অভাব ওর শুকিয়ে দিলে টিসু ;  
 এখন যত পিপু এবং ফিসু,  
 বলছে,—মেয়ের রোগ গিয়েছে সেরে !  
 ফুঃ,—গেছেই যদি সেরে  
 এক হপ্তার উপর হ'ল  
 ভাত খাচ্ছে, দুধ খাচ্ছে,  
 উঠ'ল না কই ঝেড়ে ?  
 সেই যে গোড়ায় দেওয়া ছিল ডি. ডি. ইন্জেকশন,  
 তাই এখনো টি'কে আছে,  
 হুঃ,—কতক্ষণ ?

ঘরে ফিরে উঠ'ল মনে নানা কথার চেউ,  
 মেয়েটা যে বেঁচে আছে, হয়ত বেঁচে গেছে,  
 কি কবিরাজ, কি ডাক্তার ; খুশি নয়কো কেউ  
 দুজনাতেই চাইছে ওরা বাক্যকায়মনে  
 হোমিওপ্যাথির বাঁচা রুগী  
 মরবে কতক্ষণে ।

বৈশাখ : ১৩৫৫

## স্বপ্নিলোক

স্বপনে দুঃস্বপ্ন ভাঙি’

কাঁদিয়া উঠি কহিলু আমি—

স্বপ্ন তবে সত্য ? তুমি নাই !

বুলায়ে হাত সাঙ্ঘনিয়া

গভীর স্নেহে কহিলে প্রিয়া,—

ছি ছি ছি, অত অধীর হ’তে নাই ।

বক্ষে মুখ লুকায়ে কহি—

কেমনে বল শাস্ত রহি ?

তোমাতে শেষে হারাতে যদি হ’লো !

অসহ মম এ জাগরণ,

কর গো এরে দুঃস্বপন,

ও-মুখ হ’তে নাই-এর ঢাকা খোলো ।

ঘামিয়া ওঠা ললার্ট’পরে

আঁকিয়া স্নেহ ওষ্ঠাধরে

কহিলে তবে এবার আমি যাই ;

পরম সেই পরশ-ঘাঘ

চমকি’ ঘুম ভাঙিয়া যায ;

দেখিলু—আছ, যদিও পাশে নাই ।

স্বস্তিভরে দুর্গা স্মরি’

উঠিয়া বসি শয্যা’পরি,

পড়িল মনে গিয়াছ তুমি দূরে ;

চলিয়া গেছ—কদিন পরে

আসিবে ফিরি আপন ঘরে

শৈশবের স্বজন-ঘর ঘুরে’ ।

সহসা বুকে শঙ্কা জাগে—

স্বপ্ন, যেটা ভাঙিল আগে,

সেটা না এটা সত্য ? কেবা জানে ?

অঘোর যার ঘুমের গাঙে

স্বপন-মাঝে স্বপন ভাঙে

জাগার তার কি আছে হার মানে ।

এই যে গিয়ে ঘুরিয়া আসা

এ বাসা হ'তে আরেক বাসা

যেমন ভাবে গিয়েছ তুমি মম ।

এ দেহে কিবা বিদেহে হোক

সবই কি নয় সৃষ্টিলোক ?

স্বপন-মাঝে স্বপন-ভাঙা সম ?

শ্রাবণ-নিশি স্বপনে দেখে—

কৃষ্ণাশনী অরুণ মেখে

ধূসর হয়ে উষায় মিশে যায় ।

চলন্ত মেঘাস্তরালে

জড়িয়ে পাখা জ্যোছনাজালে

কাতর চাঁদ উপায় নাহি পায় ।

অগণ-দুঃস্বপন-ছাওয়া,

ঘুরিয়া আসে ঘুমের হাওয়া,

শূন্য শেজে নয়ন আসে বুঁজে ?

স্বপন হ'তে স্বপনে যাই,

তোমারি কাছে তোমারে চাই ।

‘নাই’-এর মাঝে ‘ধাকা’রে মরি খুঁজে ।

সত্য হও সত্য হও,

তুমি ত শুধু স্বপনই নও,

তপনরূপে ভাঙাও মম সৃষ্টি ;

দীপ্ত তব কিরণ লেগে,

জাগুক বেলা শ্রাবণ-মেঘে,

লাগুক মুখে আলোকময়ী মুক্তি ।

শ্রাবণ : ১৩৫৫

## গোটা কয়েক টাকা

মাসিক আরও গোটা কয়েক  
টাকার অভাবে  
তিতো ক'রে দিলাম প্রিয়র  
অমন মিঠে স্বভাব

হুঃখ আমার কোথায় ফেলি ?  
বাগানভরা জুঁই চামেলী  
পরসাভাবে ফেলছে ঢাকি',  
বিস্বাধরের তেলাকুচো ;

কামিনীর কেয়ারি-ঝাড়ে  
বনের উচ্ছে লতিয়ে বাড়ে  
সহকারের মাধবী আজ  
নিমগাছে হ'ল গুলুঞ্চ ।

শিউলি ফুলের গোড়ে গাঁথা  
স্থগিত রেখে বর্তমানে  
চলছে দাওয়াই শিউলিপাতা-  
ছেঁচা রসের অনুপানে ।

আছে বটে মধুর ছিটে,  
তিতো তাহে হয় কি মিঠে ?  
নাটার ডাঁটার সুখ-তানিতে  
যে সুখ তা রসনাই জানে ।



এক টাকারও ঘাটতি পূরণ  
হয় না করলে হৃদয়-ফুরণ ;  
একটি চিঁড়েও ভেঙ্গে না হয়

লক্ষ কথায় জল-অভাবে ।

থুতু দিয়ে ছাতুমলা  
আড়িয়ে শুধুই যায় যে গলা  
উগরে তারে ফেলতে নারি,

ভিতর দিকেও কই বা নাবে ?

সন্দেহ নেই সেই প্রয়াসেই  
এবারকার এই প্রাণটা যাবে ;—  
হায়রে, মাসিক গোটাকয়েক  
টাকার অভাবে ।

অ বিণ: ১৩৫৫

## খোলা কথা

সুখালে তো কহি প্রিয়,  
অপরাধ নাহি নিও,  
যৌবন গেছে—গেছি বেঁচে ।

তোমার প্রেমের ভার  
দিবা রাত্তি বহিবার  
গুরু দায় আজ ফুরিয়েছে ।

এই দেহ এই মন  
সাজিয়েছি অমুখন  
তোমার মনের মতো করি',  
পাছে তুমি পাও ব্যথা,  
কয়েছি স্মৃতিরই কথা  
গতনিদ কত বিভাবরী ।

জাগর ক্লাস্তি ভুলি',  
লইয়া পায়ের ধূলি  
দিনের সেবায় দিছি মন ।

কত কাঁটা পা'র পা'র,  
ঢেকেছি তা আলতায়,  
গঞ্জনা করি আভরণ ।

কহিনি মনের সাধ  
ঘটে পাছে অপরাধ,  
তুমি যে সদাই ক্ষুধাতুর :

দেহ দিয়া প্রাণ দিয়া  
সাজিয়া প্রাণপ্রিয়া  
সুধায় ক'রেছ ক্ষুধা দূর ।

শুকায়নি ভিজে চুল,  
 তবু তাহে গুঁজি ফুল  
                     রচিয়াছি সাঁঝের কবরী ।  
 না সারি হাতের কাজ  
 ক'রেছি রাতের সাজ  
                     তোমার রজনী দিতে ভরি' ।  
 বাড়াতে তোমারি মান  
 করিয়াছি অভিমান  
                     হু'নয়নে ভরি' জলে ছলে ;  
 কতু সাজি' অপরাধী  
 চরণে পড়েছি কাঁদি'  
                     তুমি তাই ভালবাসো ব'লে ।  
 ভুলিয়া স্বজনগণে  
 জপিয়াছি একমনে  
                     এ প্রাণ তোমারে শুধু চায় ;  
 উজাড় করিয়া তমু  
 কত ফুলই যোগায়মু  
                     মংলা গাঁথি' পরাতে তোমার ।  
 জীবন করিয়া ক্ষয়  
 সযতনে সঞ্চয়  
                     ক'রেছি তোমারি যত দান ।  
 সকল বেদনা ভুলে  
 হাসিয়া দিয়েছি ভুলে  
                     তব কোলে তব সম্ভান ।  
 বার বার মা হবার  
 ব্যথা নহে বুঝাবার,  
                     তাও হার দিবে যার ফাঁকি ।  
 সহসা চোখের জলে  
 ধুয়ে যার পলে পলে  
                     হৃদয় শোণিতে যারে আঁকি ;

লালন-পালন ভার  
 সেও নহে বুঝাবার  
 কত দুধ কত জাগরণ !  
 এক বৃকে ছেলে জাগে,  
 আর বৃক বাপে মাগে,  
 যুবতীর এহি যৌবন !  
 যে প্রেম যে যৌবন  
 পুঁথি পাতে স্নলোভন  
 জীবনে তা কোথায় বা রহে ?  
 যে দুঃস্বপ্ন ঘোর  
 বহিষ্ণু আকৈশোর  
 যৌবন তারেই তো কহে ।  
 সেই যৌবন তরে  
 পরম আকুতি ভরে  
 তিলেক সহনি বিচ্ছেদ ।  
 পড়িয়া ধাঁধায় তার,  
 হায় বিধি বিধাতার,  
 প্রেম ব'লে চলে নারীমেধ ।  
 সেই যৌবন মম  
 সেই প্রেম, প্রিয়তম,  
 চ'লে গেছে তুমি কাঁদো তাই ।  
 আমি যে বেঁচেছি প্রিয়,  
 দু'পায়ের ধূলা দিও,  
 তারে আর ফিরিয়া না চাই ।  
 যৌবন নিবাইয়া  
 যে বিধি জুড়ালো হিয়া,  
 সে বিধি নারীর হিতকারী ।  
 যদি পায়ের ধাক্কে মতি,  
 যদি আমি হই সতী,  
 আর যেন নাহি হই নারী ।

ভাষ : ১৩৫৫

নিশান্তিকা

## সুখভোগ

বহু সুখ ভালে লিখিলে বন্ধু,  
লিখিলে না সুখভোগ,  
সাথে বেঁধে দিলে শিব-অসাধ্য  
বিদ্যুটে এক রোগ ।  
হোমিও-ঘুমিও-এ্যালো-জল-প্যাথি  
আয়ুর্বেদের ঘটে অখ্যাতি,  
কিছুতে কাটে না এ ভুতুড়ে ব্যাধি  
যত ঝাড়ি তত বাড়ে,  
সর্ষের মাঝে আছে বসিয়া যে  
সর্ষেরে সে কি ছাড়ে ?

হয়তো পুণ্য ছিল কোন কালে—  
সম্মত অন্ন লিখিলে কপালে,  
জুটে নিয়মিত সন্ধ্যা সকালে  
ধোঁয়ানো ছুধের বাটি !  
সে স্বতন্ত্রের প্রতি গ্রাসে গ্রাসে  
যত নিরন্ন মুখ মনে আসে,  
চুমুকে চুমুকে ছুধের ছেলের  
ক্ষুধার কান্নাকাটি ।

এ মোর অন্ন কোন নিরন্ন  
জানায় নি প্রতিবাদ ।  
রসনা-তোষণ ভোজনায়োজন  
তবু লাগে বিশ্বাস ।  
কেহ কহে ইহা হুঃখবাদ গো  
কেহ বা বায়ুব্যাধি ।  
হুখে হুখ পাই, সুখে সুখ নাই,  
মুখে হাসি বুকে কাঁদি ।

মধুমালতীর মঞ্চ আমার  
এসেছে ফুলের বান,  
দধিন হাওয়ায় দোল দিবে যায়  
উঠে ঘন সূত্রাণ ।

তঘীরা যেন স্তনভারানতা—  
ফুলভারে হলে মালঞ্চলতা,  
বসি' তারি তলে সকালে বিকালে  
অবসর মোর কাটে ।  
ঈর্ষাকাতর—পথিকেরা চলে  
ধূলি ধূসরিত বাটে ।

তারা তো জানে না সে ফুলের বানে  
ভেসে চলি আমি কোন্ সে শ্মশানে  
ঝরা কুসুমের মবা মুখগুলি  
সারি সারি যেথা শুষে ।  
কত ফাগুনের স্থলিত পাতাব  
ছেঁড়া-কাঁথা-পাতা ভুঁষে ।

এ সূধের হাতে দিন মোর কাটে  
সূধপরধের হুখে,  
যে ব্যথা আমার নহে আপনার  
সেই ব্যথা কাঁদে বুকে ।

যে প্রেম, বন্ধু, সুন্দর লাগি  
চিত্ত গহনে হয়েছে বিবাগী  
মাঝে মাঝে ভাবি ছেড়ে ছুড়ে সবই  
কিরি তারি সন্ধানে ।  
পিছনে তাতল সৈকতে বারি—  
বিন্দু সমেরা টানে ।

তোহে বিসরিয়া সব মন তাহে  
করিনি সমর্পণ,  
তাই দোটার প্রাণ বাহিরায়,  
কি কাজে লাগি এখন ?

স্বভমিতদারা খুশি নয় তারা  
ভুমিও তো খুশি নয়,  
হুঁহু হবে বাম মম পরিণাম  
দ্বিগুণ নিরাশা নিশ্চয় ।

স্বধের সাগরে মিলে না সঁতারি  
দুখ মিটার এক ফোঁটা বারি  
অসহ তিয়াস ঘন বহে শ্বাস  
দুটি বাহু বলহীন,—  
ঝুটার পিছনে খাঁটির মাতাল  
ছুটে বল কত দিন ?

চৈত্র : ১৩৫৫

## ভাঙন পথে

শীতলডাঙার রাঙা মেঘেব

তনুব ভাঙন বেধে

উঠলে কুলে চিকুব-কালো

শাঙন গাঙে নেযে ;

সত্ত ফোটা কাশের ফুলে

যে পরিহাস উঠছে হলে

সঁপির মতো অপরিসর

পথেব দুপাশ ছেযে,—

তার মাঝে আজ ওগো কবি

মিথ্যে খোঁজাখুঁজি,

মিলবে না আব হাবিষে যাওয়া

ফাঙন রাতের পুঁজি ।

যাওগো কবে যাও ।

ওই ভাঙনের পিছল পথে

শাঙনে ডুব দাও ।

আষাঢ় : ১৩৫৬



## হেন প্রীতি

এ বয়সে হেন প্রীতি কভু নাহি শুনি,  
বুক পাতি' মাগি লয় বুকের আঙুনি ।  
ক্ষীণ দিষ্টি ভরি' হেরে ধরিয়া চিবুক  
ব্যথাবিমধুর বলি-বলয়িত মুখ ।  
কে জানে কি আছে দুটি জরাভরা দেহে,  
জুড়ায় একের দাহ অপরের স্নেহে ।

এ উহারে দেখে যেন কভু দেখে নাই,  
এই বুঝি শেষ দেখা ভাবে হুজু নাই ।  
কেবা কারে আগে ছাড়ে ভয়ে কাঁপে প্রাণ,  
নিমিধ না ফুরাইতে যুগ অবসান ।  
কুশ তনু ছরু ছরু ক্ষীণ বাহু ডোরে  
দীপমুখে শিখা যেন মধুনিশি-ভোরে ।  
বিস্মিত যৌবন জানায় প্রণাম ;  
কবি কহে, হেন প্রীতি এই দেখিলাম ।

আষাঢ় : ১৩৫৬

## চোখোচোখি

সারাটি রজনী জাগিয়া কাটালো কবি

চাহি ঘুমন্ত প্রিয়ার মুখের পানে,  
সুপ্ত প্রিয়ার স্বপন রাঙিয়া কবি

‘জাগো জাগো জাগো’ সাথে গুঞ্জন গানে ।

ভোর হ’য়ে এলো ঘুমে ঢ’লে পড়ে কবি,

রাঙা তনু মোড়ি’ জাগিয়া বসিল প্রিয়া,  
অরণ্য নয়নে সাধি’ কহে—‘ওগো কবি,

জাগো জাগো জাগো, কেন হেন ঘুমাইয়া ?’

দিবস রজনী যাপে পাশাপাশি

কবি আর তার প্রিয়া

কত অনুরাগে এ যখন জাগে

ও তখন ঘুমাইয়া !

চোখোচোখি নাহি হয় ;—

সে ব্যর্থতার ছঃসহভার

বিশ্বভুবনময় ।

কবি আর তার পরাগ-প্রিয়ার

মিলনের ব্যবধান

কাণ্ডনের ফুলে শাওনের কুলে

গাঁথে বেদনার গান ।

এ নহে কথার কথা,—

একজোড়া বৃকে কাঁদে অধোমুখে

ত্রিভুবন জোড়া ব্যথা ।

আবাহ : ১৩৫৬

## হাসি

বর্ষা-অস্তে আজ  
শরৎ প্রাতে  
সখা তোমার সাথে  
শার- দীয়োৎসবে  
মোর হাসতে হবে,  
হাসি আনুক বা না আনুক  
উচ্চরবে  
হাহাঃ হাসতে হবে ।

বর্ষার শেষে তব  
শরৎ আসে ।  
সখা মোর সংবৎসর—  
মোর বারোমাস।  
হায় একই সমস্তা ও  
একই সমাস ;  
সেই নিত্য অভাব—  
খাঁটি অব্যয়ীভাব !  
আর ধনে ও ধাত্তে তুমি  
বহুব্রীহি ।

তাই বিকট মিহি  
হিহি হিহিঃ হিহি—  
যদি হেসে উঠি প্রাণপণে  
তোমার হাহাঃ সনে,  
বেয়াদবি হ'ল ব'লে  
জবাবদিহি  
মোর করতে হবে কি  
ওগো বহুব্রীহি ?

যে হাসি হাসতে গেলে  
 মাথা হয় হেঁট  
 তবু                    যে হাসি না হাসলেও  
                           ফুলে উঠে পেট,  
 আজ                    সে হাসি পেয়ে  
 ঘোর                    'বিষম' খেয়ে  
 যদি                    কাসতে কাসতে মোর  
                           শ্মশ্রু বেয়ে  
 ঝরে                    অশ্রু-বারি,  
 আর                    হাসির চোটে  
 চোখ                    কপালে ওঠে,  
 তবে                    করুণা করি'  
 ওগো                    পরাণ প্রিয়  
 হাসি                    মুছিয়ে দিও ;  
 দেখো                    এত কাল কেঁদে  
 শেষে                    হেসে না মরি ।

তোমার কেটেছে মেঘ  
 হাসছ—হোহোঃ  
 আমার কাটেনি আজও  
 শনিগ্রহ ।

তবু                    তোমার দেখে  
 ছাখো                    পড়ছি বঁকে  
 ঘন                    হাসির ঝাঁকে  
 বুক                    নামে ও ওঠে,  
 ফিক্                    লাগছে কঁকে  
 কাট                    ধরছে ঠোটে ।  
 ওহো                    হাসির মোহ !  
 তুমি                    হাসছ ব'লেই  
 আমি                    হাসছি হোহোঃ ।

ধিল্ ধিল্ ফিক্ ফিক্  
 মুচকি হাসা,—  
 ভাই এবারের মত শেষ—  
 সে সব আশা ।  
 ওই নবনীল নভতলে  
 মানাগাঁথা বকে হাঁসে  
 জলে থলে সেই হাসি  
 কমলে কুমুদে কাশে,  
 সে হাসিরও ধার  
 আন্নি ধারিনে তো আর ;  
 তাই হোহো—হাসি  
 হিহি—হাসি  
 হাসি—হাহাকার ।  
 মোর এ হাসি দেখে  
 আরো হাসল কে কে,  
 ওগো বন্ধু আমার,  
 সে হি— সাব রাখে কে ?  
 শেষ হাসির কথা  
 শোন হাসতে হাসতে  
 হ'লো কপাল ব্যথা,—  
 এলো জ্বর ধবর  
 নমঃ শারদীয়ায়ৈ—  
 কাঁচা ধান ডুবেছে ও  
 পাকা ধানে মই ।

শ্রাবণ : ১৩৫৬

## ভিখারী

খেটেখুটে ফিরি শূন্য কুটারে,  
দেখানা আজ কী অবসন্ন !  
কে তুমি ঠাকুর ? এ অপরাহ্নে  
গরীবের দ্বারে কিসের জন্য ?  
আমার যে নাই কাজের কামাই,  
দাঁড়াও, কাঁধের লাঙল নামাই ।—  
এইবার বল' কি তোমার চাই,  
কে তুমি এ গৃহ করিলে ধন্য ?  
মুখধানি দেখে মনে হয়,—আহা,  
কতদিন যেন জুটেনি অন্ন ।  
এমন শত্রু কে ছিল তোমার  
গলায় জড়িয়ে দিল ভুজঙ্গ ?  
ছেঁড়া বাঘছাল বাঁধিয়া কটিতে  
ভস্মে লেপিল ও কাঁচা অন্ন ?  
মরি মরি, ওকি কাস্তুর ঘায়  
কপাল কাটিয়া লোহ বাহিরায় ?  
এ দশা হ'ল কি বায়ুন-পাড়ায় ?  
তাই খুঁজিতেছ চাষার সঙ্গ ?  
ভূতের মতন পারের ছোঁড়ার  
দূর হতে সব দেখিছে রঙ্গ ।  
বিহানের ফোটা পদ্বের মতো  
হাত পেতে তুমি মাগিছ ভিক্ষা,  
নাই কাঁধে ঝুলি হাতে করঙ্গ,  
ভিখারী হবারও হয়নি শিক্ষা ?

মুঠো ভ'রে যদি চাল দিই ভাই  
হুটিয়ে থাকে যে সে ক্ষমতা নাই,  
হেন নিরুপায়ে ঘরছাড়া ক'রে  
কোন ঠাকুরাণী লয় পরীক্ষা ?  
কেমন সতী সে এমন পতিরে  
দিল ভবঘুরে হবার দীক্ষা ?

দেখিনি এমন পরমদুঃখী,  
জন্মও হেন বোকার বংশে,—  
নীল হ'য়ে আহা উঠেছে কণ্ঠ  
বুকে-তুলে-রাখা সাপের দংশে ।  
মরি মরি মরি তুলে পড়ে আঁখি,  
ও বিষ হজম, কথার কথা কি ?  
আহা-হা এ দশা যে করিল তব  
দেখাতে পার কি সেই নৃশংসে ?  
বুকে নিই তারে,—আমারো জন্ম  
গোয়ার বলাই চাষার অংশে ।

যাই হোক ভাই, কোন ভয় নাই,  
রোজা ডেকে বিষ নামায়ে নিব,  
কপালের ক্ষত শুকাবে দুদিনে  
স্নিগ্ধ প্রলেপ বাঁটিয়া দিব ।

বাঘছালখানা ছেড়ে ফেল ভাই,  
ধুয়ে মুছে দিই অঙ্গের ছাই,  
মারিয়া তাড়াই সাপের বলাই  
সকল অশিব হইবে শিব ।

লক্ষ্মীটি হ'য়ে লহ যদি সেবা  
তবে তো বুদ্ধি প্রশংসিব ।

ভাল হ'য়ে ওঠো,—দুজনে মিলিয়া  
 লেগে যাব মোরা ক্ষেতের কাজে,  
 মুখখানি বুঁজে সহো যত ব্যথা  
 ভুলেও সে কথা তুলিব না যে ।  
 পরম্পরের দুখ লব বেঁটে  
 বর্ষা ও ধরা সমভাবে খেটে  
 সোনার ফসল ফলাব যখন  
 রব উঠে যাবে গাঁয়ের মাঝে ।  
 ছি ছি ভাই, এই জোয়ান বয়সে  
 ভিক্ষা করা কি তোমার সাজে ?  
 আর যদি তোরে না পারি সারাতে,  
 দুঃখের বোঝা নামাতে নারি,  
 দুয়ার হ'তে কি, ওগো অসহায় ,  
 চাল-মুঠো দিয়ে ফিরাতে পারি ?  
 সংসারে মোর আছে আর কেবা,  
 জীবন কাটা'ব করি' তোরি সেবা ;  
 দেবতা মানুষ ক্যাপা কি ভিখারী  
 যাই হোস্ মোরে যাসনে ছাড়ি ;  
 সকল ব্যথার ব্যথিত দেখিয়া  
 দুটি চোখ আজ হ'ল যে ঝারি ।

শ্রাবণ—১৩৫৬



## বৃন্দাবনে

একদা তুমি অঙ্গ ধরি ফিরিতে গোপ-গোকুলে  
দেবেরও দুর্লভ্য দেবতা ;

যখন খুশি দেখিত যে-সে মাঠে বাটে নদীকূলে,  
শিহরে দেহ স্মরিয়া সে কথা ।

নগ্ন তনু কটিবসনে আঁটিয়া, করে পাচনি  
রাখাল সনে করিতে রাখালী,

সন্ধ্যা হ'লে ফিরাতে গাভী গরীব গোপ-বাছনি  
যমুনাঙ্গলে গোধূলি পাখালি' ।

ভাবিত মাঘ মন কি যায় এমন ছেলে পাঠাতে  
রোদে ও জলে গরুর পিছনে,

ভাবিত পিতা গোয়াল। যদি না খাটে বাপ-বেটাতে  
মরিতে হবে অন্নবিহনে ।

লুকু ছেলে স্বেযোগ পেলে খাইতে ছানা নবনী  
ক্ষুধার দায়ে লুকায়ে চুরায়ে,

পড়িলে ধরা প্রহার দিত ধৈর্যহারা জননী,  
পড়িতে কেঁদে ধুলায় গড়ায়ে ।

খেলনা ছিল বাঁশের বাঁশী বাজাতে বসি' বিপিনে,  
শুনিত ধেনু শম্প-কবলে,

বাহবা দিত রক্তভরে, তুমি যে কে তা না চিনে,  
মিলিয়া যত সূদাম-সুবলে ।

এমনি তব কাটিত দিন গোপনে গোপ-ভবনে  
সুখে ও দুখে হাসিয়া কাঁদিয়া

খুঁজিত যত ধ্যানী ও জ্ঞানী মন্দিরে তপোবনে  
কত না শত মন্ত্র ফাঁদিয়া ।

সহসা কবে না জানি সাড়া জাগিল সারা গোকুলে,  
বাঁশরীরবে শিহরে বনানী !

কুহরে পিক, বিহরে অলি মালতী টাপা বকুলে,  
যমুনাঙ্গল বহিল উজানি' !

কুল্ল নীপ বাড়ায়ে ছায়া দাঁড়াল পথ-কিনারে ;  
বধূরা চলে ভরিতে গাগরী,  
গায়ের যত আহীরী মেয়ে এ দেখে চেয়ে উহারে,  
সহসা সবে রূপসী নাগরী !

চিরকিশোর হেরিয়া যত হৃদয় হ'ল কিশোরী,  
উথলে প্রেম আকাশে বাতাসে,  
বাজিছে বাঁশী দু'কুল নাশি', ক্ষুধা ও তৃষা বিসরি'  
ছুটেছে সবে রুদ্ধ নিশাসে ।

বৃন্দাবনে স্তম্ভরের চলেছে নিতি আরতি,  
জানে না কেহ সে কথা বাহিরে ;  
মথুরাপুরে রচিত হবে যে যুগ-মহাভারতী  
সেদিনও তার চিহ্ন নাহিরে ।

সেদিন শুধু বৃন্দাবনে কামুর বেণু শুনিয়া  
সখা ও সখী সঁপিছে তনুপ্রাণ,  
ঋষির মুখে সেদিনও কোথা উঠেনি বাণী ধ্বনিয়া—  
কৃষ্ণস্ব স্বয়ং ভগবান !

ধরি মদনমোহন তনু কিরিছ বৃন্দাবনে,  
মরি গো মরি ধ্যানের দেবতা !  
যখন খুশি দেখিত যে-সে পথে ঘাটে উপবনে,  
কাঁদিয়া মরি ঋনিয়া সে কথা ।

কাঁদিয়া মরি জড়ায়ে ধরি' পাথরে গড়া চরণে,  
পাষণ বৃকে কুসুম ছলিয়ে,

কাঁদিতে থাকি মুরতি আঁকি অদেখা রূপ স্মরণে  
স্বপন দিয়ে আপনা ভুলিয়ে ।

ছন্দ বাঁধি' মরিছে কাঁদি যুগে ও যুগে কবিরী  
রচিয়া গানে তোমারি কাহিনী,  
ফুকরি কঁাদে গুমরি সাথে মুরলী বীণা অধীরা,  
ভকত-আঁধি অশ্রুবাহিনী ।

মিলে' না দেখা স্নহরের কিছুতে কোথা ভুবনে,  
বিশ্ব ভরি' গুমরে সে ব্যথা,  
যখন খুশি দেখিত যে-সে যে-রূপ বৃন্দাবনে  
সে আজি শুধু ধ্যানের দেবতা ।

অগ্রহারণ—১৩৫৬

## ও অশথ !

ও অশথ, বাংলে দে পথ,—  
কেমন ক'রে এমন হয়

হু হু হু চৈতি বায়ে  
জরাজর্জর গায়ে  
সহসা কি পুলকে  
ছলে উঠে কিশলয় !

তোর দলে দলে কিশলয় !  
কেমন ক'রে এখন হয় ?

ফাগুনের ভাঙা হাটে  
সেদিনও পাইনি রে তোর  
অগোনা গাঁঠে গাঁঠে  
বয়সের গাছ কি পাথর ;  
বয়সের সেই গহনে  
চকিতে মন উদাসি'  
বাজাল কেমন ক্ষণে  
কে কিশোর এমন বাশী ?

তোর অঙ্গভরা জীর্ণজরা .  
শ্রামে শ্রামে শামময় !

তোর পথে বসা পাতাখসা  
জীবন হ'ল মধুময় !  
কেমন ক'রে এমন হয় ।

পথিকের পথের বুকে  
হারানো ছায়া ফিরে ।

পাখীরা কলসুখে  
ফিরে ফের শাখানীড়ে ।

ফিরে সেই বুরু বুরু  
চলে নাচ দিনে রেতে  
পুরানোর পাঁজর বাজে  
নতুনের পায়জোড়েতে ।  
মহাকাল হ'য়ে নাকাল  
মানে আপন পরাজয় ।  
কেমন ক'রে এমন হয় ?  
ও অশথ !

চৈত্র—১৩৫৬

## একলা ঘুমো

মিছে নাক ডাকাস্ নে আর  
আসবে না সে ডাক শুনে কেউ,  
একলা ঘুমো ।

ঘুমো তুই, একলা ঘুমো রে !  
একলা ঘুমো একলা ঘুমো  
একলা ঘুমো রে !  
ঘুমো তুই, একলা ঘুমো রে !

এ পথের হয় না সাথী,  
কেন এই ডাকাডাকি ?  
এ রাতের নেইকো বাতি,  
মিছে সব হাঁকাহাঁকি ।

আছে তো ছেঁড়া চাটাই, বিছিয়ে নে তাই  
আপন গুমরে—  
ঘুমো তুই, একলা ঘুমো রে !

আধারের পেটের ছেলে  
খুঁজিস আজ আলোর আরাম ?  
তপনের স্বপন দেখিস  
ওরে ও নেমকহারাম !

হ'লি কি—পরের হুমোর চুমোর ভয়ে  
হতুমথুমো রে ?  
ঘুমো তুই, একলা ঘুমো রে— ।

ষে কালোর অন্ধকূপে  
সারাদিন কাটালি রে  
সে কালোই সন্ধ্যারূপে  
তোরে আজ এল ঘিরে ;

যুকে তার—চেতনহারি হুধের ধারা  
যুখে চুমো রে ।  
ঘুমো তুই, একলা ঘুমো রে ।

বৈশাখ—১৩৫৭

নিশাস্তিকা

## দরিদ্রনারায়ণ

দেখে এমু প্যাটকরমে-করমে

গড়ায় গড়ায় নারায়ণ !

ওপার হইতে তাড়ায়ন পেয়ে

এপারে আত্ম-ভাঁড়ায়ন ।

আহা, যত নর হ'ল নারায়ণ ।

শব্দ চক্র গদা ও পদ্য

রাধি কাষ্টম্-ক্ষেত্রে,

অশ্রমোচন কমললোচন

চাহে হরীতকী-নেত্রে ।

ছোলা কলা হাতে সেবকবৃন্দ

ডাকিছে, তোরা কে খাবি আর,

টেউএ টেউএ এসে গাঁদি লেগে ভেসে

নারায়ণ আজ খাবি খায় ।

এবার সেবার স্তবর্ণযোগ,

ধ্বনিত দিক্ দিগন্ত,

দ্রাবিড় বেলুড় মাড়োয়ার হ'তে

ছুটিছে পুণ্যবস্ত ।

যে যেমন পায় কুড়িয়ে নে যায়,

পতিতোক্কার-পরায়ণ ;—

বাংলার আর নর মেলা ভার,

যা আছে সেরেফ্ নারায়ণ ।

সে বারের শোধ নিতে ক্যাপা হর

নারায়ণে তুলে নিয়েছে পিঠে,

ত্রিশূল উচিয়ে খুঁচিয়ে কুচিয়ে—

ছড়াবে নব একাম পীঠে ।

তীর্থে-তীর্থে পাঁজরা কণ্ঠা

দাপনা টেংরি সকলি পাবে,

প্রাণের চিহ্ন কোথাও পাবে না

কন্যাকুমারী আপঞ্জাবে ।

হায় হায় হায় শুধাব কাহায়,—

পদ্মার জল ছিল না কি রে ?

কোন্ মরীচিকা মিটাতে দিল না

মৃত্যুপিপাসা সে স্বাছ নীরে ?

বৈশাখ—১৩৫৭



## বৈত ব্যর্থতা

ইট কাঠ চূণ বালি আনাইয়া গাড়ী গাড়ী  
সারাটা জীবন শুধু গাঁথিমু পরের বাড়ী ।  
কত দুশ্চিন্তাই ঘটাতে বাসের স্লথ,  
আলো হাওয়া জল ত্রেন, পাছে কোন হয় চুক !  
সে সব বাড়ীতে মোর কোন অধিকার নাই,  
পথে পথে খুঁজি আজ মাথা গুঁজিবার ঠাই ।

ছন্দ অর্থ ভাব ঝড়ি ঝড়ি কথা বাছি',  
সকলি পরের তরে, কবিতা যা গাঁথিয়াছি ।  
অশ্রুসাগর সেঁচি' অহেতুক কোঁতুকে  
গাঁথিয়া গাঁথিয়া মালা তুলিয়েছি বুক বুক ।  
হায়রে, 'আমার' বলি সে-বুকের মালা কোথা ?  
যার বিনিময়ে মোর জুড়াবে বুকের ব্যথা ?

বরাত সঙ্গে চলে, কিছু নাই বলিবার,  
মিথ্যে হইলু কবি, মিছে ইন্জিনিয়ার ।

বৈশাখ—১৩৫৭

## বুধাশ্রম

চাষা            ধান বোনে তাই ধান হয়,  
তারার            মিছামিছি মরে খেটে,  
আহা            ভেনে বেড়ে দেহ করে কয়—  
তবে            ভুষের ভেজাল মেটে ।

যদি            তার চেয়ে বোনে ঝাড়া চাল,  
তবে            চুকে যায় সব জঞ্জাল,  
ক্ষেতে            ফ'লে থাকে ধাসা খাঁটি মাল,  
গুধু            রেঁধে বেড়ে ভরো পেটে ।

জ্যৈষ্ঠ—১৩৫৭

ফুলে-ফুলে-গতি

নয় প্রজাপতি

মানুষের প্রতি কি দয়াল,—

একদিন হয়

মালা-বিনিময়

জালাবিনিময় চিরকাল ।

জ্যৈষ্ঠ—১৩৫৭

## দেখা দাও

দেখা দাও দেখা দাও ।

আলো নিবিবার আগে একবার

সুন্দর, মোরে দেখা দাও ।

তুমি র'য়ে গেলে দেখার অতীত

সব কিছু তাই দেখি কুৎসিত,

দেখার এ দোষ যাবে না যদি না

দেখা দাও ।

অপরূপ রূপ আঁধির সমুখে

আপনি যদি না ফুটে

অপরের ডাকা নামে বারে বারে

ডাকিতে কি মন উঠে ?

এস এস এস হে মোর অনামী,

অস্তহিত অস্তর্যামী

নিভতে গোপনে আমি-হ'তে-আমি

দেখা দাও ।

ওগো সুন্দর—তোমারে

দীর্ঘ জীবন কাটে,

মুখে মুখে আর বুক বুক এই

অসুন্দরের হাতে ।

ভাঙা ছেঁড়া কুচো দিয়ে জোড়াতালি

রূপে রূপে শুধু মিলে চোরাবালি,

কুসুম শুকায় চাঁদ ডুবে যায়,—

দেখা দাও ।

গন্ধ ফুকানি' কাঁদে ফুলদল—

‘দেখি নাই, দেখি নাই’ ।

ছন্দ ভুলিয়া কাঁদে মরা নদী,—

‘সে কি নাই, সে কি নাই’ ?

সারা জীবন যে কত কটু কহি’,

কেমনে লুকায়ে আছ সবি সহি’ ?

দুখ দিতে তোমা কত দুখ বহি,—

দেখা দাও ।

কণ্ঠে তোমার—যে মালা ছুলাই

হয় তা শুষ্ক ম্লান,

যে ধূপেই তোমা করি গো আরতি,

ভস্মে সে অবসান ।

এ জ্বালা আমার যায় না কিছুতে

তাই ছুটি মরীচিকার পিছুতে,

সারা জীবনের নয়নাশ্রুতে

চিরসুন্দর, দেখা দাও ।

জ্যৈষ্ঠ—১৩৫৭

## সময়বিৎ

গান যদি তার না ধামাতে পারে  
সমে অর্থাৎ সময়ে  
বুঝিবে কবির মগজ ভর্তি  
গব্যে ওরফে গোময়ে ।

\*

\* \*

সকল বাঁধন ছিঁড়ে দিলে প্রিয়—  
একটি বাঁধন ছাড়া,  
ঝন রণ ঝঙ্কত বীণা আজ  
টুং টাং একতারা ।

\*

\* \*

বাদল-দল। যুঁয়ে  
গন্ধ গেছে ধুয়ে,  
পবন বলে কেন  
এখনো বোঁটা ছুঁয়ে ?

\*

\* \*

পুঞ্জপত্রে স্নিবিড় শ্রাম নিকুঞ্জ সম্ভবা  
গাছভরা রাঙা জবা ।

\*

\* \*

আষাঢ় বরষণে  
ভিজিছে তরুলতা,  
কাননে সারাদিন  
সুন্ধ মুখরতা ।  
সহসা হাহাসুরে  
একক কোন্ পাখী  
জানালো মেঘসুরে  
কি ব্যথা করে ডাকি' ?

গোলাপী চিবুকে দহন আঁকিল  
প্রথম প্রেমের ফুঙ্কি,  
সে বলে পরেছি উষ্ণি ।

\*  
\* \*

ডুবে গেল চাঁদ উবে গেল তারা  
নিবিল নিশার আশা,  
ছিন্নমালার গুঁড় কুসুমের  
গুকাইল ভালবাসা ।

\*  
\* \*

হৃদয় আমার ঘর ছেড়ে যেতে চায়,—  
অজানা চেউএর ঘায়  
নির্জন কূল ভেঙে ভেঙে পড়ে  
সে অতল দরিয়ায় ।

আগে চুরি করে জেল খাটে পরে  
নির্বোধ চোর যারা,  
আগে জেল খাটে পরে চুরি করে—  
সেয়ানা স্বদেশী তারা ।

যে-চুরিতে ভাই জেলখাটা নাই  
না আগে না পশ্চাৎ ;  
নিরীহ আমরা বাণীর সেবক  
তাতেই পাকাই হাত ।

আবাহ—১৩৫৭

## ডুগ্‌ডুগি

ডুগ্‌ ডুগ্‌ ডুগ্‌ ডুগ্‌ ডুগ্‌ডুগি বা...জে ওই,  
ঐ আসে ফেরিয়লা পল্লীর মাঝে ওই,  
রাতের ভিয়ানো তাজা  
নূতন গুড়ের খাজা,  
শালপাতাঢাকা ডালা শিরপরে রা...জে, আর  
ডান হাতে ডুগ্‌ ডুগ্‌ ডুগ্‌ডুগি বাজে তার ।

পল্লীর শিশুদল উন্নয়ন চঞ্চল  
কেউ ছুটে খেলা ছেড়ে, কেউ মার অঞ্চল ;  
কারো চোখ চক্‌চক্‌  
কারো আঁধি ছলছল করছে,  
মার পাশে ফিরে এসে  
কি বায়না ধরছে ।

ডুগ্‌ ডুগ্‌ ডুগ্‌ ডুগ্‌ মাঝে মাঝে থামে ওই,  
মাথার ডালাটি বুঝি নামে ওই ।

কচি কচি মুখগুলি  
ঠোঁটের পাপড়ি খুলি'  
ডালা ঘিরে ভীড় ক'রে কাঁচা রোদে ঘামছে ।  
দুরারে দুরারে ডালা উঠছে ও নামছে ।

গুড়ে খাজা চুষি চুষি কত খুশি কচি মুখ,  
ও বুঝি পায়নি, আহা, কত সর কাঁচা বুক !  
পাকা যারা গৃহকোণে  
সে খুশি কেই বা গোণে ?  
সে ব্যথা কে আনে মনে, হয় রে !  
কচি বুক ডুগ্‌ডুগি চেউ তুলে যায় রে ।

ডুগ্‌ ডুগ্‌ ডুগ্‌ ডুগ্‌ পথে পথে চ'লে যায়,  
জরাজর্জর মোরে কি মন্ত্র ব'লে যায়,—  
খসিয়া যে পড়ে তার  
অস্থিচর্মসার  
দেহভার বাসাংসি জীর্ণ ;  
পলকে চেতনাকূলে  
কৌমার পরে তুলে  
নব তনু মরণোত্তীর্ণ !

দলে দলে চিরশিশু অশ্বরে নাচে ওই,  
ডুগ্‌ ডুগ্‌ ডম্বরু তাতা থৈ তাতা থৈ ।  
স্বলভে ভরিয়া মুঠি  
আনন্দে কুটি কুটি  
হুলভে নাহি লোভ যাহা পায় তাই সই ।  
মেঘ রৌদ্রের ছাঁদে  
এই হাসে এই কাঁদে  
মৃত্যুঞ্জয়ী নাচ নাচে শিশু তাতা থৈ ।

সাথে সাথে সাথে বাজে  
ডম্বরু ডুগ্‌ ডুগ্‌,  
অশ্বরে ফুটে ফুটে  
উঠে নব নব যুগ ।

আষাঢ় : ১৩৫৭



## বাঘ-ছাগলের কথা

( বনপীরের গান )

একদা এক বাঘের গলায় হাড় ফুটিয়াছিল,—  
ওই রয়্যাল বেঙ্গল বাঘ,—  
স্বযোগ বুঝে শৃগালমামা ডাক্তার ডাকাইল,  
এক সুবিল্ল রামছাগ ।

ডাক্তার আসি শৃঙ্গ দাড়ি নাড়ি যুগপৎ  
দুই চক্ষু মুদে কর  
কঠিন অপারেশন্ ভিন্ন নাই যে অস্ত্র পথ,  
নহিলে অক্সা পাবার ভয় ।

একদিকে তার মুণ্ড রাখ আর এক দিকে ধড়,  
আমি তবে খসাই হাড়,  
বেদম্ হ'য়ে আসছে রুগী, হও সবে তৎপর ;  
শুনে সবাই নাড়ল ঘাড় ।

কেউ কেউ বলেছিল—ক'রো না গো অমন কাজই  
এতে বাঘটি যাবে ম'রে,  
ডাক্তার ছাগল বলেছিলেন—দেখাচ্ছি ভোজবাজি  
আমি দক্ষিণ রায়ের বরে ।

সাদ হ'ল রয়্যাল বেঙ্গল বাঘের গলা কাটা,  
আর বাহির হইল অস্থি,  
ভারতজোড়া হরিণ ভেড়া ভাবে চুকল ব্যাটা,  
এবার কিরে পেলাম স্বস্তি ।

রক্তরাঙা গাঙের ধারা ভিজে বালির চর,—  
আহা যেন খাঁড়ার দাগ ;  
এক পারে তার মুণ্ড পড়ে আর পারে তার ধড়,  
হায় কাটা পড়ল বাঘ ।

দক্ষিণরায়ের বরে মুণ্ড তবু ছাগল খায়  
তার ক্ষুধা নাহি মেটে,  
পেট নেই তার পেট ভরে কি ? চালান করে হার  
সব এপারের এই পেটে ।

কাঁটামুণ্ডের ভয়ে ওপার হয় বা ছাগলহীন,  
আর এপারে হাঁস্ফাস,  
এপারের সব ছাগলগুলি ভাবছে নিশিদিন  
কোথা মিলবে এত ঘাস ?

উভয় পারের ছাগল মিলে চলছে 'গুঁতোগুঁতি',  
বাধে বিষম গণ্ডগোল ;  
এমন সময় কাঁটামুণ্ড দিল প্রতিশ্রুতি  
আর ধাইমু না ছাগল ।

তাই না শুনে নানা মুনি দিলেন নানা মত  
ওই সম্ভব অসম্ভব,  
কেউ বলে— বাঘ দীক্ষা নিয়ে ছেড়ে শাক্ত পথ  
এবার হইয়াছে বৈষ্ণব ।

কেউ বা বলে বাঘের কথায় ক'রো না প্রত্যয়—  
ভাই দিচ্ছি মাথার কিরে ;  
কেউ বা বলে এপারের ঘাস মোটেই মিষ্টি নয়  
এবার চল' গো সব ফিরে ।

দোটার পড়িয়া সবাই করে ছড়োতাড়া

আহা কত যে হয় ঘাম ।

ককির কহে— উভয় পারের যত হতচ্ছাড়া

ওরে বারেক তোরা থাম ।

ভাল ক'রে ছাথ রে চেয়ে কাটা মুণ্ডু ওটা,

ওতো নয়কো আসল বাঘ,

আর নিজের পানে তাকা, তোরাও মানুষ গোটা গোটা,

নয় রে কসাইখানার ছাগ ।

এই বাঘছাগলের কথা যদি শুনে ভক্তিভরে

আর শোনায় বন্ধুজনে

ধড়ে মুড়ে ঘোড়া লাগে দক্ষিণ রায়ের বরে

এক পরম শুভক্ৰমে ।

আষাঢ় : ১৩৫৭

## কবি নহি

আমার কবিতা হয়তো পড়নি কেহ,  
পড়িলে কখনো বলিতে না মোরে কবি ।  
কবি যে হবে সে জেনো নিঃসন্দেহ  
বাঙলার বসে ভাবে না সাহারা গোবি ।  
চারিদিকে মোর শ্যামল গন্ধ-গীতি,  
কত হাসিমুখ কত স্নেহ কত প্রীতি,  
আলো-ছায়া, সুখ-দুখ,  
সে-সবে আমার নেশা ধরিল না চোখে—  
মন বসিল না প্রেমের অলকা-লোকে,  
ভরিল না খালি বুক ।

কবি নহি আমি, কবি নহি তথাকথিত,  
যে ব্যথা জীবনে সব ছন্দের অতীত—  
আমি, সে ব্যথায় চির-ব্যথিত ।

কে আমার বুকে চিরতৃষা-জর্জর  
চাহে শুধু দূর সুন্দর মরীচিকা ?  
বৃথা ডাকে তারে বাপী কূপ সরোবর  
অস্তরে জলে অনির্বাণ্য শিখা ।  
সে শিখা টলে না ছুঃখের কালো ঝড়ে,  
তর্জনী তুলি জলে তা বাসরঘরে,  
কে তারে বুঝিবে বলো ?  
সূর্যের মত নির্বাক আছ্রানে  
শিশির-কণায় কহে সে যে কানে কানে—  
আমি জলি তুমি জলো ।

কবি নহি আমি, কবি নহি তথাপ্রথিত  
অনাসৃষ্টির ঘনমহুনে মথিত  
আমি, অনাদি ব্যথায় ব্যথিত ।

জানি না সে ব্যথা কবে হবে কোথা শেষ,  
শুধু জানি—আমি ধরেছি নিরুদ্দেশ  
মৃত্যুর ছায়াপথ,  
বধির বিধাতা যেথা অনলাক্রে  
লিখিয়া চলেছে তিমির-ললাট 'পরে  
মানুষের দাসঘত ।

'কবি নহি আমি, করিনি ছন্দে গ্রথিত  
যে বিধি-বিধান প্রতিবিধানের অতীত ;  
আমি মহাবন্ধনে ব্যথিত ।

পৌষ : ১৩৫৭

## ছড়া

থুথুর থুথুর      থুথুর থুড়ি,  
শাক-ওয়ালী      তিনকেলে বুড়ি ।  
কমলা দীঘির      জংলা পাড়  
ছমড়ে টানছে      কলমির ঝাড় ।

গুগুনি কলমি      ল' ল' করে  
বুড়ির মাথায়      বুড়ির পরে ।  
বুড়ির নিচেয়      কাঁপছে ঘাড়—  
নীতের হাওয়ায়      কচুর ঝাড় ।

পদ্মের পত্রে      ছল ছল জল  
দলমল দলমল      কলমির দল ।  
চলছে তিনকাল      পা পা হাঁটি  
বোঝার উপরি      শাকের আঁটি ।

কাঁপছে কণ্ঠ      উঠছে ডাক—  
নাও মা গুগুনি      কলমির শাক ।  
গুগুনি কলমি      ল' ল' করে  
নামিয়ে নাও মা      ঘরে ঘরে ।

হাঁকছে তিনকাল      শুনছে কে ?  
কানছে এককাল      মুখ ঢেকে ।  
বলছে চলছে      গুটি গুটি—  
নাও মা নাও মা      দাও মা ছুটি ॥

## ক্যাক্টাস্

দিনযাপনের উদয়ে অস্তে  
লবণের পারাবার,  
তারি তীরে ধাসমহালি মরুতে  
ক্যাক্টাস্ ঝাড়ে ঝাড় ।

সারি সারি সারি মরণ-পথিক  
শরণার্থীর তাঁবু,  
বালিবদলের ব্যাধিবিবর্ণ  
কাঁটাসার যত কাবু ।

জাহাজ ডুবিতে দম ফেটে মরা  
নাবিকের পরিহাস,  
শ্মশানবন্ধু অষ্টোপাসের  
কঙ্কাল ক্যাক্টাস্ ।

গর্তে গর্তে দ্রুত গতাগতি  
দাঁড়াসার কাঁকড়ায়  
কণ্টক-প্রেমে আকণ্ঠ ডুবে  
ক্যাক্টাস্ আঁকড়ায় ।

কোন স্বপনের ধণ্ড ছিন্ন  
স্মরণের ইতিহাস  
বালুর ঢালুতে গুঁড় তালুতে  
গুঞ্জরে ক্যাক্টাস্ ।

রৌদ্রোজ্জ্বল দিগ্-অরণ্যে  
নীল পাহাড়ের ধূমে,  
অলিছে জীবন অত্র ভেদিয়া  
দেবদারু ক্রমে ক্রমে ।

তরঙ্গভাঙা দ্বীপমস্তরের  
নারিকেল চূড়ে চূড়ে  
মৃত্যুঞ্জয়ী হুঃসাহসের  
বিজয়কোতন উড়ে ।

দূরের সে সমাচার তো কখনো  
পায় না বামন ঝাড় ;  
দিনযাপনের চতুঃসীমায়  
উই-পাহাড়ের সার ।

শিলামন্দিরে জগন্নাথের  
সরাচাপা সন্ন্যাস,  
মরুসাগরের বালুকাতীরে  
তীরস্থ ক্যাক্টাস্ ।



## বোশেখী ছড়া

গাঁ'র শেষে পথ শেষ, ভোলা-মাঠ সুর ।  
কচি অশথের পাতা কাঁপে বুরু বুরু ॥  
বুরু বুরু কাঁপে পাতা উড়ু উড়ু মন ।  
ঠিক হুপুরের কোলে দোলে শরবন ॥  
শরবনে বীণ্ বাজে সরস্বতীর ।  
মাটির ঘোড়ার মাঠে ছুটে চলে পীর ॥  
ঝিন্ ঝিন্ করে দিন প্রাণ আইটাই ।  
ঢালাবন খুঁজে ছুটো তরমুজ খাই ॥  
চোখ বুঁজে তরমুজে শুনি কিচ্ মিচ্ ।  
কেটে দেখি গুচ্ছের উচ্ছের বীচ ॥

একখুঁটো তালগাছে বাবুইএর হাট ।  
রোদে পুড়ে হাটুরের গলা হ'ল কাঠ ॥  
যদুর যায় তারা খায় রদুর ।  
সাঁই-এর দীঘি সে বলো আছে কদুর ॥  
দীঘল দীঘিতে জল কানায় কানায় ।  
রাঙা মেয়ে কাঁদে একা ঘাটের রাণায় ॥  
রাঙা মেয়ে কাঁদে কেন কাঁদে চাঁপা মেয়ে  
বকুলের তলা কেন ফুলে যায় ছেয়ে ॥  
চাঁপা গাছে চাঁপা ফুল কেবা দেয় পেড়ে ।  
কচু পাতা ভাবিছে তা ঘাড় নেড়ে নেড়ে ॥  
বুনো কচু খেয়ে বুড়ী ভাঙে গোটানাল ।  
মটামট ভাঙে বুড়ো তেঁতুলের ডাল ॥

পাহাড়ে মাছির চাক তেঁতুলের ডালে ।  
পেয়ে নাড়া বসে তারা দাড়িভরা গালে ॥  
মোচাকে পাকাদাড়ি কাঁচা হ'য়ে ওঠে ।  
টপ্ টপ্ মধু ঝরে বুড়ো যত ছোটো ॥



ডুবে ডুবে ডোবাটার নাহি পায় তল ।  
আকালের গাছে ঝোলে মাকালের ফল ॥  
বক্সি বাগানে খালি নিকিড়ির কুঁড়ে ।  
মরেছে নিকিড়ি খুঁড়ে পেটে মাথা ঘুঁড়ে ॥  
শ্রাওড়ার ঝোপে ওকি রয়েছে বঁকে ।  
পাঁদারে মাদার গাছে পা ঝুলিয়ে কে ॥  
কেলে হাঁড়ি গাদা হ'ল আকাশের কোণে ॥  
ছুট্ ছুট্ ছুটে ঘরে দুটি ভাইবোনে ॥  
পিছনে ছুটেছে ঝড় ধন্ ধন্ ধন্ ।  
অশথের কচি পাতা থর থর থর ॥  
ছুটে কোলে উঠে মার আঁচলের নিধি ।  
হাঁপিয়ে হাঁপিয়ে বলে ভয় কি রে দিদি ॥

## বৃক্ষরোপণ

বৃক্ষবর্গ ব্যাকরণে পুরুষ ব'লে গণ্য,  
পাড়াগাঁয়ের মানুষ তারা স্বভাব স্বতই বন্ত ।  
রোপণ যদি কর তাদের অপ্সরাদের নৃত্যে  
ছায়া দেবে ফল ফলাবে—সে সব আশা মিথ্যে

সাধু সাবধান,—

গাছ পুঁততে কোদাল লাগে,  
লাগে না নাচ গান

চাষাভুষো অবাক হ'য়ে

ভাবছে—এ কি ব্যাপার !

স্বাধীন যত বাবুদের আর—

বিলম্ব নেই ক্যাপার ।

আষাঢ় : ১৩৫৭

## অবসর

কর্ম-স্পর্শহীন

অমলিন অতি দীর্ঘ দিন

অব্যাহাত নিদ্রাভরা রাত

আসন্ধ্যা প্রভাত ।

প্রত্যহের উপর প্রত্যহ

গড়াইয়া গড়িছে সপ্তাহ ।

মাস সংবৎসর

বিস্তীর্ণ ধূসর অবসর

যত নির্ভাবনা ভাবিবার

বহু আকাজিকত

( আবেতরনী রবিবার )

কর্মান্তিক এ বিশ্রাম

জীবন্তে দিতেছে মোরে

ভীতিহীন মৃত্যুর আরাম

আব্দ : ১৩৫৭

## ভয় কি ?

বরাবর মোরা আসছি দেখে  
পালায় যাহারা প্রথমে ঠেকে  
শেষটা তারাই লড়াই জেতে  
বিধাতা তাদের স্ব-পক্ষেতে ।  
দু'দু'বার দেখ ব্রিটিশ্, লায়ন্  
উধ্ব'খাসে সে কী পলায়ন !  
প্রথম পালাল 'মনসে' হেরে  
ই্যাথা ক্যাথা যত সকলি ছেড়ে ।  
দু'বারের বার ডনকার্কে  
ডোবরে উঠিল ডুব মার্কে ।  
শেষটা কিন্তু জিতল সেই,  
জার্মানদের পাত্তা নেই ।  
রুশ ভল্লুকও খায়নি কম  
কভু উত্তম কভু মধ্যম,—  
ফাটায়ে গগন আর্তনাদে  
ওয়ান্স হ'তে স্তালিনগ্রাদে ।  
সেই রুশিয়ার ভয়েতে আজ  
বিশ্ব পরিছে যুদ্ধসাজ ।

সশস্ত্র যদি পালানো চলে  
নিরস্ত্রে ভীক কে তবে বলে ?  
অঁধার রাতে ভূতের ভয়  
মানুষ মাত্রে সবারই হয় ।  
প্রভাতে যখন সূর্য উঠে  
ভূত প্রেত সব পালায় ছুটে ।  
নিষ্ঠুর মৃত অত্যাচারী  
প্রথম জিৎ তো হবেই তারই ।

বিধির বন্ধ দেয়িতে নামে  
তখন তাদের নাচন ধামে ।  
অতএব কোন চিন্তা নেই,  
নড়াই ধামে না পলায়নেই ।  
হুধে ভাতে নেতা আছেন বহু,  
তাদের চরণে প্রণাম রহু ।  
অঁক ক'ষে তাঁরা দেখান ভয়  
মেনে নিতে হবে এ পরাজয় ।

জীবন-মরণ—সন্ধিক্ষণে  
কত কথা আজ পড়ে যে মনে ।  
বাংলায় আর নাই কি কেউ  
লাগামে ফেরাবে প্রায় ঢেউ ?  
সে ভরজের ধরিয়৷ ঝুঁটি  
ঝঞ্ঝার সাথে চলিবে ছুটি !

না থাকে না থাক, কিসের ভয় ?  
হবে হবে হবে মোদেরি জয় ।  
আবার আমরা ফিরব দেশ,  
হব না হব না নিরুদ্দেশ ।  
ঝুলির ভিক্ষা ঝুলিতে থাক,  
পেয়েছি সত্য ক্ষুধার ডাক ।  
পশ্চিম পারে না পেয়ে খেতে  
পূবে ফিরে যাব ক্ষুধায় তেতে ।  
তখন মোদের রুখবে কে ?  
ঘরে খিল্ দেবে ভাব দেখে ।  
ম্যর ভুখা হুঁ—ক্ষুধার ঝাঙা  
তুলে, বুঝে নেব আপন গাঙা ।

শ্রাবণ ১ ১৩৫৭

## শীতের কমল

শীতের কমলসম  
এবার শুকাল মম  
                  চিত্তের প্রকাশ  
আজ শুধু অশ্রুজলে  
মগ্ন আছি পঙ্কতলে  
                  পঙ্কজের ধ্যানে

কে জানে আবার কবে  
আপন গৌরবে হবে  
                  যুগল বিগ্ৰাস  
শ্রামপত্রে—চাকি জল  
বিকশিবে শতদল  
                  বর্ষে গন্ধে গানে  
নভশ্চর সূর্যের সন্ধানে।

সে প্রভাত লাগি  
পঙ্কমারে অরু নিশা জাগি।

অগ্রহায়ণ : ১৩৫৭



## স্বাধীনতার সূর্য

কাঁপিতেছিল আশার বাতি  
পোহাবে কি এ দুঃখরাতি ?  
সহসা বায়ু বেগুর বনে  
                    বাজায় গেল তুর্ষ,—  
জাগো গো জাগো দুয়ার খোলো,  
তিমির নিশা প্রভাত হ'ল,  
পূর্ব-ভালে উদিল ওগো  
                    স্বাধীন নব সূর্য ।

চমকি মোরা বাহিরে আসি,  
দেখি যে— ধরা যেতেছে ভাসি,  
শ্রাবণ-ঘন-বাদল রাতি  
                    পোহাস কি না কে জানে  
কোথা বা নব কিরণ-ছটা,  
মেঘের বুকে মেঘেরি ঘটা,  
অন্ধকার দ্বিগুণ কালো  
                    হয় কি কছু বিহানে ? .

সিক্ত শাধি-শাধার থাকি'  
ডাকিয়া কহে ভোরের পাখী—  
আমরা জানি আমরা জানি  
                    নবীন রবি উঠেছে ।  
বাদল-ঝরা মেঘের পারে  
তিমির-হরা কিরণ-ধারে  
অকূল দুঃস্বপ্নভরা  
                    আধার রাতি টুটেছে ।

জয়তু জয় বিবস্বান,  
নমো হে নম জগৎ-প্রাণ,  
শ্রাবণ-মেঘ তোমারি দান  
সে কথা মোরা বুঝেছি ।  
অরুণ তুমি কবির গানে  
পুষ্প তুমি ঋষির ধ্যানে  
তোমারে নিতি নূতন নামে  
অনাদি কাল খুঁজেছি ।

উদিলে যদি, প্রকাশ হও,  
মেঘের গ্লানি কেন গো সও,  
হে স্বাধীনতা, হে অভিনব  
স্বয়ম্প্রভ সূর্য !  
তোমারি তেজ বহিতে দাও,  
তোমারি আলো সহিতে দাও,  
কণ্ঠে আজি উঠুক বাজি  
তোমারি জয়তুর্ঘ ।

শ্রাবণ : ১৩৫৭

## হাটের কবি

হাটে হাটে আজ ঘুরে যে বেড়াই  
সে শুধু করিতে হাট,  
চাল ডাল ছুন তরি-তরকারী,—  
সহস্র ঝঞ্জাট !

সেদিন আমার গিয়েছে বন্ধু  
যেদিন যেতাম হাটে,  
শুনিবারে শাক-সজ্জীর মুখে  
কি ব্যথা জমেছে মাঠে ।

রসালের গালে অশ্রু হেরিয়া  
পড়িত দীর্ঘশ্বাস,  
কিস্মিস্ কেঁদে শুনাত দ্রাক্ষা-  
কুঞ্জের ইতিহাস ।

গিয়েছে সে সব দিন,—  
যে বুক মুকেরে করিত মুখর  
সে আজি দরদহীন ।

গেছে যৌবন নাই অর্জন  
করি নাই সঞ্চয়,  
তাই আজ ভাই পাই-পয়সাটি  
করি না অপব্যয় ।

হাটে গিয়ে আর মেলে না আমার  
দরদীর সাক্ষাৎ,  
উদর ভরিতে সওদা করিতে  
আজি মোর যাতায়াত ।

চলি ধলি হাতে ভাঙা ছাতি মাথে  
 পুরাতন সেই হাতে,  
 অতি সাবধানে পরাণ-অধিক  
 পয়সা গুঁজিয়া গাঁঠে ।  
 কোথা কোন্ বুড়ী বেগুনের ঝুড়ি  
 বেচে কিছু সস্তায়,  
 ইষ্টকাদপি দৃঢ় বাধাকপি  
 আছে কোন্ গাদাটার,  
 ইত্যাদি বহু, কত আর কহ ?  
 করি যা ইতরপনা ।  
 দেখিছ বহু হাটের কবির  
 ললাটের লাঙ্ঘনা ?  
 এ দুঃখ সহ্য এই ধলি বহা  
 জানি অলঙ্ঘনীয়,  
 যে দুখের তার সহ্য না কো আর  
 তোমারে কহি গো প্রিয় ।  
 হাতে কাঁটা ফুটে নধর বেগুন  
 কাঁকা ঘুঁটে বেছে আনা,—  
 ভাঁড়ারের বাঁটি কুটিয়া দেখায়  
 দুজনেই মোরা কানা ।  
 কান্ধকো পরখি টিপে টুপে গুঁকি'  
 টাট্কা যে মাছ কিনি,  
 রাঁধুনির তাওয়া ছুঁতে নাহি ছুঁতে  
 পচা ব'লে তারে চিনি ।  
 আরও স্নকঠোর হুঁতোগ মোর  
 কিছু দিন হ'তে দেখি,  
 চেনা মোকানের ভাঙানো রেজ্‌কি !  
 মোকামে আসিয়া মেকি !

যত কানা কুঁজো ভূয়ো গুঁয়োধরা  
হাট-বাঁট-দেওয়া মাল  
আমি নাকি তাই খুঁজে খুঁজে তাই  
কিনে আনি আজকাল ।

সে দোষ যে মোর থলির, বন্ধ,  
সে কথা বলি বা কারে ?  
চোখের চশমা কপালের ঘাম  
মিছে মুছি বারে বারে ।

হেন বদনাম অপকলঙ্ক  
ঘটিত না মোর আগে,  
পথের ধূলাও হ'ত স্বর্ণাভ  
এ হাতেরই অমুরাগে ।

ভূষিতে আমার গভীর অমায়  
ফুটিত চাঁদের হাসি,  
পাশে আসি কাঁদি শাওনের মেঘ  
রুধিত অশ্রুশি ।

সে সৌভাগ্য গিয়েছে, থাক গে  
নাহি ক্ষোভ অন্তরে,  
হাটের ফেরতা থলি যেন কেউ  
নামায় দরদভরে ।

যা ক'রেই হোক সহিব বন্ধ  
হাটের প্রবঞ্চনা,  
ঘরে ফিরে যদি নাহি ঘটে ভাল  
ততোধিক লাঞ্ছনা ।

অগ্রহায়ণ : ১৩৫৭

## হুবেলা হুমুঠো

হুবেলা হুমুঠো পেটে খেয়ে শুধু বেঁচে থাকা ।

বাঁচার বাহিরে,—

অসুস্থ অপরাত্নিক ধূম্র আকাশ  
অনাগুস্ত ধু ধু ফাঁকা ।

হে বন্ধ, কহ কোন পথে মোর  
এ দুঃশাস্তি পথিক হবে ?  
এ ওদাস্ত এ নৈরাশ্র এ অতৃপ্যতা  
বাণী পাবে বল' কোথায় কবে ?  
অমারজনীর অন্ধকারের রঞ্জে রঞ্জে  
তারায় তারায় নিমেষপাতের ছন্দে ছন্দে  
দৈন বিধবা নিশিগন্ধার  
নবজাগরণে সসৌরভে ?  
অথবা,—ক্রান্ত সুষুপ্ত সব দুঃখহরণ  
মহামরণের অবলুপ্তির অগৌরবে ?  
কোথায় কবে ?

অষ্টপ্রহর—অবিশ্রান্ত মরিছে খেটে  
হুবেলা হুমুঠো কদম তবু জুটে না পেটে,  
জানি জানি আমি জানি  
নিদ্রাহারা সে মহাশূদ্রের  
রুদ্র ক্ষুধার বাণী ।

কিন্তু বন্ধ,—  
ঘোলা জলে নেমে পান্য ঠেলে নিতি  
'ওঁ গন্ধেতি' প্রাতঃস্নান,  
বিগতস্পৃহ পাকস্থলীতে  
ঘেন তেন দুটো অন্নদান,  
হেঁড়া হাকড়ায় বেঁধে ব'য়ে মরা  
চোরাই রত্ন দীপ্তিমান !

নাহি জানি নাহি জানি  
এই জীবনের বাণী ।

চৈত্র : ১৩৫৭

নিশাস্তিকা

## জন্মদিন

মেঘের আড়ালে আষাঢ় দিবস চুপি চুপি চ'লে যায়,  
অপরিচিতের মতন এবারও বিদায় দিবি কি তার ?  
আবাহন-হীন এ আষাঢ় দিন বারে বারে গেছে চলি',  
নয়নধারায় করিয়া সিক্ত কোন কথাটি না বলি' ।  
এবার সাধিয়া শুধাও তাহারে কি চাহে সে বলিবারে,  
জীবনে যাহারে করনি স্মরণ বরণ করহ তারে ।  
তারি বক্ষের সজল স্বাসে ভরি' লহ তব বুক,  
এই দিনটির দর্পণে দেখ সারাজীবনের মুখ ।

আজিকার কালো, রবি শশাঙ্কে হয়নি কলঙ্কিত,  
কাল সাগরের কৃষ্ণকমল পূর্ণ প্রস্ফুটিত ।  
চল চল তার নির্মল শোভা সনির্বন্ধে ডাকে,  
তারি গন্ধের মেঘুর ছন্দে সজল গগন ঢাকে ।  
তারি বুকে নেমে আলোকের পাখা হ'ল গুঞ্জনহীন,  
মর্মর কোষে তপন তারকা—তারি মধুপানে লীন ।  
চির কলঙ্কী গুরে কবি তোর কি সৌভাগ্য বল—  
এই দিনটির মৃগালে ফুটিল হেন সহস্রদল ।

পেরেছি' কিরে চিন্তে ?  
মরণকমল ফুটে আছে ওই জন্মদিনের বৃন্তে ।  
চেয়ে থাক্ চেয়ে থাক্,  
বন্দনাহীন অর্থ্যবিহীন নিশ্চল নির্বাক ।

১৩ই আষাঢ় : ১৩৫৮

## টুকরো

ফুল কহে ফুকরিয়া, ফল, ওরে ফল,  
কতদূরে র'য়েছিস্ বন্, মোরে বন্ ।  
ফল কহে, মহাশয়, কেন হাঁকাহাঁকি—  
তোমারি অন্তরে আমি নিরন্তর থাকি ।  
শুনে হাসে ঝিঙাফুল, কুমড়ো, বেগুন ;  
বুঁই, বেলি ভাবে এষে কাটা ঘায়ে হুন !  
অফলা ফুলের মালা দুলাইয়া গলে  
মিছে আশা দেয় কবি সব ফুলই ফলে ।  
মুখর গোলাপ কহে—‘কবি মহাশয়,  
শাক দিয়ে মাছ ঢাকা তব যোগ্য নয়’ ।  
বেদনার প্রতিকার যদি নাহি পাও,  
যে ব্যথা গভীর তারে ফুকরিতে দাও ।

ভাস্কর : ১৩৫৬

\*

\* \*

নব বৈশাখে দূর তালীশাখে  
বাঁকা চাঁদখানি হলে,  
নব মিলনের সঙ্কেতদীপ  
অন্ধকারের কূলে ।

কৈশাখ : ১৩৫৭

\*

\* \*

উদরে যার অন্ন নাই  
কটিতে নাই বস্ত্র,  
বাহুতে যার বহিতে নাই  
প্রাণ বাঁচানো অস্ত্র,  
স্বাধীন হোক অধীন হোক  
কি তার তাহে আসে যার ?  
স্বাধীনতা তো মাদুলি নহে  
গলায় বেঁধে ধুয়ে ধায় ।

শ্রাবণ : ১৩৫৭

নিশান্তিকা



অন্ন দাও মোদের মুখে  
 কটিতে দাও বস্ত্র,  
 হে স্বাধীনতা, বাহতে দাও  
 প্রাণ বাঁচানো অস্ত্র ।  
 হাসিয়া কহে স্বাধীনতা,—  
 মোর তো ভাই দোকান নাই,  
 ওসব আমি পাব কোথা ?  
 হাতে ও পায়ে শিকল ছিল  
 দিয়েছি খুলে তাই,  
 বাঁচিতে চাহ বাঁচিতে পার,  
 মরিতে বাধা নাই ।

সংস্করণ : ১৩৫৭

\*  
 \* \*

উই আর ইঁদুরের দেখ ব্যবহার  
 বাহা পায় তাই কেটে করে ছারখার ;  
 কাঠ কাটে বস্ত্র কাটে কাটে সমুদয়  
 সুন্দর সুন্দর দ্রব্য কেটে করে ক্ষয় ।

উই আর ইঁদুর কহিছে জুড়ি কর,  
 এত বড় অপবাদ কেন দাও নর ?  
 কাটিতে পারি না হেন দ্রব্য আছে নানা,  
 মানুষের মাথা আর ছাগলের ছানা ।  
 গাঁঠ-কাটা সিঁদকাটা এ সবও না জানি,  
 চরকা কাটার বন্ধু রাধি না সন্ধানই ।  
 ঘুরে রহ ঘটি বাটি লোহা ও পাষাণ,  
 কাটিতে শিধিনি আজও নিজ নাক কান

সংস্করণ : ১৩৫৮

প্রেম চুকে গেছে,

প্রেমিক প্রেমিকা মুখ বুজে ঘর করে ;

শুকায়েছে জল,

আবাদ চলেছে অচ্ছেদ সরোবরে ,

হেয়ালে হুলিছে

আর্শোলা-ধাওয়া বেরঙা র্যাফেলী ছবি ;

কবিতা ছেড়েছে,

বৃদ্ধ বয়সে নাম জপ করে কবি ।

আখিন : ১৩৫৮

\*

\* \*

উত্তীর্ণ হয়েছে সন্ধ্যা, অন্ধকার ঘিরে,  
চলেছি লণ্ঠন হাতে বৈতরণী তীরে ।  
অবসন্ন ক্ষীণ দেহ, সরণি নিরুণ,  
কম্পিত প্রাণের শিখা উল্লসিত ধূম ।  
পলিতা যতই ঠেলি বাড়াইতে আলো  
কালিমাধা কাচ তত ছড়াইছে কালো ।

সংকীর্ণ বন্ধুর পথ, বন্ধু কেহ নাই,  
যত চলি তত অভিসম্পাত ছড়াই ।  
বাড়ে আঁধারের ধাঁধা, লণ্ঠনের ফাঁদে  
অনাদি জ্বালায় মোর ব্যর্থশিখা কাঁদে ।

মাঘ : ১৩৫৯

\*

\* \*

ভগ্ন বাতায়ন পরে

হতশ্রী মুকুর করে বসেছি হেলিয়া,

মগ্ন আলো সন্ধ্যাকাশে

একুশে ফাল্গুন আসে রজনী মেলিয়া ।

ফাল্গুন : ১৩৫৯

দীঘির ঢালু পাড়ে

জেলেরা জল ঝাড়ে

চকিত মাছগুলি লাকায় খাবি খায় ;

ওপারে তালগাছে

চিলটি চেয়ে আছে,

চোখের উপরেতে 'ছ'পর বয়ে যায় ।

দীঘির-জল-ছাঁক।      জালের মাছ

চিলের-চেয়ে-খাকা      তালের গাছ ।

বাস্তব : ১৩৫২

## এদিক—ওদিক

( এদিক )

জাগ জাগ দেশবাসীগণ !

শিয়রে শমন স্বয়ং করিছে

মহামারণের আয়োজন ।

আরোহণ করি সরকারী মোষে

উপোসী চাবীর রক্ত সে শোষে,

ব্রেকফাস্ট সেরে, মালকোঁচা ক'সে

তাই করি সবে আহ্বান,

ভুখারি ভিখারী হ'য়ে এক দিন,

উঠাও আওয়াজ, সাজাও মিছিল,

আজ নয় কাল হবেই আকাল

ইন্ক্লাবী জয়গান ।

সুখায় স্কন্ধ বজ্রমুঠিতে

ধর গুর শিং চেপে

লাল কাণ্ডাটা উড়াও সামনে

মহিষটা যাক ক্ষেপে ।

পিছনে পিটাও শত জয়টাক

আছাড়ে পটকা ছাড়,

নিড়েনি নরুণ ইঁট পাটকেল

যে যা পার ছুঁড়ে মার

কিছুদিন ধ'রে চলুক এমনি

শেষটা দেখিবে মজা,

যমপিঠে মোষ হবে দেশছাড়া

গুটারে ল্যাঙ্কের ধ্বজা ।

তারপর, ভাই তারপর—  
নূতন উষার রক্ত ছটায়  
ভেসে যাবে সব ঘর পর ।

খাটাখাটুনির ঘুচিবে বালাই,  
ভূভিক্ষের মুখে দিয়ে ছাই  
চারিধার খাসা রাতারাতি ভাই  
ভরি যাবে ধনে ধান্তে ।

দেশ নয় যেন শ্বশুরের ঘর ,  
হবেলা গোলাও ক্ষীর ননী সর,  
ঢেকুর তুলিছ এ ওরে বলিছ—  
দোক্তা নে ভাই পান নে ।

( ওদিক )

ঘুমাও ঘুমাও দেশবাসী ।  
যে মিছে বলিছে কুচক্রীদল  
উড়াও সে কথা উপহাসি'

ও নহে শমন মহিষারোহণে,  
উনি গণদেব মুষিক বাহনে,  
ওর আগমন তব প্রয়োজনে  
মাঠে: মাঠে: ভাই ;  
ভূভিক্ষের নিবারণ লাগি  
কি দিন কি রাত রহিয়াছে জাগি,  
আরও কি ফন্দী ফাঁদা হয়ে গেছে—  
সেটা বুঝি দেখ নাই ?

মহাবটমূলে আটচালা তুলে  
ঢেঁশকেন হ'ল গাঁথা,  
ডজন হিসাবে বাবলাকাঠের  
ঢেঁকিও হয়েছে পাতা ।

বাবলাকাঠের ঢেঁকি সারে সার  
 জিউলি পোয়ার খাঁজে  
 লোহার ধুলোর শক্ত মুষল  
 ঘা পাড়ে গড়ের মাঝে ।  
 ঢেঁকির এ মুখে জোড়াপায়ে মুখে  
 ঘন ঘন পাড় পড়ে,  
 ঢেঁকির ওমুখে ঢেঁকুশ ঢেঁকুশ  
 ধান ভানা হয় গড়ে ।  
 খুশ খুশ খুশ উড়াইয়ে তুষ  
 কুলো-ঝাড়া চাল হয়,  
 ঢেঁশকলে যার এতগুলো ঢেঁকি  
 আকালে কি তার ভয় ?  
 সব দুখে এই ঢেঁকিই জামিন,  
 ইহারই ভিতর ভরা ভিটামিন,  
 জমিদার প্রজা কুলী কি কামীন  
 ঢেঁকি সকলেরই মূলে,  
 আমাদের হেন ঢেঁকির মহিমা  
 ছিন্ন এতকাল ভুলে ।  
 সে ভুল এবার সংশোধিবার  
 ব্যবস্থা সব ঠিক,  
 আরও কিছুকাল ঘুমাও তোমরা  
 রহিবে সকল দিক ।  
 রাঙ্কেলী যত ধাপ্পাবাজীতে  
 বুঝমান যারা চাহে কি মজিতে ?  
 ওদের কথায় প্রত্যয় কেউ  
 ক'রো না একটি বর্ণ ।  
 জান তো অকালে জেগে উঠে মুঢ়  
 মরিল কুস্তকর্ণ ।

শ্রাবণ ১৯৩৭

নিশান্তিকা

## আগমনী

পথশ্রান্ত নিঃশ্ব জীবন

নমিয়া পড়েছে ক্লাস্তিভারে,

সহসা হেরিছ গৌরী কণ্ঠা

দুটি হাত পেতে দাঁড়াল ঘারে ।

আস্তে ব্যস্তে খুলি ভাণ্ডার

হাঁড়ি কুঁড়ি ভেঙে করি একাকার,

ওই করপুটে তুলিয়া দিবার

যোগ্য কোথাও পাই না কিছু ;

বুঝি না ছলনা, কোন অপরাধে

মেয়ে হ'য়ে মাথা করাবে নিচু ।

মুহু মধু হাসি' শুধায় আমারে—

চিনিবারে তারে পেরেছি কিনা ;

কহিছ,—চিনেছি, ছলনা করিতে

অন্নপূর্ণা অন্নহীনা ।

নবধাত্তের সৌরভময়

অঙ্গ ভরিয়া উঠে পরিচয়,

যাক্ষা দিয়ে তো ঢাকিবার নয়

করপদ্মের সুষমারশি ।

কহিছ, চিনেছি ছদ্মের মাঝে

শরৎ মেঘেতে চাঁদের হাসি ।

কহিছ আবার—সীমন্তে তব

ওই অক্ষয় সিঁদূরসম,

শীর্ণ স্বতির সীমন্তে আঁকা

চিরদিন তুমি রয়েছ মম ।

ভুলি নাই সেই স্নেহকলভাষ,  
মেয়ের মাঝারে মায়ের আভাস  
শতদলে আজি হয়েছে বিকাশ,  
বিস্ময়ে তাই চাহিয়া আছি।  
শিবের ঘরনী সবার জননী  
দাঁড়াল দুয়ারে ভিক্ষা যাচি !

সহসা তিমিরে ডুবিল ধরনী  
কোথায় লুকাল গৌরী মেয়ে !  
চির অনশন লেলিহ রসনা  
কে ও বিবসনা আসিছে ধেয়ে ?  
কার ধড়ের ক্ষুধা-ধরধারে  
লুটায় মুণ্ড কাতারে কাতারে  
কার ধর্পরে অনিবার ঝরে  
শিবাশকুনির মহোৎসব ?  
অট্ট হাসিয়া কে আসে করালী  
চরণে দলিয়া শিবের শব !

সাঁঝ তন্দ্রায় ক্লাস্ত কবি  
হেরিল এ কোন্ কুহক ছবি ?

ভাদ্র : ১৩৫৯



## ভোর হ'য়ে এল

ভোর হ'য়ে এল কবি তোর ।  
নীড়ছাড়া বনপাখী  
করে দূরে ডাকাডাকি,  
খোপে খোপে কাঁদে কবুতর ।

জীবন-রজনী শেষে  
দাঁড়িয়ে শিয়র দেশে,  
মরণ-অরুণ ওই  
চাহিয়া নির্নিমেষে ;  
তোরই ঘুম ভাঙাতে  
তোরই পথ রাঙাতে  
বাহিয়া তিমিরতরী এল সে ।

যে-আলো নয়নাভীত  
সেই আলো হাতে তার,  
যে-বোঝা বহনাভীত  
সেই বোঝা মাথে তার ;  
তোরই জ্বালা সহিতে  
তোরই বোঝা বহিতে  
আজি বুঝি অবসর পেল সে ।

রবি শশী জ্বলে জ্বলে  
এই যে রজনী-জাগা,  
কেঁদে হেসে ভালবেসে  
এই যত ভালোলাগা ;  
কোজাগরী অভিনয়—  
আর নয় আর নয়  
ঘুরিয়ে দে এ-ছুরারে চাবি রে !

আজ আর ডাকিস্নে  
ডক্তের ভগবানে,  
মুখে দুখে মুখে বুকে  
কোথায় সে সেই জানে ;  
এল যে-করুণাময়  
ঐশিভরা বরাভয়,  
নম' সে অবশ্যস্তাবীরে ।

ওরে কবি, নবপ্রভাতে,  
রবি শশী তারা-জ্বালা  
রজনীর দীপমালা  
নিভিছে অরুণ-প্রভা-তে ।

চৈত্র : ১৩৫৯

## পরাতব

এ যে মরণের ক্রকুটি-ভয়াল  
মুখোস আঁটিয়া মুখে,  
চির জীবনের বন্ধু আমার  
দাঁড়াইলে পথ রুখে।  
সতিমির সংকীর্ণ সরণি,  
বলহীন আমি একা,—  
ভীম ভৈরব বীরপুঙ্গব,  
তাই কি মিলিল দেখা ?  
আতঙ্কে আমি কাল-ঘাম ঘামি'  
টলিয়া পড়িব পায়ে,  
তখন তোমার পরশ-অমৃত  
লাগিবে সে মৃত কায়ে।  
জীবন থাকিতে বন্ধুর সাথে  
দেখা বুঝি হ'তে নাই,  
চির বুভুক্ষু হৃষিতু জনেরও  
খাবি খাওয়া চাই-ই চাই !  
তাই বুঝি হেরি আজ,—  
আপাদমস্তে, নমোনমস্তে,  
যুদ্ধং দেহি সাজ !  
কোথায় লুকালে ফোটা মালতীর  
পরিমল মনোহর ?  
কোথায় শুকালে ঝরা বকুলের  
অফুরান নিঝর ?  
নবনীল নভে শ্যামরূপাভাস  
কুহ-কণ্ঠের ধ্বনি ?  
শিশিরে শিশিরে ঝরানো ছড়ানো  
অশ্রু-পরশমণি ?

সকলি ঘুচায়ে দাঁড়ালে আমার  
ভুবন আঁধার করি',  
বন্ধুর পাশে বন্ধু কি আসে  
বিভীষিকা-রূপ ধরি' ?  
দীর্ঘ দুখের পশরা মাথায়  
জরাভারে দেহ কাঁপে,  
হে নওজোয়ান এখন এসেছ  
শক্তির পরিমাপে !  
পুরুষ হইয়া হেন কাপুরুষে  
বন্দি বন্ধু বলি'  
সে দুঃখে এই ভিজে ভস্মও  
উঠিতে চাহে যে জলি' ।

জানি তা হবার নয়,—  
এবারের সেই মুখোসধারীর  
মায়াযুদ্ধেরই জয় ।

●  
তবু যে যুঝেছি, আজও যুঝিতেছি  
সেই মোর গৌরব ;  
মানুষের মত মানুষেরই হয়  
বারবার পরাভব ।

চৈত্র : ১৩৫৯

## অস্ত

প্রে-মকো অস্ত নাহি পাই ।  
ত্রিকুড়ি ছাড়ায়ে এসে  
দেখিতেছি দিনশেষে  
যে দূরে সে ছিল আছে তাই ।  
কখনো ভেবেছি—ও তো  
আমলকী করায়ত,  
কখনো হেরেছি—মরীচিকা,  
কভু ক্ষণপ্রভা-ভীতি  
কভু বা ঞ্জবের সাথী,  
কখনো সাঁজের দীপশিখা ।

তাহারি আহ্বান পেয়ে,  
তারি পানে চেয়ে চেয়ে ;  
কানে খাটো, চোখে ছানি আজ ;  
তারি ত্রিতাপের চাপে  
মাজাভাঙা হাঁটু কাঁপে  
কাঁধে ঘাটা, অপরূপ সাজ !

তারি শিখানোর শিখি'  
মামুলি কবিতা লিখি'  
টাকা সিকি করি রোজগার,  
হালে না মিলিলে পানি  
দুই-হাতে দাঁড় টানি,  
তথাপি প্রেমের নাহি পার ।

যে কাদন কাঁদিলাম,  
যে সাধন সাধিলাম,  
                    আঁচড় কাটেনি তার মুখে,  
আমারি বেপথুমান  
ঘসা বুকে ক্ষয়া প্রাণ  
                    এলোমেলো চক্‌মকি ঠুকে ।

নদীর ভাঙনে ভাঙা  
ওপারে পলাশডাঙা  
                    ছোখ রাঙার ফুলে ফুলে ;  
চাহিয়া আকাশপানে  
ভাবি,—শেষ কোনখানে ?  
                    ভাঙে চেউ ললাটের কূলে ।

অস্ত গেল ক্লাস্ত রবি,  
সহসা ভবিষ্য ছবি  
                    আঁকিয়া দেখাল সন্ধ্যাকাশ,-  
জরাজীর্ণ জড় আমি  
কণ্টকশয়নে ঘামি  
                    প্রেম করে কুলার বাতাস ।

ভাঙ্গ—১৩৬০

## পেট ও মাটি

এখন বুঝেছি ভাই,—  
পেট ছাড়া আর পূজা করিবার  
ছনিয়ে কিছু নাই ।

আপাদ-মস্ত সাড়ে-ত্রিহস্ত,  
তারি মাঝে রাজে পেট,  
তারি নির্দেশে দেশে ও বিদেশে  
বারবার মাথা হেঁট ।

আধার অতীতে ঋক্বেদীয়ারা  
তারি ধান্দায় হ'ল ঘরছাড়া,  
হ'য়ে মরুপার গিরি কান্তার  
ভাঙে 'খাইবার' গেট ।

বুদ্ধ শুদ্ধ,—পেয়ে বোধিমূলে  
পরমান্নের প্লেট ।

তারি টানে ঢেঁকি চ'ড়ে  
নারদ আকাশে ওড়ে,  
ধান ভেনে ভেনে সারা ত্রিভুবনে  
যত ঢেঁশকেল ঢেঁড়ে ।

সত্য ছাপর ত্রেতা  
যা কিছু ঘটিল যেথা  
একটু ভাবিলে পষ্ট হইবে  
পেটই ছিল তার নেতা ।

যত সিঁদূর তা গণেশের পেটে  
তিন যুগই লেপা হয়,  
গলিতে গলিতে ঘটিছে কলিতে  
তারি পুনরভিনয় ।

যা কিছু রকম-ফের—  
সে শুধু বিধাতা উলটিয়া পাতা  
টানিছে নূতন জের।

পেটের খোরাক ঠিক পেতে হ'লে  
চিরকাল চাষা চাই ;  
পেটের স্বেদে মাহুষে মাহুষে  
সবই চাষতুতো ভাই।  
তাই চারিদিকে চাষ ও চাষার  
ঘন ঘন জয়রব,  
তাই সংগ্রাম, তাই প্রস্তুতি,  
তাই যত বিপ্লব।

বাদাডের বাঘ পঁদারে কহিছে  
শোন গো বিড়াল মাসি,  
যে মাটি যেখানে আঁচড়াও তুমি  
সে মাটি তোমারি দাসী।  
ওরা সব কারা দেয় হাতনাড়া,  
কি ওদের অধিকার ?  
যে যেখানে চষে খুঁটি গেড়ে বসে  
সে জমিন ধাস তার।

হ'য়ে একজোটে দাসীটারে সব  
ভাগাভাগি করে নাও,  
সহজে সে যদি না ভরায় পেট  
নাড়ি ভুঁড়ি ছিঁড়ে ধাও।  
টিক্ টিক্ টিক্ যত টিকটিকি  
বলে ঠিক ঠিক ঠিক,  
চোখ গেল চোখ গেল রব তুলে  
চ্যাচায় চতুর্দিক।



শুধু, চার ষুগ মড়ার মতন  
বোবা মাটি আছে প'ড়ে,  
যে যেমন খুশি চষে চোষে শোষে  
কাটে ঘাঁটে কাড়ে ফোড়ে ।  
সর্বহরণ এ উৎপীড়ন  
হবে না সহনাতীত ?  
সব জীবনের উৎস হ'য়েও  
সত্যই সে কি মৃত ?

মুড়ির দন্তে মানুষ চাহে যে  
প্রতি পেট হবে ভুঁড়ি,  
তারি যোগান কি দেবে চিরকাল  
হাবা কাল এহি বুড়ি ?  
কোন দিন সে কি অষ্টার কাছে  
দাঁড়াবে না জুড়ি' কর—  
“আর কত কাল বহিব ঠাকুর  
মানব-দানব-ভর ?”

অগ্রহারণ : ১৩৬০

## আসছে জন্মে

রোঢ়াবীধে খোলা বারান্দায়  
শীতের সূর্য গড়ায়ে যায় ।

পড়ন্ত রোদে পথের প্রান্তে  
অশথের পাতা কাঁপছে,  
কি শীত গ্রীষ্ম কেঁপেই আসছে তারা ;  
বলি-বন্ধুর অশথের গুঁড়ি  
একঠায়ে খাড়া ভাবছে,  
কি শীত গ্রীষ্ম সে শুধু ভেবেই সারা  
একশ বছরে উদ্ভট যত ভাবনা ।  
পড়ন্ত রোদে পিঠ পেতে শুয়ে  
ছুধোলো গাভীটি জাওয়ার,  
তন্দ্রিত চোখে ঠাওয়ার—  
সারা গোজন্মে কোথায় কিসের ভাবনা ?  
চোয়ালে জাবর, গোরালে ফিরেই  
কোয়ালে বাছুর ও জাবনা ।

একই ঠায়ে খাড়া একশ বছর দাঁড়ায়ে  
অচল অশথগুঁড়ি  
আধারের তলে অন্ধের প্রায়  
শিকড়ে শিকড়ে রস হাতড়ায়,  
করে মাটি খোঁড়াখুঁড়ি ।  
একই ঠায়ে খাড়া চিরনিদ্রাহারা  
উর্ধ্ব আকাশ ফুঁড়ি'  
পাতায় পাতায় আলো আঁকড়ায়,  
শাখায় শাখায় পাখা ঝাপ্টায়,  
ঝড়ে ঝড়ে মোড়ামুড়ি ।  
চিরচঞ্চল পায়ের-শৃঙ্খল  
অচল অশথগুঁড়ি !

সদগোপেদের দুখোলো গাইটি ভালো,  
 নধর চিকন কালো ;  
 অচল নয় সে চ'রে খেতে পারে,  
 লেজের বাড়িতে ডাঁশ মশা মারে,  
 ভুলেও ভাবে না দুপ্রাপ্যের ভাবনা :  
 অতীব সরল হিসাব তাহার  
 দুধের বদলে জাবনা ।  
 উপরন্তু সে জাবর কাটে  
 পড়ন্তু রোদে ভরা পেট পেতে  
 ঢুলু ঢুলু আঁধি শীতের মাঠে ।  
 গলার দড়াটা মাঝে মাঝে খোলা পায়,  
 তারি আনন্দে ঘন-রোমাঞ্চ-কায় ।  
 এবারের মতো মনিষি হ'য়ে  
 পুণ্যের ঘরে শূন্য ;  
 সব কথা যদি খুলে বলি তবে  
 শক্র হাসিবে  
 বন্ধুরা হবে ক্ষুণ্ণ ।  
 স্মতরাং সব চেপেই যাই,  
 রোঢ়াবাঁধে এসে বন্ধুবরের খবর নাই ।  
 সে যে ছিল মোর সর্বযামী,  
 দেখা পেলে তারে জিজ্ঞাসিতাম  
 আসছে জন্মে কি হব আমি ?  
 জানায় দিতাম আমারও দাবি—  
 পথের প্রান্তে অশথগাছ, না  
 সদগোপেদের দুখোলো গাভী ?  
 আমার মতন মনিষিদের  
 খোলা আছে দুটি ভবিষ্যৎ,  
 হয় গোজন্ম নয় অশথ ।

মাঘ : ১৩৬০

## মোহিতলাল

দেশলাই ঠুকে কেরোসিন ঘুঁটে  
করলার যোগাযোগে—  
যে আগুন জলে উনোনে উনোনে  
মোদের অন্নভোগে,  
যা ফুটায় নিতি আফিসের ভাত  
বার্লি ও সাগুদানা,  
মুহু আছে আছে দালদা পেঁয়াজে  
বানায় মোদের ধানা ;  
উদরপোষণ সে পোষা আগুন  
ঘরে ঘরে মোরা চিনি ।  
রসনা-রসন তারি রসায়ন  
মোড়ে মোড়ে মোরা কিনি ।  
যে আগুন জলে যজ্ঞকুণ্ডে  
অরনি-সমুখিত  
হবি ও সমিধে কভু প্রোজ্জ্বল  
কখনো বা ধুমায়িত,  
যার রসনায় অশনি—শাণিত  
দৃপ্ত শিখার জ্বালা,  
যার ধুমজ্বালে গগনের ভালে  
ছেয়ে আসে মেঘমালা ।  
ইন্দ্র চন্দ্র বায়ু ধম যার  
প্রসাদ কামনা করে,  
স্বর্গশাসন সেই হতাশন  
কদাচিৎ চোখে পড়ে ।  
নিবিয়া গিয়াছে সারা বাংলার  
সেই হতাশন কবি,  
পড়িয়া রহিল হোমের ডম্ব  
আহত সমিধ্ হবি ।

ভাদ্র : ১৩৫৯

নিশান্তিকা

## কবিবন্ধু কালিদাসের প্রতি

আমারও ডাক পড়েছে আজি তোমার অভিনন্দনে,  
বুঝিছ সখা, প'ড়েছি তাহে কেমনই খইয়ে-বন্ধনে ।

তোমার মানা না মেনে যারা

তোমাতে টেনে ক'রেছে খাড়া

বনের পাখী খাঁচার রাধি' সাজাতে শকু-চন্দনে,  
তাদেরই দলে কর্মফলে পড়িছু খইয়ে-বন্ধনে ।

তুমি যে জান, ভালই জান, আমিও জানি কি এর দাম'  
এ কলিযুগে কেন যে বড় হরির চেয়ে হরির নাম ।

তোমাতে ভালবাসে গো যারা

বেশী কি ভালবাসিবে তারা ?

মুফতে-সারা রসিকজন কিনিবে বই দিয়ে কি দাম ?

মজা মারারা মারিবে মজা, শ্রদ্ধাহীন সিদ্ধকাম ।

খ্যাতির পথে খ্যাতির পেতে বন্ধু জানি এ পথ নয়,  
জীবনে হয় যে লালারিত করে না সে তো মৃত্যু জয় ।

তবুও তব ভক্ত মোরা

অর্থ্য হানি কাগজ ছোড়া,

কবির ভালে যা হয় হোক, ভক্তি যেন তৃপ্ত হয় ।

কথার হাওয়া লাগায় পালে যুগের খেয়া হজুগে বয় ।

যে নাম ধরি তোমাতে ডাকি মিত্রতার অহংকারে  
বিনা পালে ও বিনা লগিতে সে নাম চলে যুগের পারে ।

সে কথা যদি নীরবে স্মরি'

কবিরে ছেড়ে কাব্য পড়ি

এড়ায়ে যেতে পারি গো সখা জীবনে বহু লাঞ্ছনারে ।

কবিও যদি কাঙাল হয় মানুষ যাবে কাহার দ্বারে ?

তবুও আমি বন্ধু আজ তোমার নামে কবিতা বাঁধি,  
ক্ৰম গো ক্ৰম প্রলাপ মম পরম্পর-বিসংবাদী ।

জানি গো তব মহৎ চিত  
এ-সবে কত সংকুচিত,  
স্তবের বাণী সময়োচিত জুটে না, মিছে ছন্দ ছাঁদি ।  
দেশের দশা, কবির দশা কাঁদায় তোমা, আমিও কাঁদি ।

\* কথাসাহিত্য, চৈত্র ১৩৫৭ : কবি কালিদাস রায়ের সংবর্ধনা-সংখ্যার জন্ম লিখিত.

## মিতা কবি যতীন্দ্রমোহন

অনেক বন্ধু এসেছে, বন্ধু, তব অভিনন্দনে,—  
তোমার গানের আনন্দ শুধু জাগিছে সবার মনে ।  
গানের আড়ালে প্রাণের তন্ত্রী যে ব্যথার টানে কাঁপে,  
এ হতভাগ্য নিবিড় গভীর সেই বেদনাই মাপে ।  
তব সঙ্গীত সার্থক হ'ল যাদের বেদনা গাহি',  
তোমার তরনী পৌঁছিছে তীরে যাদের অশ্রু বাহি',  
এই আনন্দ দিনে  
চেয়েছিল তারা অনিমন্ত্রিত আসিবে পন্থা চিনে ।  
নিষেধ ক'রেছি, কেহ বা শুনেছে, কেহ তাহা শুনে নাই,  
তাদের হইয়া, বন্ধু, তোমার মার্জনা আমি চাই ।

কাঁটাবন হ'তে ব'লে পাঠায়েছে তোমার সাধের কেয়া,—  
'বন্ধুরে ব'লো, মোর শিরে আজও সমান ঝরিছে দেয়া ।  
কত কবি এল, কত কবি গেল, নিল অভিনন্দন,—  
কেয়ার অঙ্গে নিবিড় হ'ল যে কণ্টক-বন্ধন !  
আজও পাঠালাম বাদল বাতাসে গন্ধের উপহার,  
আনন্দ-দিনে কেয়ার কথা সে স্মরে যেন একবার ।'

তোমার পথের ঝরা শেফালীরা এসেছিল আজ ভোরে ;  
বেলা হ'ল যেই, মলিন মাধুরী আরবার গেল ম'রে ।  
চ'লে গেল তারা ভোরের তারার সাথে সাথে হাত ধরি' ;  
ব'লে গেল তারা ;—'ব'লো বন্ধুরে আজিও অঝোরে ঝরি ।'  
দিয়ে গেল তারা মর্ম্ববৃন্তে ছোপানো উত্তরীয় ;  
ক'য়ে গেল তারা,—“শরতের শত শপথ স্মরিয়ো প্রিয় ।”

হেরিছ বন্ধু,—বাদল-সন্ধ্যা বহি যায় কুলু কুলু,  
ভেসে' এল তায় কোন্ সাঁঝদীপ, কোথাকার ঝিঙাফুল ।

ভেসে যেতে যেতে ব'লে গেল তারা,—'ব'লো ব'লো বন্ধুরে,  
এক গাঁয়ে ছিল বসতি মোদের আজ চলি কোন দূরে !  
ব'লো তারে—মোরা আলো ক'রেছিছ যে কুটির যে আঙিনা,  
আজ বাদলের আঁধারে হয়ত কঠিন হবে তা চিনা,  
তবু ব'লো তারে ভাই ;  
সে ঘর আঙিনা আঁধারই রহিল, মোরা যাই ভেসে' যাই' ।

শুধা'ল নিশীথে তোমার গাঁয়ের চরের চক্রবাকী ;  
'সন্ধান তার পেল কি বন্ধু, আমার হারানো পাখী ?  
সে যে বলেছিল নিশি হ'লে ভোর আবার মিলিবি তোরা ;  
এ জীবন ভোর হয় নিশি ভোর ; ভাঙ্গা ত লাগেনি জোড়া ।  
ব'লো ব'লো ভাই, মোদের বন্ধু তোমার মিতারে ব'লো ;  
তাদের গাঁয়ের অবুঝ পাখীর দিন-রাত এক হ'লো ।'

এমনি কত না এল রবাহুত, তাদেরই বারতা বহি'  
এসেছি বন্ধু, বল তো কেমনে নিজ আনন্দ কহি ?  
এসেছি বন্ধু, মাথায় ধরিয়া আকাশের মেঘভার,  
যার বুকে তুমি সাতরঙা ধনু টঙ্কারো বার বার ;  
এসেছি বন্ধু, দুপায়ে দলিয়া ঝরা বকুলের রাশ,  
যে বকুল আজও তোমার গানের যোগায় জীবন শ্বাস ।  
নিষেধ ক'রেছি শোনেনি বন্ধু, সঙ্গে এসেছে চলি'  
তোমারই বৃকের মালঞ্চ হ'তে কীটে কাটা ক'টা কলি ।

আপনা হারিয়ে যারা বাড়াইল তোমার গানের গতি,  
আপনা ফুরিয়ে যারা পুরাইল তোমার প্রাণের ক্ষতি,  
তাদের পক্ষে তোমাতে হে কবি, দিগ্ন অভিনন্দন,  
সুন্দর যেন তোমারি ছন্দে তুলে তার ক্রন্দন ॥

\* রসচক্রের উজোগে কবি যতীন্দ্রমোহনের অভিনন্দন সভায় পঠিত ।



॥ अनुवाद ॥

## कोजागरी

रजनौ गभीर ह'ये आसे,  
ऋवतारा जलिछे आकाशे,  
धानक्षेत कुशाशय हारा,  
बिंबिंभरा वेणुवने चुपि चुपि चलेछे इसारा ।  
प्रहरी पिटाय लोहा-काठेर कांसर,  
प्यागोडाय घण्टार स्वर,  
दूरे दूरे कषकेरा मेतेछे क्रीडाय,  
आरओ दूरे कुटीरे के गाय ?

रजनौ गभीर ह'ये आसे ।  
कथा क'ये यাই मृदुभाषे,  
पाशापाशि व'से दुजनय,  
जीवन मधुर लागे रजनौर प्राय ।  
पाहाडेर गाये  
उठै आसे राडा चाँद गाछे गाछे आगुन धराये ।

ओई ऋवतारा  
जलितेछे फारुसेर पारा ।  
लघु वायुभरे  
शिशिरेर कणागुलि मुखे एसे पड़े,  
आसे दूर मादलेर ध्वनि,  
दुजने वसिया धाकि साराटि रजनौ ।

चैत्र : १७५४ ॥ आनामेर कविता ।

## বাঁশ-বাগান

কুটীর আমার ঘেরিয়া রয়েছে পুরানো বাঁশের বন,  
ঘরের মেঝেয় ছড়ানো ছিটানো কত পুঁথি পুরাতন ।  
মধুর তাহার ছায়ায় বসিয়া আরাম লভিতে চাই,  
সাধ হয় যত বড় কবিদের কবিতা পড়িয়া যাই ।

অমনি আমার মনে প'ড়ে যায়,—  
সেই যে জেলেটি, প্রতি সন্ধ্যায়  
পাঁচতারা হাতে বেতের ডোঙায় গাহিয়া চলেছে গান,  
জাল দেখে ফিরে নদী জলে জলে,  
ডোঙাখানি তার শ্রোতে ভেসে চলে  
আপন মনের খেয়াল খুসিতে গাহে সারা দিনমান ।

পরিণয় ডোরে বাঁধিবে আমারে দিয়ে গেল তার কথা,  
সেই যে জেলেটি, ফিরে তো এল না, না জানি রহিল কোথা ?  
ফেলিয়া গেল সে মাঝ গাঙে মোরে,  
ভাসিয়া বেড়াই কত ?  
গড়ায়ে গড়ায়ে শ্রোতের মুখের  
বেতের ডোঙার মত ।

চৈত্র : ১৩৫৪ ॥ আনামের কবিতা ॥

## স্বচ্ছ নদীর বালিকা

স্বচ্ছ নদীটি ন'টি বাঁকে বেঁকে চলে,  
স্বচ্ছ নদীটি, অগাধ জলের তলে  
সবার নয়ন হইতে আপন সবুজ বালুরে ঢাকে ।  
স্বচ্ছ নদীর ভরি দুই তীর সারাবেলা পাখী ডাকে ;  
ডিক্, ডিক্, ডিক্, ডিক্, ডিক্, ডিউ, ডিক্ ।

কে বালিকা তার পান্নার আঁধি মেলি'  
দাঁড়ায়েছে ঐ মগুপ দ্বারে হেলি' ?  
হৃদয়ে তাহার চাঁদের উদয়, তন্ময় প্রেম-গানে,  
যে প্রেমের গান নদীর উজান বহিয়া আসিছে কানে ।

আঙিনার পারে বাঁশের দুয়ার-ধারে,  
আপনি স্বপন বিভোর করেছে তারে ।  
বিলম্ব আর নহে ক্ষণকাল,  
ছাড়িয়া চলিহু ছায়ার আড়াল,  
কবিতার কথা প্রণয় বারতা শুনাইব বালিকারে ।

চৈত্র : ১৩৫৪ ॥ আনামের কবিতা ।

## একক শয়নে

আলো করি নিজ নিশীথ শয়ন  
অকাতরে তুমি ঘুমাও যখন  
আমি না দেখিতে পাই,  
স্বপন হইয়া ক্ষণতরে এসে  
খেলা ক'রে যাব তব কালোকেশে,  
সে আশাও মোর নাই ।

তবু মনে মনে আছে বিশ্বাস,—  
চিনি আমি তব পাশ-ফেরা শ্বাস  
নির্ভরময় ললিত ভুজের  
সর্ব সমর্পণ ;  
যে রাত আমার হবে না প্রভাত  
তুমি সে রাতেরি ধন ।

চৈত্র : ১৩৫৪ ॥ আরবীয় কবিতা ॥

### মুঞ্জ তৃণ

আমরা ছিলাম দুই তীরে দুটি শ্যামল মুঞ্জ তৃণ,  
ছোট নদীটি মাঝখানে বহি' চলে ।  
পরস্পরের পরশ তো মোরা পেতাম না কোন দিনও  
উপাড়িয়া যদি না নিত স্রোতের জলে ;  
না আসিলে শীত কে বল বাঁধিত আমাদের দুই জনে  
জমাট হিমের তুহিন-ঘুমের নিবিড় আলিঙ্গনে ?

চৈত্র : ১৩৫৪ ॥ চীনদেশীয় কবিতা ॥

### উইলো পাতা

জানালার ব'সে স্বপন দেখে যে  
ভালবাসি সেই মেয়েটির ।  
শিল্প-বাহার সৌধ তাহার  
আছে বটে পীত নদীতীরে,  
শুধু সেই জন্তেই ভালবাসিনে সে  
মেয়েটির ।  
উইলো পাতাটি তারি হাত হ'তে  
ধ'সে পড়েছিল নদীনীরে,  
তাই ভালবাসি সেই মেয়েটির ।

বড় ভালবাসি পূবে হাওয়া ।  
পূব্, পাহাড়ের ফুলে ফুলে সাদা  
পীচের সুরভি যায় পাওয়া ।  
শুধু সেই জগ্গেই ভালবাসিনে গো  
পূবে হাওয়া ।  
উইলো পাতাটি সেই এনে দিল  
চলছিল যবে তরী বাওয়া,  
তাই বড় ভালবাসি পূবে হাওয়া ।

উইলো পাতাটি বাসি ভালো ।  
তারি মুখে শুনি নব বসন্তে  
কবে ফের ধরা হবে আলো,  
শুধু সেই জগ্গেই পাতাটিরে নাহি  
বাসি ভালো,  
ফুল তোলা স্মৃচে মোর নাম তাহে  
মেয়েটি যে উৎকীর্ণা'ল  
তাই উইলো পাতাটি বাসি ভালো ।

চৈত্র : ১৩৫৪ ॥ চীনদেশীয় কবিতা ॥

### কমলা পাতার ছায়া

একেলা কিশোরী ঘরে  
তোলে ঘাগরার 'পরে  
সারাবেলা রেশমের ফুল ।  
সহসা বাণীর ধ্বনি,  
শুনিয়া শিহরে ধনি,  
কে যেন কিশোর তার চুমে শ্রুতিমূল ।

কম্লার পাতাগুলি  
বাতাসে উঠিছে হুলি'  
মোমজামি জানালার পিছে ।  
ছায়াগুলি জানু 'পরে  
ছুটোছুটী খেলা করে  
কে যেন ঘাগরাখানি টানিয়া ছি ড়িছে ।

চৈত্র : ১৩৫৪ ॥ চীনদেশীয় কবিতা ॥

### বিয়ের প্রস্তাব

তরমুজেরি বীজের মত তোমার আঁধি কালো ।  
তরমুজেরি শাঁসের মত ঠোঁট দুখানি রাঙা,  
সুডৌল তরমুজেরি মত মোহন কটিদেশ,  
তোমাতে লাগে বেশ ।  
আমার প্রিয় অশ্বী হ'তে তুমি যে সুন্দর,  
নিতম্বটি তাহারো চেয়ে নিটোল দৃঢ়তর,  
হাল্কা তালে তুল্কি চালে চলন তারি সম ;—  
মহোৎসব করিব যদি এসো গো ঘরে মম ।

এক-এক দলে একশ' মেঘ, একশ' হেন দল  
চরছে তারা তরাই ছেয়ে হিমালয়ের তল ।  
তা থেকে বেছে আন্ব ছুটি সব্-সে-সেরা মেঘ—  
রেশ্‌মী লোম, নধর দেহ, গাঁট্টা-গোটা বেশ ;  
পাণ্ডুঠাকুরের দেউলে দুজনে যাব চলি'  
তোমার লাগি পুত্র মাগি' একটি দেব বলি ।  
আরেকটিরে জবাই ক'রে, গোলাপ-ডালে বিঁধে  
গোটাকে-গোটা ঝলসে নেব কাবাব কোরে সিধে ।  
ভোজের দিনে নিমন্ত্রিয়া করব আমি জড়ো  
দেখতে যারা খুবসুরৎ, ভোজনে পানে দড় ।

চলবে যবে খানা ও পিনা সমানে তিন রোজ,  
তোমারে ঘিরে আমার ঘরে চলবে যবে ভোজ ।  
পরাব হাতে রূপোর বালা, পায়েতে পায়জোর,  
গলায় দেবো সোনার মালা, এস গো ঘরে মোর ।

[ Song of Kafiristan ] চৈত্র : ১৩২৪

### বসন্তে বাদল

কালকে বাদল ঝরেছিল সারারাত,  
আজ ফিরে এল স্বচ্ছ সুপ্রভাত ।  
সিক্ত শ্রামল তালীকুঞ্জের সার,  
বুক মেলে দিয়ে ছায়া ফেলিতেছে তার ।  
ব্যথার বাদল ঝরে তবু মোরে ঘিরে,  
শ্বতিভারাতুর ঘরটিতে মোর আসি যাই ঘুরে ফিরে ।  
আশপাশ হ'তে শ্রামল তরুর দল  
শ্রাম ছায়া ফেলে জানালার পর্দায়,  
শিশিরসিক্ত মখমলী শৈবাল  
পরশে পরশে পুলকাঙ্কিত কায়,  
কমলা রঙের জালি ওড়নার তলে  
আংরাখাটির আবছায়া রাঙা গোলাপের বুকে টলে ।  
দেখি আর মনে হয়,—  
চারিদিকে মোর সকলই আবার মধুর জীবনময় ।

ছাদে গিয়ে বসি  
করিবার কিছু নাই,  
শুধু গুণে গুণে যাই,—  
কত মাঠ,  
কত পর্বত,  
কত উপত্যকা,  
কত নদী দিয়ে মোর বসন্ত পড়িল ঢাকা ।

মাথাটা রেখে হাতে  
চেয়েই আছি খাতার সাদা পাতে,  
তুলির মুখে শুকিয়ে ওঠে কালি  
দেখছি তাই খালি।

ঘুমিয়ে গেল প্রাণ,—  
জাগবে কিনা কে জানে সন্ধান ?

ঝরতি রোদুরে  
খানিক আসি ঘুরে  
ফুলের গায়ে বুলিয়ে হাত উঁচু শাখার চূড়ে।

ঐ তো বন কোমল-ঘন শ্রামল শোভাময়ী,  
ঐ তো দূরে তুষার-ভাঙা  
উজল রবিকিরণে রাঙা  
নিপুণ-আঁকা শৈলরেখা কী সুন্দর ওই !

মেঘেরা দেখি চ'লেছে ধীরে ভেসে,  
কাকেরা করে ব্যঙ্গ—শুনি কানে।  
বসিয়া পড়ি আবার ঘুরে এসে  
চাহিয়া থাকি সাদা পাতার পানে ;  
ভুলি যে তবু আঁচড় নাহি টানে।

[ Chang-Ohi (770-850) ] চৈত্র : ১৩৫৪



## স্মৃতিকথা

বর্তমান আমার সমবয়স্ক, অন্তরঙ্গ ও অভেদাত্মা বাল্যবন্ধু ।

এত কাল পরে সেদিন তার ইচ্ছা হয়েছে নিজের জন্মদিন নিয়ে একটা কবিতা লেখে । কিন্তু জন্মদিনটা মনে নেই, কারণ সেটার প্রয়োজন জীবনে হয়নি । আমার জিজ্ঞাসা করলে, ‘ভাই, তোর ত সবই মনে থাকে, আমার জন্ম-তারিখটা বলে দে ।’ আমি হেসে বললাম, ‘মনে হচ্ছে, তোর কোষ্ঠিতে লেখা ছিল আষাঢ়শ্র ত্রয়োদশ দিবসে ।’ কোষ্ঠী খুলে দেখা গেল সে জায়গাটা ছিন্ন, কীটদষ্ট । প্রায় ৬৪ বৎসরের পুরানো কাগজ, দোষ দেওয়া যায় না । যাই হোক, আমার কথায় বিশ্বাস ক’রেই ষতীন জন্মদিন শীর্ষক কবিতা লিখে এনে আমার শোনাল :—

মেঘের আড়ালে তেরই আষাঢ় চুপি চুপি চ’লে যায়,  
অপরিচিতের মতন এবারও বিদায় দিবি কি তায় ?  
বার বার বার তেরই আষাঢ় এসেছে গিয়েছে চলি’,  
নয়নধারায় করিয়া সিক্ত কোন কথাটি না বলি ।  
এবার সাধিয়া শুধাও তাহারে কি চাহে সে বলিবারে,  
জীবনে যাহারে করিনি স্মরণ, বরণ করহ তারে ।  
তারি বন্ধের সজল শ্বাসে ভরি’ লহ তব বুক,  
এই দিনটির দর্পণে দেখ সারা জীবনের মুখ ।  
আজিকার কালো, রবি-শশাঙ্কে হয়নি কলংকিত.  
কাল-সাগরের কৃষ্ণ কমল পূর্ণ প্রস্ফুটিত !  
ঢল ঢল তার নির্মম শোভা সনির্বন্ধ ডাকে,  
তারি গন্ধের মেতুর ছন্দে সকল গগন ঢাকে,  
তারি বৃকে নেমে আলোকের পাখা হ’ল গুঞ্জনহীন,  
মর্মের কোষে তপন তারকা তারি মধুপানে লীন ।

\*শ্রীবিপ্রতীপ গুপ্ত ছদ্মনামে লিখিত কবির এই আত্মস্মৃতি ১৩৫৬ সালে মাসিক বহুমতীর শ্রাবণ সংখ্যায় প্রকাশিত হয় ।

চির কলংকী ওরে কবি, তোর কী সৌভাগ্য বল  
এই দিনটির মৃগালে ফুটিল হেন সহস্রদল ॥

পেরেছিঁস্ কি রে চিন্তে ?

মরণ-কমল ফুটে আছে ওই জন্মদিনের বসন্তে ।

চেয়ে থাক্ চেয়ে থাক্

বন্দনাহীন অর্ঘ্যবিহীন নিশ্চল নির্বাক্ ।

এই কুড়ি ছত্রের কবিতাটি ১৩ই আষাঢ়ে আরম্ভ কোরে ১৫ই আষাঢ় শেষ হ'য়েছে ; আর জন্মদিন উপলক্ষে মৃত্যুকে টেনে এনে হাজির করেছে । যতীনের এই রকমই হয় । কবিতা শুনে বাহবা দিলাম ; কারণ, বুঝলাম, বন্ধু তাই চায় ।

বাল্যে বা কৈশোরে যতীনের কবিতা-রোগ দেখিনি । ৮ বছর বয়সে সেই যে ম্যালেরিয়ার ধরল, স্বরূপে বা বহুরূপী হ'য়ে আজ পর্যন্ত তাকে আর রেহাই দেয়নি । নদীয়া জেলার হরিপুর গ্রাম যার পিতৃভূমি, আর বর্ধমান জেলার পাতিলপাড়া যার মাতৃভূমি এবং জন্মভূমি, সে যে এখনও বেঁচে আছে এই আশ্চর্য! তার পাচ-ছয় ভাই-বোন কেউ শৈশব উত্তীর্ণ হয়নি ।

১২ বছর বয়সে গ্রামের স্কুল থেকে ছাত্রবৃত্তি পাশ ক'রে সে কলকাতায় গেল কাকার বাসায় থেকে পড়াশুনা করতে । বছর দেড়েক স্কুলে অধ্যয়ন করার পর হ'ল তার বিউবনিক প্লেগ । আমাদের পল্লীবাসীর দেহ তখনকার দিনে ম্যালেরিয়ার কাছে বন্ধক দেওয়া, সহরের প্লেগ আমল পেল না, যতীন সেরে উঠল । মাস ছয়েক পরে আবার তাকে ধরল তখনকার বাতশ্লেষ্মিক বিকার, এখনকার টাইফয়েড । নাড়ী-টাড়ি ছেড়ে গেল, কিন্তু প্রাণ রইল । আমরা বললাম, 'যতীন, আর কলকাতায় গিয়ে কাজ নেই, পাশের গ্রামে হাইস্কুল হয়েছে, সেইখানে পড়ি চল্ ।' তাই হ'ল ।

মাস কয়েক সেখানকার দ্বিতীয় শ্রেণীতে পড়ার পর যতীন আরও শীর্ণ হ'য়ে পড়ল । তার পিতা তখন বালেশ্বরে সামান্য চাকরি করেন । তিনি তাকে সেখানে নিয়ে গিয়ে স্কুলে ভর্তি কোরে দিলেন ।

জলহাওয়ার গুণে যতীন কয়েক মাসে মোটা হ'য়ে উঠল; কিন্তু বাপের গেল চাকরি। কলকাতায় ফিরে এসে ওরিয়েন্ট্যাল সেমিনারি বিদ্যালয়ে অধ্যয়ন ও ১৯০৩ খৃঃএ এন্ট্রেন্স পরীক্ষায় উত্তরণ। বেনেটোলার মেসে যখন একসঙ্গে থাকতাম, তখন এক এক দিন বলতাম—যতীন, তোর জ্বর এলে লেপ চাপা দিয়ে স্কুলে যাই, ফিরে এসে কোন দিন দেখব মরে প'ড়ে আছি। সে বিস্কুট খায়, বীজগণিত কষে, আর হাসে।

সেদিনের জেনারাল এ্যাসেম্ব্লি (এখনকার স্কটিস্ চার্চ) কলেজ থেকে ১৮ বছর বয়সে এফ-এ পরীক্ষায় উত্তীর্ণ হ'য়ে কোন্ লাইনে যাওয়া যায় এই নিয়ে যখন আলোচনা হচ্ছে তখন এক বন্ধু এসে বললেন, 'শিবপুর ইঞ্জিনিয়ারিং কলেজের হোষ্টেলে থাকতে পেলে জীবন ধন হ'য়ে যাবে। অভিভাবকের কোন বালাই নেই, তার উপর হোষ্টেল-প্রাক্ষণের পুকুরে যে পদ্ম ফুটে থাকে তা তুলনাহীন।' পদ্মের লোভেই যতীন অভিভাবকদের মত করিয়ে ইঞ্জিনিয়ারিং কলেজে ভর্তি হ'তে গেল। এই ব্যাপারে তার কবিত্ব সম্পর্কে সন্দেহ আমাদের মনে প্রথম জাগে।...কিন্তু ইঞ্জিনিয়ারিং কলেজ যে কি বস্তু, সে বিষয়ে যতীন বা তার অভিভাবকদের কোনই ধারণা ছিল না। পদ্ম-পুকুরের সন্নিকটে বসেই প্রাবেশিক পরীক্ষা করলেন সেখানকার ডাক্তার। বকের মাপ, দেহের ওজন, সবই কম হ'ল। তখন ডাক্তার বাবু আর একটা পরীক্ষা করলেন। সেই তৃতীয় প্রহরের নিদাঘ-রৌদ্রে দূরের একটা অশ্বখ গাছ দেখিয়ে বললেন—ঐ পর্যন্ত জোরে ছুটে গিয়েই ছুটে ফিরে এস। হাঁপিয়ে গেলেও যতীন সেটা ভালোই পারল। কিন্তু সেই অবস্থায় তাকে যখন 'ষ্টেটস্ম্যান' কাগজ উন্টে ক'রে পড়তে দেওয়া হ'ল তখন আর পাশ-ফেল বোঝা গেল না। ডাক্তার বললেন তুমি বি-এ পড়গে যাও। সে যখন বারান্দা ছেড়ে নেমে যাচ্ছে, তখন ডাক্তার বাবু করুণাপরবশ হয়ে পাশ করিয়ে দিলেন; অর্থাৎ বকের মাপ দেহের ওজন ইত্যাদি বাড়িয়ে লিখে দিলেন। আমরা ইঞ্জিনিয়ার হবার জন্ম কোমর বাঁধলাম।

লেখাপড়া যা হয় হ'তে লাগল, কিন্তু মুস্তিলে পড়া গেল ওয়ার্কশপ

নিয়ে। প্রথম বৎসর ছুতারখানার কাজ। প্রথমেই প্রত্যেককে রেলের স্লিপারের মত এক একটা কাঠ দিয়ে হাতকরাতে সাহায্যে সেটাকে ফালা-ফালা কোরে চিরতে বলা হ'ল। সেই সামান্য কাজটুকু সুসম্পন্ন করার পর আসল কাজ শেখানো হবে। দু'-তিন দিনের মধ্যে দু'হাতে ফোকা প'ড়ে, গ'লে, ঘা হ'য়ে গেল, কিন্তু কাঠ বিদীর্ণ হ'ল না। দু'-চার জন তার পরই সরে পড়লেন অভিভাবকদের বহু টাকা নষ্ট ক'রে। মনে হচ্ছে, বর্তমানের এক জন রাজ্যমন্ত্রী তাঁদেরই অন্ততম। ব্যাড্‌মিণ্টন খেলার মাঠে তিনি বাঁ হাতের কর্কে কিছুতেই ডান হাতের ব্যাট ঠেকাতে পারতেন না; সেও বোধ হয় কলেজ ছাড়বার আর একটা কারণ। ভালোই করেছিলেন; আজ তিনি ত্যাগধন্য ও দেশমান্য।

যাই হোক, আমরা গরীবের ছেলে, প্রাণপণে কাজ ও পড়া চালিয়ে যেতে লাগলাম। যতীনের মাঝে-মাঝে জ্বর হয়, কিন্তু ডাক্তারখানায় কুইনাইনের দাম লাগে না, এবং কুইনাইন মিক্সচার খেয়েও যতীনের আর মুখ ধোবার বিশেষ দরকার হয় না। ডাক্তার পথ্য পাঠান—পাঁউরুটি আর মাংসের ঝোল। সে ডাক্তারটির বিশ্বাস ছিল পুষ্টিকর খাওয়ার অভাবেই বাঙ্গালীর ছেলেদের অত ম্যালেরিয়া হয়, বিশেষত শিবপুর কলেজের ঐ খাটুনির পর, মাত্র ডাল-ভাত খেয়ে। যারা সুস্থ তাদের কোন সাহায্য তিনি করতে পারতেন না, কিন্তু রোগী হ'লে তিনি ঐ প্রকার পথ্যের ব্যবস্থা করতেন।

বন্ধু মিহিরলালের সঙ্গে যতীনের তর্ক বেধেছে। মিহির বলে, রবীন্দ্রনাথের মত কবি বাংলার জন্মায়নি। যতীন উত্তপ্ত হ'য়ে জানায়, নবীন সেনের 'কুরুক্ষেত্র' যে প'ড়েছে সে ও-কথা বলবে না। কিছু দিন পূর্বে আমরা কুরুক্ষেত্র পড়েছিলাম, মাইকেলের 'সীতা ও সরমা' অংশ, হেমচন্দ্রের 'অশোক তরু' প্রভৃতি দশ-বিশটা কবিতাও পড়া ছিল। বাল্যকালে পিসিমার কাশীরাম দাসের মহাভারতখানি যতীন দেখিয়ে-লুকিয়ে কয়েক বার শেষ করেছিল। গ্রামের মুচিপাড়া ও কুলোপাড়ার বারোয়ারি পূজায় কবির গান ও তর্জার লড়াই আমরা শুনেছি। কিন্তু রবি ঠাকুরের কবিতা আমরা তখনও পড়িনি,

গান দু'-দশটা শুনেছি। মিহির যুহ হেসে বলল—নবীন সেন ও রবীন্দ্রনাথে কি তফাত সেটা বোঝাবার জন্য রবি বাবুর কাব্যগ্রন্থাবলী তোমাদের দেব, আগামী বর্ষাবকাশে প'ড়ে দেখ, তার পরে তর্ক কোরো। মিহির-প্রদত্ত, আড়ে-দীঘে সমান, একখানি প্রকাণ্ড রবীন্দ্রকাব্য গ্রন্থাবলী নিয়ে ছুটির সময় হরিপুরে এলাম। পড়ে দেখে আমরা তো অবাক! হায় নবীন সেন! এই বিত্তে নিয়ে মিহিরের সঙ্গে তর্ক করা হচ্ছিল। বয়স তখন উনিশ উত্তীর্ণপ্রায়। যতীন বললে ধরিদ্রী দ্বিধা হও।

যাক, ছুতারশাল-কামারশাল-কণ্টকিত বিচার পরীক্ষায় শেষ পর্যন্ত কষ্টে-স্বষ্টে পাশ কোরে যতীন ট্রেনিং নিতে ঢাকায় গেল। সেখান থেকে ফিরে পিতৃভূমি নদীয়ার জেলা-বোর্ডে চাকরি জুটল ১৯১৩ খৃঃএ। এই তার কর্মজীবনের সূত্রপাত। তখনকার জেলা-বোর্ডের প্রবীণ ও প্রধান ইঞ্জিনিয়ারের বাড়ী কৃষ্ণনগরেই। প্রথম বয়সে কিছু দিন P. W. D.তে চাকরি ক'রে তিনি অনেকটা গুছিয়ে নিয়েছিলেন। তাঁদের বংশেরও ধনখ্যাতি ছিল। তার উপর তাঁর পরিবারবর্গ বলতে তিনি ও তাঁর পরিবার। সুতরাং অর্থের প্রয়োজন তেমন নয়। তাঁরই স্নেহছায়ায় ও সহকারী হিসাবে চাকরি আরম্ভ ক'রে যতীনের আর উপরি-পাওনা নেবার অবকাশ বা অভ্যাস হ'ল না। আমি বলেছিলাম, 'শুকনো মাহিনায় তোমার চলবে না! সংঘম থাকলে মদ খেলেও মাতাল হয় না, চুরি করলেও চোর হয় না; আর শতকরা হিসাবে ঠিকাদারদের লাভের অংশমাত্র গ্রহণ করলে ইঞ্জিনিয়ারিং বিভাগে সেটা চুরি নয়।' যতীনের সাহসে কুলিয়ে উঠল না। ক্রমে দেখলাম, এ বিষয়ে তার একটা অহমিকাও জন্মে গেল।

প্রধান ইঞ্জিনিয়ারের একটি প্রধান দোষ ছিল, তিনি সে সময় চোখে বিশেষ কিছু দেখতে পেতেন না। জেলা-বোর্ডের চাকরিতেই একটা এ্যাকসিডেন্ট হ'য়ে একটি চোখ পূর্বেই নষ্ট হ'য়ে যায় এবং বাকিটিতে বেশ ঝাপসা দেখতেন। অতিশয় অমায়িক, সদাশয় পুরুষ; বোর্ডের সদস্যদের বিশেষ প্রিয়। জেলা-ম্যাজিস্ট্রেট অর্থাৎ বোর্ডের

চেয়ারম্যান বাঙ্গালী এবং তাঁর কৈশোরের বন্ধু। কার্ঘ্যে অভিজ্ঞতা যথেষ্ট। স্মৃতরাং সেই ঝাপসা-দেখা একটি চোখেই জেলা-বোর্ডের কাজ চালিয়ে যাবার পক্ষে যথেষ্ট বিবেচিত হচ্ছিল। কার্ঘ্যপরিদর্শনে গিয়ে পল্লীপথে সাদা গরুকে ভদ্রমহিলা মনে কোরে তিনি পথের এক পাশে দাঁড়াতেন, আবার ভদ্রমহিলাকে গরু মনে কোরে লাঠি উঁচিয়ে পূর্বের ভ্রম সংশোধন ক'রে নিতেন, এমন রটনাও ওভারশিয়াররা করত। কিন্তু সে সব অবিশ্বাস্য কথা কোন দিন বোর্ডের মিটিঙে ওঠেনি।

এমন সময় এক জন বঙ্গবিশ্বত দৃষ্টপ্রকৃতি আধ্যাপা ইংরেজ ম্যাজিষ্ট্রেটের আগমন সম্ভাবনায় ইঞ্জিনিয়ার বিচলিত হ'য়ে উঠলেন। ঐ সাহেবের এমন বদনাম ছিল যে, পূর্বে তিনি আর এক জন ইঞ্জিনিয়ারকে প্রহার দিয়েছিলেন। তিনি সত্য সত্যই এলেন এবং প্রথমেই বোর্ডের ভাইস-চেয়ারম্যানকে ছোট এক টুকরো কাগজে লিখে পাঠালেন—‘এই অন্ধ ইঞ্জিনিয়ার কত দিন হ'তে বোর্ডকে প্রতারিত করছে এবং বোর্ড তার নিকট কি পরিমাণ টাকা ক্ষতিপূরণস্বরূপ দাবী করতে পারে, আমরা জানানো হ'উক।’ বিষয়টি বোর্ডের অধিবেশনে পেশ করতে হ'ল এবং সদস্যদের নির্বন্ধাতিশয়ে সাহেব-সভাপতি ইঞ্জিনিয়ারকে এক বৎসরের ছুটি দিলেন, আর যতীনের উপর ভার পড়ল অস্থায়ী ভাবে তাঁর কাজ চালিয়ে যাওয়ার। সাহেবের ইচ্ছা, ইতিমধ্যে এক জন উপযুক্ত ইঞ্জিনিয়ার খুঁজে নেবেন।

এ-সাহেব যে-কোন সময় দু'-চার ঘা বসিয়ে দিতে পারে ; স্মৃতরাং যতীনকে প্রাণপণে চাকরি করতে হ'ল। সাহেব খুশি হলেন এবং অল্প ইঞ্জিনিয়ার খোঁজা বন্ধ করলেন। কিন্তু নদীয়া জেলার আবহাওয়ায় অতিপরিশ্রমে যতীনের স্বাস্থ্যভঙ্গ হ'ল। সেটা হ'তে অবশ্য বেশ কিছু দিন সময় লেগেছিল। তার মধ্যে বৃদ্ধ ইঞ্জিনিয়ার ছুটি পান, আর যতীন কাজ চালিয়ে যান। এই অবস্থা। যতীনের চাকরি যখন পাকা হওয়ার কোন বাধা দেখা যাচ্ছে না, তখন ঘুঁটি কেঁচে গেল। সাহেব বদলি হ'য়ে গিয়েছেন, অন্ধ

ইঞ্জিনিয়ার অন্ত্রোপচারের ফলে আবার ঝাপসা দেখছেন, ম্যাজিস্ট্রেট-চেয়ারম্যানের পরিবর্তিত হওয়ার বেসরকারী চেয়ারম্যান পেয়ে বোর্ড পূর্ণ স্বায়ত্তশাসন করায়ত্ত করেছে। স্মরণীয় বুদ্ধি ভূতপূর্ব ইঞ্জিনিয়ার মাত্র ছয় মাসের জন্ম কাজে যোগ দেবার প্রার্থনা জানিয়ে দরখাস্ত করলেন। কিন্তু তার একটা অন্তরায় উপস্থিত হ'ল। বোর্ডের কাগজপত্রে দেখা গেল, তাঁর বয়ঃক্রম তখন চাকরির সীমারেখা অতিক্রম করেছে, অর্থাৎ আইনানুসারে তাঁর আর চাকরি করা চলে না। তিনি আর একটা সরকারী নথি থেকে নজীর দেখালেন, বয়স এখনও সীমারেখার মধ্যেই আছে। দু'টি বয়সের মধ্যে মাত্র ৫ বৎসর তফাত। আসলে, ছাপার দোষে ইংরাজি আর্ট এক স্থানে তিন হ'য়েছে : আর আর্টটাই যে ঠিক সে বিষয়ে তাঁর বা অপর কারও কোন সন্দেহ ছিল না। যাই হোক, দু'টি বয়সের মধ্যে কোনটি ঠিক, তাঁকে এফিডেবিট করতে বলা হল। এফিডেবিট না ক'রে তাঁর বয়স কত, সে বিষয় সিদ্ধান্ত করবার ভার তিনি বোর্ডের উপর দিলেন। বোর্ডের অধিবেশনে ভোটে তাঁর বয়স ধার্য করা হ'ল এবং তাঁকে ৬ মাসের জন্ম কাজে যোগ দেওয়ার অনুমতি দেওয়া হ'ল। যতীন পেল ঐ ছ'মাসের ছুটি।

চাকা বিপরীত দিকে ঘুরছে। উন্নয়নশীল যতীন নেয় ছুটি, আর ঝাপসা-দৃষ্টি ইঞ্জিনিয়ার পান extension। স্বগ্রামে ব'সে যতীন চরকা চালায়, খদ্দর বোনায়, কিন্তু জেল খাটে না। একটা দেশলাইএর হাতকল কিনে গ্রামস্থ বালক-শ্রমিকের সাহায্য নিয়ে ভাবে এই দুই কুটিরশিল্পের দৌলতে গ্রামের উপকার এবং তারও জীবিকার সংস্থান হবে। স্বাস্থ্যের যে প্রকার অবস্থা তাতে রাস্তায়-রাস্তায় ঘুরে বোর্ডের চাকরি করবার আশা বা ইচ্ছা তার আর নেই। খদ্দরে আর সেদিনকার দেশী দেশলাইএ যে পেট ভরবে না, সে কথা সবাই বুঝেছে, যতীন বুঝেছে না। এমন সময়, প্রায় তিন বৎসর পরে তার জুটে গেল কাশিমবাজারের প্রাতঃস্মরণীয় মহারাজা মনীন্দ্রচন্দ্রের এষ্টেটে ইঞ্জিনিয়ারের চাকরি। অত্যন্ত অনিচ্ছায়, আত্মীয়-স্বজনের আগ্রহে দেশলাই ফেলে এবং চরকা নিয়ে যতীন যোগ



দিনে সেই কাজে ১৯২৩ সালে, যখন তার বয়স ৩৬ বৎসর। সেই বৎসর তার প্রথম কবিতা-পুস্তক 'মরীচিকা' প্রকাশিত হয়। এর কবিতাগুলি কৃষ্ণনগরে চাকরি করবার সময় ও তৎপূর্বে রচিত। স্বাস্থ্যভঙ্গের তিন বৎসর যতীন কোন কবিতা লেখেনি।

কাশিমবাজারের চাকরিতে যোগ দিয়েই যতীনের ঘাড়ে আরার সাহেবই চাপল। ঋণগ্রস্ত মহারাজা স্থির করেছেন নিজের একমাত্র প্রাপ্তবয়স্ক পুত্রের পরিবর্তে এক ছুঁদে ও অবসরপ্রাপ্ত সিভিলিয়ান সাহেবকে যৌবরাজ্যে অভিষিক্ত করে নিজে বানপ্রস্থ অবলম্বন করবেন। তাই হ'ল এবং সাহেব এলেন। কৃষ্ণনগরের সাহেবটির মত এঁরও সুনাম আছে, প্রয়োজন হ'লে চাবুক চালাতে দ্বিধা করেন না। কাশিমবাজারের বৈষ্ণবরাজ্যে সাহেবি আমল প্রবর্তিত হওয়ার সঙ্গে সঙ্গে পুরাতন কর্মচারীদের প্রায় সকলেরই চাকরি গেল, যতীন নূতন ব'লেই বোধ হয় চাকরিটা থাকল।

মহারাজা যে সাহেবটিকে যৌবরাজ্যে অভিষিক্ত করলেন, তিনি অপ্রতিহত প্রভাবে ছয় বৎসর রাজদণ্ড চালনা করেছিলেন। সাহেব প্রথমেই পুরাতন কর্মচারী ও কর্মপদ্ধতি পরিবর্তন ক'রে নূতন নূতন লোক নিযুক্ত করতে লাগলেন। জমিদারী সেরেস্টার পুরোনো পদবী ঝাটিল হ'য়ে এ্যাকাউন্টেন্ট, সুপারিনটেন্ডেন্ট, অডিটার ইত্যাদি নূতন পদে নিত্য নব লোকের আগমন শুরু হ'ল। তাঁদের মধ্যে অধিকাংশই গবর্নমেন্টের অবসরপ্রাপ্ত বৃদ্ধ কর্মচারী। বেতন পূর্বাপেক্ষা অনেক বেশী, যোগ্যতাও বোধ হয় বেশী। প্রত্যহ নূতন নূতন বৃদ্ধের আগমন দেখে মহারাজারই এক বৃদ্ধ সুরসিক কর্মচারী এক দিন বললেন, এমনি ঘটনা এ রাজ্যে আর একবার ঘটেছিল। সকলে বিস্মিত হ'য়ে তাঁকে ঘিরে বসলে তিনি গল্প শুরু করলেন :

“তখনকার রাজা বর্তমান মহারাজার স্থায় এমন খাঁটি বৈষ্ণব ছিলেন না, মাঝে-মাঝে একটু-আধটু শাস্ত্রপথেও চলতেন! পূজার সময় রাজবাড়ীর সুপ্রশস্ত নাট্যমন্দিরে যাত্রাধান চলাছে; আবাণ-বৃদ্ধ-বন্দিভা একমনে গুনছে! রাজা চলেছেন সদর থেকে অন্দরমহলে। মাঝে নাট্যমন্দির পাশ হবার সময় দেখলেন, যাত্রার আসরে কে এক



জন লক্ষিতশাশ্রু বৃদ্ধ চমৎকার বক্তৃতা করছে। রাজা পার্শ্বস্থ পারিষদকে জিজ্ঞাসা করলেন—‘ও কোন্ হ্যায় ?’ পারিষদ করযোড়ে নিবেদন করল—‘হজুর, ও নারদ মুনি হ্যায়।’ রাজা বললেন—‘ও ত বহুৎ আচ্ছা বোলতা হায়, অউর মুনি হ্যায় ?’ চারি দিকে সাড়া প’ড়ে গেল, যাত্রার অধিকারী রাজ-ইচ্ছা বুঝে তৎক্ষণাৎ বশিষ্ঠ মুনিকে আসরে নামালেন, যদিও বশিষ্ঠ মুনির সে সময় আসবার কোন কারণ ছিল না। রাজা বশিষ্ঠকে দেখে আরও মুগ্ধ হলেন, এবং হুকুম করলেন ‘অউর মুনি লে আও।’ তখনি আর এক জনকে পাকা দাড়ি পরিয়ে মুনি সাজিয়ে আনা হ’ল। রাজা তখন আসরে তাঁর নির্দিষ্ট আসনে বসেছেন এবং হুকুম দিচ্ছেন—‘অউর মুনি লে আও।’ যাত্রার দলে যে কয়টা পাকা, ডাঁসা দাড়ি ছিল ফুরিয়ে গেল, তখনও রাজা মুগ্ধ হয়ে বলছেন—‘অউর মুনি লে আও।’ শেষে রাজবাড়ীর গুদাম থেকে শণ পাট বার করে তারি সাহায্যে মুনি সাজানো আরম্ভ হ’ল, এবং ডজন কয়েক মুনি যখন সারবন্দী হ’য়ে আসরে দাঁড়াল, তখন অধিকারী শাল বধ্‌শিস পেলেন। মশায়, সেই ইতিহাসই চোখের উপর পুনরাবৃত্ত হচ্ছে।”

ইতিহাসের পুনরাবৃত্তির কথায় আর একটা দৃষ্টান্ত মনে আসছে। শোনা যায়, দিল্লীর খেয়ালী সম্রাট মুহম্মদ বিন তোগলক্ তিন বার দিল্লী থেকে দেবগিরিতে রাজধানী স্থানান্তরিত করেছিলেন এবং প্রতিবারই হুকুমজারি হয়েছিল সমস্ত নাগরিকদের তাঁর সঙ্গে সঙ্গে যেতে হবে। কাশিমবাজারের সাহেবটিও প্রথমে তাঁর রাজধানী কাশিমবাজার থেকে বহরমপুরে নিয়ে আসেন এবং সেখান থেকে আবার তাকে কলকাতায় টেনে নিয়ে যান। তিনিও প্রত্যেক বার হুকুম দিয়েছেন, চেয়ার টেবিল আলমারী কাগজ-পতর এবং আমলাবর্গ সকলে তাঁরই সঙ্গে স্থানান্তরিত হবে। আবার এমন ব্যবস্থাও করতে হবে, যাতে স্থানান্তর-করণের সময় আমলাদের একটি দিনও আফিস কামাই না হয়, অর্থাৎ শনিবারের দিন যে টেবিল-চেয়ারে ব’সে সাহেব ও আমলাবর্গ বহরমপুরে চাকরি করবেন সোমবারে ঠিক সেই-সেই চেয়ার-টেবিলে তাঁরা কলকাতায় যথারীতি

আফিস করবেন। এর ভার প্রধানত ইঞ্জিনিয়ারের উপর। কাশিমবাজারে মহারাজার সদর-অফিস এক বিরাট ব্যাপার। স্তুরাং বানপ্রস্থী মহারাজা প্রত্যেক বারই নিষেধ করেছিলেন, কিন্তু কোন ফল হয়নি। চেয়ার-টেবিল-কাগজের পাহাড়-প্রমাণ স্তূপ, সপরিবার আমলাদের ঠেলাঠেলি ভিড়, বর্ষার অবিশ্রাম বারিবর্ষণ ইত্যাদিতে মিলে সে এক অভূতপূর্ব দৃশ্য। কিন্তু জ্বরদস্ত সাহেবের এমনই প্রতাপ ও দক্ষতা যে প্রকৃতই শনিবারের আফিস বহরমপুরে সেরে সোমবারের আফিস কলকাতায় বসেছিল। দেশ থেকে সাহেব তাড়িয়ে ভাল কাজ হয়নি।

ক্রমে মহারাজা বিরক্ত হয়ে এই প্রচণ্ড সাহেবটিকে সরাবার চেষ্টা করতে লাগলেন। কণ্টক তুলতে কণ্টক চাই, সাহেব তাড়াতে সাহেবেরই প্রয়োজন।

নানা কৌশলে মহারাজা এষ্টেট দিলেন কোর্ট-অব-ওয়ার্ডস্‌এর তত্ত্বাবধানে। কিন্তু কি আশ্চর্য, এবারও যে সাহেবটি কর্ণধার হয়ে এলেন তিনি হাল হাতে করেই বললেন, ক্লাইভ স্ট্রীট থেকে আফিস অন্ত্র স্থানান্তরিত করতে হবে। নিজেই চৌরঙ্গী অঞ্চলে এক বাড়ী ভাড়া করলেন—যার উপরিতলে থাকবেন স্বয়ং সপরিবারে, আর নিম্নতলে বসবে আফিস। নিজের সুবিধা অমুখারী, সাহেব কারও সঙ্গে পরামর্শ না করেই বাড়ী নির্বাচন কোরে রেখেছেন, এখন তাঁর ইঞ্জিনিয়ারকে করতে হবে তারই মধ্যে সকলের স্থান-সংকুলান। অনেক মাপ-জোখ হিসেব কোরে যতীন বললে—কোন উপায়েই এ-বাড়ীর নিম্নতলে সমস্ত আমলার বসবার স্থান করা যাচ্ছে না, উপরতলের কিছুটা না নিলে অন্তত কুড়িটি লোকের স্থানাভাব ঘটছে। সাহেব অত্যন্ত সংক্ষেপে জবাব দিলেন—ঐ কুড়ি জন আমলাকে বরখাস্ত করে দিলেই হবে। যতীন বললে—সাহেব, আর একবার মেপে দেখি। তার পর ভগ্নপ্রায় আস্তাবল মেরামত করিয়ে, বাথরুমগুলির কামোড ইউরিনাল সরিয়ে, বারান্দায় পর্দা টাঙিয়ে, কোন রকমে ঐ কুড়ি জনের জায়গাও হ'ল। এ সাহেব রাজত্ব

করলেন প্রায় পাঁচ বৎসর। এঁরই রাজত্ব কালে মহারাজা মনীন্দ্রচন্দ্র দেহরক্ষা করেন।

তার পর থেকে বাঙ্গালী সাহেবের পালা। মহারাজার ঋণ শোধ না হ'য়ে ক্রমেই যেন বেড়ে যাচ্ছিল। সুতরাং বাঙ্গালী সাহেবদের বেতন খাঁটি সাহেবদের অর্ধেক, এক-তৃতীয়াংশ, এই রকম নামতে লাগল। এঁরা সকলেই অবসরপ্রাপ্ত পাকা ডেপুটি ম্যাজিস্ট্রেট, সাহেব হ'লেও বিশিষ্ট বাঙ্গালী ভদ্রলোক। যিনি যখন এসেছেন তিনিই বলেছেন, পূর্বস্বরীগণের দোষেই এষ্টেট ঋণমুক্ত হয়নি, আমার আমলে সব ঠিক হ'য়ে যাবে। কিন্তু ক্রমেই সব বেঠিক হ'তে লাগল।

দ্বিতীয় মহাযুদ্ধের শেষ দিকে ১৯৪২ সালে জাপানীরা ভাবছিল কলকাতায় বোমা ফেলব কি না। বোমা তখনও পড়েনি, কিন্তু কলকাতা প্রায় জনশূন্য হ'য়ে গেল। সেই সময় রাজধানী আবার কলকাতা থেকে বহরমপুরে ফিরে এল। আবার সেই আমলাদের সঙ্গে সঙ্গে চেয়ার টেবিল আলমারী কাগজের বস্তা সচল হ'য়ে উঠল। সেই ছড়োছড়ি, বিশৃঙ্খলা, অর্থের শ্রাঙ্ক। দীর্ঘ ১৩ বৎসর কলকাতায় কাটিয়ে যতীনও ফিরে এল বহরমপুরে।

কোর্ট-অব-ওয়ার্ডস্ ঋণমুক্তির কোন ব্যবস্থাই করতে পারল না। দাঁড়ি-মাকি মিলে যতই মারে টান হেঁইয়ো, ঋণভারে ভারী তরণী ততই যেন ভরাডুবির দিকে এগিয়ে যায়। শেষে, ১৯৪৪ সালে মহারাজা শ্রীশচন্দ্র তাঁর বহুমূল্য কয়লা খনির অংশবিশেষ বিক্রয় কোরে নিজেকে ঋণমুক্ত করলেন, এবং জমিদারীর ভার স্বহস্তে গ্রহণ করলেন।

১৯২৩ থেকে ১৯৫০ ; এই দীর্ঘকাল নানা বিপর্যয়ের মধ্যে যতীন কাশিমবাজার এষ্টেটেই চাকরি কোরেছে। সেই সূত্রে তাকে বঙ্গ-বিহার-উড়িষ্যার অনেক স্থানে পরিভ্রমণ করতে হ'য়েছে। তার কর্মজীবনে যে-সব ছুঁছুঁহের দৃষ্টি পড়েছিল, যে কারণেই হোক, তারা কেউ মারা যুক হয়নি ; যতীনও তাদের জুকুটি-কুটিলকটাক্ষ এড়িয়ে মাঝে-মাঝে কবিতা লিখেছে, চরকাও কেটেছে। “মরীচিকা”র পরের সমস্ত কবিতাই তার কাশিমবাজারের চাকরির সময় লেখা।

সে খবর মহারাজা শ্রীশচন্দ্র ব্যতীত কতৃপক্ষের অপর কেহই বড় একটা  
রাখতেন না। কাজ থেকে অবসর নেওয়ার পরই যতীন আমায়  
তার নতুন কবিতা গুনিয়ে দিল :—

ইট কাঠ চূণ বালি আনাইয়া গাড়ী গাড়ী  
সারাটা জীবন শুধু গাঁথিলু পরের বাড়ী ।  
কত দুশ্চিন্তাই ঘটাতে বাসের স্নখ,  
আলো হাওয়া জল ড্রেন,—পাছে কোন হয় চুক ।  
সে সব বাড়ীতে মোর কোন অধিকার নাই,  
পথে পথে খুঁজি আজ মাথা গুঁজিবার ঠাই ।

ছন্দ অর্থ আর বুড়ি বুড়ি কথা বাছি,  
সকলই পরের তরে, কবিতা যা গাঁথিয়াছি !  
অশ্রুসাগর সেচি' অহেতুক কোতুকে  
গাঁথিয়া গাঁথিয়া মালা দুলায়েছি বুক বুক ।  
হায় রে, আমার বলি সে-বুক সে-মালা কোথা,  
যার পরশনে মোর জুড়াবে বুকের ব্যথা ?

বরাত সঙ্গে চলে, কিছু নাই বলিবার,  
মিথ্যে হইলু কবি, মিছে ইঞ্জিনিয়ার ।

এই ইঞ্জিনিয়ার-কবির, বা লোহার ফুলদানির, কর্মজীবনের  
কিছু পরিচয় দিলাম ; কাব্যপরিচয় দেবে তার কবিতা । তবে আমি  
জানি, এই পরিচয়ও খাঁটি সত্য হবে না । তার অধিকাংশ কবিতার  
পিছনে একটি ছোট্ট সূচের ইতিহাস আছে ; সেই সূচটাই আসল  
সত্য ; সঙ্গে সঙ্গে যে সব সূতো ঘোরাকেরা করেছে তারাই যতীনকে  
মিথ্যা কবি-খ্যাতি দিতে বসেছে । এদিক দিয়ে তার বরাত ভাল ।  
আমার এমনও মনে হয়, যতীনের বাল্যের ম্যালেরিয়াই কুইনাইন  
দ্বারা অবদমিত হ'য়ে পরিণত বয়সে কাব্যরূপ গ্রহণ করেছে । এদিক  
থেকে দেখলে তার কবিতার প্রধান উৎসটি হয়ত ধরা পড়তে  
পারে ।







